



63.3(543)

Т 39 ХАЛҚАРО АМИР ТЕМУР ЖАМҒАРМАСИ

ЎЗБЕКИСТОН РЕСПУБЛИКАСИ ФАНЛАР АКАДЕМИЯСИ
АБУ РАЙҲОН БЕРУНИЙ НОМИДАГИ ШАРҚШУНОСЛИК ИНСТИТУТИ

ТЕМУР ТУЗУҚЛАРИ

Nizomiy nomidagi
TAMU
axbosot-resurs
markazi

Y-7174/2

ТОШКЕНТ
«ЎЗБЕКИСТОН»
2011

УДК: 94(575)
ББК 63.3(5У)4
T39



МИЛЛИЙ ДАВЛАТЧИЛИГИМИЗ ТАРИХИННИНГ МУМТОЗ НАМУНАСИ

Бугунги куннинг ўткир ва долзарб муаммолари биздан замонавий тараққиётнинг асосий тамойилларини ҳар томонлама чуқур таҳлил этиш билан бирга, инсониятнинг яқин-олис тарихидаги бой тажрибасини ҳам теран идрок этишни, шу асосда амалий хуносалар чиқаришни тақозо этмоқда, яъни тарих тажрибаси одамзод учун тобора мухим аҳамият касб этмоқда.

Ҳеч бир муболагасиз айтиш мумкинки, ўзбек ҳалқининг кўп асрлик тарихи ҳам ана шундай буюк тажрибалар манбаидир. Бу тарихнинг энг ёрқин ва шонли саҳифаларини ташкил этадиган улуғ аждодларимиз ҳақида сўз борганда, буюк давлат арбоби ва саркарда, соҳибқирон Амир Темур бобомизнинг ўлмас номини биринчилар қатори тилга олишимиз табиий, албатта. Мана, қарийб етти асрдирки, бу улуғ зотнинг шону шуҳрати, ҳаёти ва фаолиятига бўлган қизиқиш жаҳоннинг турли мамлакатларида тобора ортиб бормоқда.

Шуни таъкидлаш жоизки, улуғ аждодимизнинг ўзи яшаган замонга, шу даврда Осиё ва Европа қитъалирида рўй берган, жуда катта тарихий аҳамиятга молик ўзгаришларга олиб келган воқеа-ҳодисаларга ҳал қилувчи таъсири, унинг бу жараёнлардаги роли наинки тарихчи ва сиёсатчilar, ҳарбий илим мутахассислари, балки бадиий ижод аҳдининг ҳам диққат-этиборини ҳали-ҳамон ўзига жалб этиб келмоқда.

Бу беназир зотнинг қандай миллий замин ва тарихий шароитда ўсиб-улғайгани, қай тариқа шундай

ISBN 978-9943-01-356-8

© «ЎЗБЕКИСТОН» НМИУ, 2011

юксак чўққиларга кўтарилигани, зафарли юришлари ҳақида, унинг нафақат давлат арбоби ва енгилмас саркарда, айни вақтда инсон сифатидаги фазилатлари, ички дунёси ва кечинмалари ҳақида Шарқ давлатлари билан бирга олис Европада – Буюк Британия, Франция, Испания, Германия каби мамлакатларда ҳам бундан неча юз йиллар аввал кўп-кўп илмий ва бадиий асарлар яратилгани яхши маълум.

Чунончи, Амир Темур бобомиз ҳақида инглиз драматурги Кристофер Марлоу 1588 йили тарихий пьеса, машҳур немис композитори Георг Гендель 1724 йили опера, американлик адаб Эдгар По эса 1827 йили шеърий поэма яратган. Ва бундай асарлар бутунги кунда ҳам кўплаб пайдо бўлмоқда. Франциялик таниқли олим Люсьен Керен томонидан 2006 йили халқаро миқёсда кенг нишонланган Соҳибқироннинг 670 йиллик таваллуд тўйи арафасида Парижда француз тилида нашр қилинган «Самарқандга, Амир Темур даврига саёҳат» номли фундаментал тадқиқот бу фикрнинг яққол тасдиғидир. Табиийки, бу асарларнинг барчаси улуф бобомизнинг ҳаёти ва фаолияти билан боғлиқ, кўпгина масалаларга жавоб топишда, уларни тарих ва бутунги замон нуқтаи назаридан ёритишида муҳим ўрин тутади. Уларнинг ҳар бири Соҳибқирон сиймоси ҳақида ўзига хос тасаввур ва тушунча беради.

Минг афсуски, мустамлакачилик йиларида, яъни миллий қадриятларимиз, азиз-авлиёларимиз ва алломаларимизнинг бой мероси, табаррук номларини халқимиз хотираси ва юрагидан бутунлай учирашга қаратилган сиёsat ҳукм сурган даврларда Амир Темурнинг ҳаёти ва фаолиятини ўрганиш у ёқда турсин, ҳатто унинг номини тилга олиш ҳам мутлақо тақиқлаб кўйилган эди. Бу мавзуда яратилган баъзи бир илмий-бадиий асарларда Амир Темур сиймоси тарихий ҳақиқатга зид равишида бирёқлама, асосан қора бўёқларда акс эттирилар эди. Таассуфлар бўлсинки, собиқ тузум дав-

рида яратилган тарихий ва бадиий адабиётларда ҳамда уларнинг таъсирида чоп этилаётган бутунги айрим китобларда ҳам мана шундай фаразли ёндашув аломатларини ҳануз учратиш мумкин.

Оллоҳга шукрки, истиқдолга эришганимиздан кейин бу масалада ҳам тарихий адолат қарор топди. Муқаддас юртимиз заминида яшаб ўтган кўплаб улуф сиймолар қатори Амир Темур бобомизнинг номи, шаъну шавкати ва мероси ҳам қайта тикланиб, бу буюк зот ҳақиқати асл ҳақиқат холис ва ҳаққоний ёритилмоқда, тадқиқотлар олиб борилмоқда, китоблар ёзилмоқда. Зоро, Амир Темур шахсини идрок этиш – тарихни идрок этиш демақдир. Амир Темурни англаш – ўзлигимизни англаш демақдир. Амир Темурни улуғлаш – тарих қаърига чуқур илдиз отган томирларимизга, маданиятимизга, қудратимизга асосланиб, буюк келажагимизни, ишончимизни мустаҳкамлаш демақдир.

Бу ҳақда гапирганда, Амир Темурнинг давлатчилик ва дипломатия, ҳарбий маҳорат, бунёдкорлик салоҳияти, илму фан, санъат ва меъморчиликка оид қарашлари, ҳаётнинг матьно-мазмуни, инсонни улуғлайдиган эзгу ишлар ҳақида билдирган фикрлари, дину диёнат ва адолатни жойига қўйиш, салтанат ишларини кенгаш ва тадбир асосида амалга ошириш, ҳар бир масалада узоқни кўзлаб, эл манфаатини ўйлаб иш тутиш билан боғлиқ, ибратли фазилатларини алоҳида таъкидлаш ўринлидир. Айнан мана шундай масалалар Соҳибқирон тафаккурининг маҳсули бўлган «Темур тузуклари» асарида ҳар томонлама аниқ, ишонарли ва таъсирчан тарзда ёритилган, десак, ҳақиқатни айтган бўламиз.

Шунинг учун ҳам ўзининг беқиёс азму шижаоти, мардлик ва жасорати билан Мовароуннахр заминида мўғул зулмига барҳам бериб, халқимизни қарамлик исканжасидан холос этган, тарқоқ ва пароканда эл улусни бирлаштириб, мустақил ва қудратли давлатга

асос соглан бу улуғ сиймонинг мазкур китобда ифода этилган гоя ва қарашлари нафақат ўз даври, балки бутунги ва келгуси авлодлар учун ҳам муҳим аҳамият касб этиши бежиз эмас.

Шахсан мен Соҳибқирон бобомиз бизга мерос қилиб қолдирган «Тузуклар»ни ўқисам, худдики ўзимга қандайдир катта руҳий куч-қувват топғандек бўламан. Ҳар бир сатри бир умр эл-юрт, салтанат ташвиши билан яшаган фидойи инсон, улкан давлат арбобининг кенг миқёсдаги ўй-фикрлари, ҳаёт ва кураш тажрибаси, мушоҳадаси, баъзан эса дардли ва изтиробли кечинмалари билан суғорилган бу асарда қандай теран маъно мужассам эканини маърифатли, зукко китобхон яхши англайди, албатта.

Мен ўз иш фаолиятимда бу китобга такрор-такрор мурожаат қилиб, ундаги ҳеч қачон эскирмайдиган ҳаёт ҳикматларининг қанчалик тўғри эканига кўп бор ишонч ҳосил қилганман. Масалан, «Тажрибамда кўрилганким, азми қатъий, тадбиркор, ҳушёр, мард ва шижаотли бир киши мингта тадбирсиз, лоқайд кишидан яхшироқдир», деган фикрлар бутунги кунда ҳам нақадар долзарб экани барчамизга аён. Ёки у зотнинг: «Салтанат ишларининг тўққиз улушкини машварат, тадбир ва кенгаш, қолган бир улушкини эса қилич билан бажо келтириш зарур», деган кўрсатмаларида ҳозирги нотинч замон учун, XXI аср сиёсатдонлари учун ҳам ҳар жиҳатдан ибратли фикрлар борлигини таъкидлаш жоиз. Амир Темур бобомизнинг бундай чуқур маъноли сўzlари, айниқса, «Билаги зўр бирни, билими зўр мингни йиқар» деган ҳикмати инсонни доимо ақл-идрок, илму маърифат асосида яшашга даъват этиши билан эътиборлидир.

Улуғ аждодимиз, гарчи буюк бунёдкор ва жаҳонгир бўлса-да, куч-кудрат зўрлик ва зўравонлиқда эмас, аксинча,adolатда, ҳамжихатлик ва ҳамкорликда эканини ниҳоятда чуқур анлаган. Унинг давлатни оқило-

на бошқариш, ўта мушқул ва имконсиз вазиятда ҳам тўғри йўл, тадбир топа олиш қобилияти, ноёб ақл-заковати ҳар қандай одамни ҳайратга солади. Амир Темурдек буюк ва бетакрор сиймони ҳар томонлама тушуниш, у барпо этган қудратли салтанатнинг сиёсий, ижтимоий-иқтисодий, маънавий-мағкуравий асосларини, Соҳибқироннинг давлат бошқаруви борасидаги улкан салоҳияти, маҳорати, билим ва тажрибаларини ўрганишда, умуман айттанда, ҳаёт сирларини англаб этишда «Темур тузуклари» бебаҳо қўлланма бўлиб хизмат қиласди.

Айниқса, бугунги мураккаб ва таҳликали даврда бу китобни қайта-қайта мутолаа қилиш, унинг мағзини чақиши биринчи галда раҳбар, етакчи бўлишдек масъулиятли вазифани ўз зиммасига олган одамлар учун, қолаверса, ҳар қайси зиёли инсон учун бафоят фойдали экани ҳақида ортиқча гапириб ўтиришга ҳожат йўқ, деб ўйлайман.

Ишончим комилки, ёшлиаримиз бу китобни меҳр қўйиб, тушуниб, чуқур англаб ўқиса, уларнинг қалбидаги миллий фурур туйғуси юксалади, ўзининг қандай буюк зотларнинг авлоди эканини янада чуқурроқ ҳис этиб, ҳаётнинг ҳар қандай синов ва қийинчиликларини енгишга қодир инсонлар бўлиб вояга етади.


Шу маънода, «Темур тузуклари» китобининг мамлакатимизда она тилимизда янгитдан юксак сифат билан чоп этилиши, ҳеч шубҳасиз, маданий ҳаётимиздаги ўзига хос муҳим воқеадир. Қадимий ва бой, шавкатли тарихимиз, бетакрор меросимиз, азалий қадриятларимиз билан қизиқадиган барча китобхонларни ана шу қувончли воқеа билан чин дилдан қутлаб, бу ноёб асар уларнинг ҳаётида доимий маънавий ҳамроҳ, бўлиб қолишини тилайман.

ИСЛОМ КАРИМОВ,
Ўзбекистон Республикаси Президенти



ТЕМУР
ТУЗУКЛАРИ





Биринчи китоб¹

КЕНГАШЛАР ВА ТАДБИРЛАР

Форсча матндан
Алихонтўра СОҒУНИЙ ва
Ҳабибулла КАРОМАТОВ таржимаси

Изоҳлар

Бўрибой АҲМЕДОВ ва Ашраф АҲМЕДОВ
томонидан тайёrlанган

Ҳзга мамлакатларни забт этиш, уларни идора қилиш, ғаним лашқарларини синдириш, душманни тузоққа тушириш, мухолифларни (кўнглини овлаб) дўстта айлантириш, дўст-душман орасида муомала, муросаю мадора қилиш хусусида ушбу кенгаш ва тадбирларни қўлладим.

Пирим² менга ёзмишларким: «Абулмансур³ Темур, салтанат ишларида тўрт нарсага амал қилгин, яъни:

¹ Форсча матнда «Мақола» деб берилган. (А. Аҳмедов изоҳи. Бундан бўён: — А.А. Бошқа изоҳлар Б. Аҳмедовга тегишли.)

² «Тузуклар»нинг Бомбей нашрида китоб ҳошиясида шу ўринда Зайниддин Абубакр Тайободий номи кўрсатилган. (— А.А.)

Амир Темурнинг уч шайхга нисбатан ихлоси жуда кучли бўлган. Булар — Шамсиддин Кулол, Сайид Барака ва Зайниддин Тайободийлардир. 1) Шамсиддин Кулол Амир Темурнинг отаси Амир Тарайнинг пири (ваф. 1370 й. Кеш). 1373—74 йилларда Амир Темур Шамсиддин Кулол қабри ёнида гумбазли мақбара қурдиради ва отасининг хокини ўша ерга кўчиртириб, Шамсиддин Кулол қабрининг қиблा томонига дағни этади. 2) Мир Сайид Барака(ваф. 1404 й.). Амир Темур у билан Термиз яқинида учрашган. Амир Темур унга 1370 йилда Андхуд (хозирги Афғонистонда Андхўй) вилоятини иктоъ тарзида инъом этган. Мир Сайид Барака Амир Темурга зафар ва ғалабалар рамзи бўлган ногора билан байроқ тортиқ қилган, Соҳибқироннинг Мозандарон, Даشتி Қипчоқ ҳарбий юришларида унга ҳамроҳ бўлган. Самарқандда Амир Темур мақбарасига дағни қилинган. 3) Зайниддин Абубакр Тайободий. Хурсонлик йирик шайх ва шайхулислом. «Зубдат ут-таворих» асарида Ҳофизи Абру Амир Темурнинг Хурсонга юриши (782/1381) пайтида у билан учрашгани ҳақида ҳикоя қилган. Муаррих Фасих, Ҳавофийнинг (XV аср) «Мужмали Фасиҳий» асарида ҳам шундай маълумот келтирилган ва Тайободийнинг 1389 йил 29 январда вафот эттани айтилган.

³ Абулмансур (лугавий маъноси: зафар, ғалаба қозонувчи) — уламо ва машойихлар тарафидан Амир Темурга берилган фахрли ном.

1) (ўзинг билан) кенгаш¹; 2) (бошқалар билан) машварату маслаҳат айла; 3) ҳушёrlигу мулоҳазакорлик билан қатъий қарор чиқар; 4) эҳтиёткор бўл. Чунки кенгаш ва машваратсиз салтанатни барча қилган ишларию айтган гаплари хато бўлган жоҳил кимсага қиёслаш мумкин; унинг сўzlари ва қилмишлари бошга пушаймонлик или надомат келтиргай. Шундай экан, салтанатни бошқаришда машварату маслаҳат ва тадбир билан иш юритгин, токи оқибатда надомат чекиб, пушаймон бўлмагайсан.

Яна шуни ҳам билгилким, салтанат ишларининг бир қисми сабру тоқат билан бўлгай, яна бир қисми эса билиб-бимасликка, кўриб-кўрмасликка солиш билан битур. (Хуллас) тадбирлардан огоҳ қилингандан кейин шуни айтиш жоиздирким, қатъийлик, ҳушёrlик, эҳтиёткорлик, шиҷоат ва сабр-чиdam билан барча ишлар амалга оширилгай. Вассалом».

Бу мактуб менга йўл бошловчи янглиғ раҳнамолик қилди. У менга салтанат ишларининг тўққиз улуши машварат, тадбир ва кенгаш, қолган бир улуши эса қилич билан бажо келтирилишини англатди. (Донишмандлар) демишларким, ўз ўрнида қўлланган тадбир билан кўплаб лашкарнинг қиличи ожизлик қилган ҳар қандай мамлакат дарвозасини очиб, фавж-фавж аскарларни енгиб бўлур.

Тажрибамда кўрилганким, азми қатъий, тадбиркор, ҳушёrl, жанг кўрган, мард, шиҷоатли бир киши мингта тадбирсиз, лоқайд кишидан яхшироқдир. Чунки тажрибали бир киши минглаб кишига иш буюради.

Мен яна тажрибамда кўрдимки, ғаним лашкарини енгиш қўшиннинг кўплиги билан эмас, мағлуб бўлиш эса сипоҳнинг камлигидан бўлмайди. Балки ғолиб бўлмоқдик (Тангрининг) мадади ва бандасининг тад-

¹ «Темур тузуклари»да «кенгаш» сўзи икки маънода келган:
1. Мустақил фикрлаш ва қарор қабул қилиш. 2. Бошқалар билан маслаҳатлашиш.

бири биландир. Чунончи, мен кенгасиб ва тадбир юритган ҳолда икки юз қирқ уч киши билан Қарши қалъаси устига юрдим. Амир Мусо ва Малик баҳодир ўн икки минг¹ отлиқ аскар билан қалъа ва унинг атрофини қўриқламоқда эдилар. Лекин Тангри таолонинг ёрдами етиб, ўзим қўллаган тўғри тадбирларим орқали Қарши қалъасини эгалладим.

Шундан сўнг, амир Мусо ва Малик баҳодир ўн икки минг отлиқ аскар билан устимга бостириб келиб, мени Қарши қалъасида қамал қилдилар. Мен Тангрининг мададио иноятига ишониб, тадбиркорлик ва эҳтиёткорлик ишлаттган ҳолда қалъадан чиқиб, қулай фурсатларда бир неча марта жангта кирдим. Пировардида шу икки юз қирқ уч йигитим билан ўн икки минг отлиқ ғаним лашкарини мағлубиятта учратдим ва уларни бир неча фарсанг² ергача қувиб бордим.

Яна тажрибамдан ўтмишким, гарчи ишнинг қандай якунланиши тақдир пардаси орқасида яширин бўлса ҳам, ақли расо ва ҳушёр кишилардан кенгашу тадбир истаб, фикрларини билмок лозимдир. (Шунинг учун) пайғамбаримиз Муҳаммад саллоллоҳу алайҳи васаллам (унга Тангрининг марҳаматлари ва саломлари бўлсин) айттанларидек, ҳар бир ишни қилишга киришар эканман, аввал обдан ўйлаб, (амирларим билан) кенгашдим.

Маслаҳатчилар ва кенгаш аҳли йифилганда, олдимиздаги ишларнинг яхши-ёмон, фойдаю зиён томонлари, уларни амалга ошириш, оширмаслик ҳақида сўз очиб, (улардан) фикр сўрар эдим. Сўзларини эшигтгач, ишнинг ҳар икки томонини мушоҳада қилиб, фойда-зиёнларини кўнглимдан кечирардим; унинг хатарли томонларига кўпроқ эътибор назари билан қарапдим; қайси бир ишда икки хатар мавжуд бўлса, уни (ба-

¹ Асарнинг Техрон нашрида «икки минг отлиқ аскар» деб кўрсатилган.

² Фарсанг – тахм. 6 км га teng масофа. (– А.А.)

жаришдан) воз кечардим ва бир хатарлик ишни ихтиёр этардим. Чунончи, шунга кўра Туғлук Темурхонга¹ тўғри йўл кўрсатганман. Унинг амирлари Даشتி Жетада² исён тугини кўтаргандарида, мендан маслаҳат сўради. Унга шундай дедим: «Агар ғанимни синдириш учун бир фавж аскар юборсанг, олдингда икки хатар бордир, агар ўзинг олиб борсанг, бир хатар мавжуд». У менинг маслаҳатимга кириб, Даشت томон ўзи бориб эди, мен айттандек бўлди.

Ишларимнинг барини кенгаш билан юргизиб, уни битиришда тўғри тадбир қўллар эдим. Бир ишга киришмай туриб, ундан чиқиш йўлларини ўйлаб қўяр эдим. Уни тўғри тадбир, қатъий жазм, сабр-чиdam кўрсатиб, эҳтиёткорлик билан узогини ўйлаб, ортини эсдан чиқармаган ҳолда охирига етказардим.

Яна тажрибамдан ўтказдимки, кенгаш аҳли бирлик, иттифоқлик билан сўзда собит, ишда чидамли бўлишлари шартдир. Қилмоқчи бўлган ишларини қилмасдан қолдирмасунлар. Агар бирор ишни қилмасликка сўз берар эканлар, унинг яқинига ҳам йўламасунлар.

Тажрибамдан маълум бўлдики, кенгаш икки турли бўлур. Бири – тил учида айтилгани, иккинчиси – дилдан чиққани. Тил учида айтилганини (шунчаки) эшитардим. Дилдан айтилган маслаҳатни эса қалбим қулагига қуярдим ва дилимга жойлардим.

Агар (ғаним устига) лашкар тортмоқчи бўлсам, уруш-ярашдан ўртага сўз ташлаб, амирларим кўнгилларининг бу икковидан қай бирига мойиллигини билишга интилардим. Агар ярашдан сўз очсалар, бунинг

¹ Туғлук Темурхон – Мўгулистон хони (1348 – 1362). Мўгулистон ёки Жета – Чигатой улуси парчаланиши натижасида унинг Мовароуннаҳдан шарқдаги қисми, яъни Шарқий Туркистон ва Еттисув ерларини ўз ичига олган давлат. Хон 1360 – 1361 йиллар баҳорида Мовароуннаҳрга икки марта юриш қилиб, Қашқадарё воҳасигача етган. 1362 йили вафот этган. (– А.А.)

² Даشتி Жета – Еттисувда Чу дарёси атрофидағи даштлик. (– А.А.)

фойдасини уруш зиёнига солиштириб кўрардим. Агар урушга мойил бўлсалар, унинг наф ва фойдасини яраш зиёнига тақдослаб кўрардим; қайси бири фойдалироқ бўлса, шуни ихтиёр қилардим.

Сипоҳни иккилантирадиган (турумсиз) кенгашни эштиришдан сақланардим. Кенгаш аҳлидан кимки куюниб маслаҳат берса, қулоқ солардим, кимки оқилона гапларни мардларча кескинлик билан сўзласа, уни дикқат билан тинглардим.

Ҳар кимдан сўз олиб, кенгаш сўрар эдим. Лекин айтилган ҳар бир маслаҳатнинг яхши-ёмон томонлари ҳақида ўйлаб кўргач, тўғри ва савоблироғини танлаб олардим.

Чунончи, Чингизхон авлодидан бўлмиш Туғлук Темурхон Мовароуннаҳр мулкини босиб олиш қасдида қўшин тортиб¹, Хўжанд сувидан² кечиб ўтгач, менга, амир Ҳожи Барлос³ ва амир Боязид Жалойир⁴ номига ёрлиқ⁵ жўнатиб, унинг ҳузурига боришимизни талаб қилган эди. Улар мен билан кенгашдилар: «Ўз эл-улусимиз билан Хуросонга кетайликми ёки Туғлук Темурхон қошига борайликми?» Мен уларга бундай йўл кўрсатдим: «Туғлук Темурхоннинг ҳузурига борсангиз икки фойда, бир зиён бордир. Хуросон томонга ўтиб кетишнинг (эса) икки зиёни, бир фойдаси бордир».

Улар менинг кенгашимга кирмадилар ва Хуросон томонга кетдилар⁶.

¹ Воқеа 1360 йилнинг баҳорида содир бўлган.

² Хўжанд суви – Сирдарёнинг ўрта асрлардаги номларидан бири.

³ Амир Ҳожи Барлос – нуфузли барлосbekларидан. Кеш ва унга тобеъ ерлар ҳокими. Шарафиддин Али Яздӣ «Зафарномаси»да келтирилишича, Амир Темурхоннинг амакиси бўлган ва 1361 йили Хуросоннинг Жувайн мавзеида ўлдирилган. 1381 йили Амир Темур Жувайн мавзеини забт этган ва амакисининг авлодларига у жойдан «мол» солиғини йиғиш ҳуқуқини берган.

⁴ Амир Боязид Жалойир – Хўжанд вилоятининг амири. 1361 йили Туғлук Темурхоннинг буйругига кўра қатл этилган.

⁵ Ёрлиқ – фармон.

⁶ Бу воқеа 1361 йилда содир бўлган.

Мен ҳам Хурсонга ёки бўлмаса Туғлуқ Темурхоннинг қошига бориш-бормаслигимни билмай иккиласиб қолдим. Шу ҳол асносида пиримдан маслаҳат сўраб хат ёзган эдим, ушбу мазмунда жавоб ёзиб юборибдилар: «Тўртингчи халифадан¹, унга Тангрининг карашу марҳамати бўлсин, бир киши сўрабдики, осмон – камон, ер – камон ипи, ҳодисалар ўқ-ёй бўлса, инсонлар ул ўқ-ёйларга нишон бўлса, отғучи (эса) – буюк ва қудратли Худойи таоло бўлса, одамлар қаерга қочадилар?» Халифа жавоб қилиб: «Одамлар Тангрининг қошига қочсунлар», – дебди. Шунга ўхшаш сен ҳам ҳозир Туғлуқ Темурхоннинг олдига қочғил ва қўлидаги ўқ-ёйини тортиб олғил».

Бу жавоб келиши билан кўнглим кўтарилиб, юратим бундан қувват олди ва Туғлуқ Темурхон қошига боришга аҳд қилдим.

Лекин бирон ишни қилмоқчи бўлсан, кенгашиб олгач, кейин Қуръондан фол очардим ва Қуръон ҳукми билан иш қилур эдим. Туғлуқ Темурхон олдига боришидан аввал Қуръонни очсан, «Сурайи Юсуф»² чиқди ва Қуръони мажид ҳукмига амал қилдим.

ТУҒЛУҚ, ТЕМУРХОН БИЛАН УЧРАШГАНИМДАН СҮНГ КЎНГЛИМГА КЕЛГАН БИРИНЧИ КЕНГАШИМ

Туғлуқ Темурхон (саркардалари) Беккичик, Ҳожибек арканут³, Улуғ Туг Темур керайит⁴ ва Жетанинг

¹ ...тўртингчи халифа – бу ерда ҳазрати Али ибн Абу Толиб (656–661), Мұхаммад пайғамбарнинг амакивачаси ва күёви назарда тутилган.

² «Қуръони карим», Юсуф сураси, 54-оят.(Шоҳ буорди: «Уни ҳузуримга келтирингиз, ўзимга хос кишилардан қилиб олай!» У билан сўзлашгач (шоҳ): «Сен бутун(дан бошлаб) бизнинг ҳузуримизда мартабали ва ишончли (шахс)дирсан», – деди.)

³ Арканут – Чигатой улусининг шарқий қисми (Мўғулистон)-даги кўчманчи турк қабилаларидан бири. (–А.А.)

⁴ Керайит – нуфузли турк қавмларидан бирининг номи. Унинг бошликлари ўз вақтида Чингизхонни кўллаб-қувватлаган.

бошқа амирларидан уч фавж¹ тузиб, Мовароуннахр мамлакатини талон-торож қилиш учун юборгани, ўша уч фавж қўшин Хузор² деган жойга келиб тушгани ҳақидағи хабар менинг қулогимга етди. Шунда Туғлуқ Темурхонни бориб кўришдан илгари бу очкўз амирларни мол-дунё билан маҳлиё этиб, Мовароуннахр вилоятини қатлу форатдан қутқариб қолишга қарор қилдим.

Тилга олинган амирларни кўрганимда, уларни ҳайбатим босди шекилли, ортиқча илтифотлар кўрсатиб, ҳурматимни бажо келтирдилар. Уларнинг кўзларига ўхшаш кўнгиллари ҳам тор бўлганидан, совға-соврун³ йўсимида берилган ҳар турлик тансиқ моллар кўзларига кўп кўринди ва Мовароуннахрни босиб олиш, талон-торож қилиш ниятидан қайтдилар.

(Шундан сўнг) тўғри бориб Туғлуқ Темурхон билан кўришдим⁴. Хон келишимни яхшиликка йўйиб, (салтанат ишларида) мендан кенгаш сўради. Кўрсатган кенгашларимни тўғри деб топиб, барчасини қабул қилди.

Шу аснода Туғлуқ Темурхонга хабар келтирдиларким, (юқорида айтилган) уч фавж амирлари маҳаллий халқдан нақд пул ва соврунлар олиб, улар билан келишмишлар. Хон шу ондаёқ мол-мулк билан нақд пулларни қайтариб олиш учун вакил тайин қилди ва амирларни бундан бўён Мовароуннахрга боришиларини манъ этди. Мансабларидан бўшатди. Ўринларига Ҳожи Маҳмудшоҳ Ясурини⁵ тайинлади.

¹ Фавж – ҳарбий бўлинма, катталиги турлича бўлган.

² Хузор – Қашқадарё вилоятига қарашли ҳозирги Фузор тумани маркази.

³ Соврун – ўрта асрларда подшоҳ ва хонлар, умуман олий мартабали кишилар билан учрашганда уларга қилинадиган тансиқ моллардан иборат қимматбаҳо тортиқ.

⁴ Шарафидин Али Яздий «Зафарнома» асарида ёзишича, бу учрашув 761/1360 йилда юз берган. (–А.А.)

⁵ Ҳожи Маҳмудшоҳ Ясурӣ – Ясур уруғининг амири. (–А.А.)



Бу ҳақда амирлар хабар топгач, душманлик байроғини күтариб, юртларига қайтиб кетдилар. Йўлда хоннинг девонбеги ва бош маслаҳатчиси бўлмиш Ўғлонхўжани учратдилар. Уни ҳам ўзларига оғдириб олиб, Жета томон юзландилар.

Айнан шу вақтда Туғлуқ Темурхоннинг Даشتி Қипчоқдаги¹ амирлари ҳам исён тугини кўтартгани ҳақида хабар олинди. Бундан хон ташвишга тушди. У мен берган маслаҳатга кўра Жета тарафга йўл олди. Мовароуннаҳрни эса менга қолдирди ва бу хусусда ёрлиғу аҳднома ёзиб берди. Амир Қорачор нўённинг² Мовароуннаҳрдаги туманини ҳам менга топширди. Мен бутун Мовароуннаҳр вилоятига, то Жайхун дарёсининг соҳилларигача чўзилган ерларга ҳукмрон бўлдим.

Давлат ва салтанатимнинг бошланишида энг аввал қилган кенгашим шул эди.

Мен тажрибамдан шуни билдимки, юз минг отлиқ, аскар қиломаган ишни бир тўғри тадбир билан амалга ошириш мумкин экан.

ДАВЛАТ ҚУРИШ ОЛДИДАН ҚИЛГАН ИККИНЧИ КЕНГАШИМ

У шундан иборат бўлдики, ҳижрий 762 (милодий 1361) йили Туғлуқ Темурхон иккинчи марта Мовароуннаҳрга қўшин тортиб келиб, мени ўз ҳузурига чорлаб нома жўнатди. Мен (рози бўлиб), унинг истиқболига чиқдим ва у билан кўришдим. У орамиздаги аҳд-

¹ Даشتி Қипчоқ – араб ва форс тилларидағи адабиётларда XI аср бошлариданоқ қўлланган бу атама Шарқий Туркистондан тортиб, гарбда то Дунай дарёсининг қўйи оқимигача бўлган ерларни ўз ичига олган. Қипчоқ сўзи рус солномаларида «половец» дейилган, Византия солномаларида эса «коман» атамаси қўлланган. Туғлуқ Темурга бу Даشتнинг шарқий қисми қараган. (– А.А.)

² Қорачор нўён – Чингизхоннинг нуфузли амирларидан бири, Чигатойхоннинг маслаҳатчиси ва лашкарбошиси.

ни бузиб, Мовароуннаҳрни ўғли Илёс Хожага¹ топширди, мени эса сипоҳсолор қилиб белгилади. Бу ишга ортиқча рўйхушлик билдиримаёттанимни сезиб, бобом Қачули баҳодир² ва ўзининг бобоси Қабулхонларнинг³ аҳдномасини кўрсатди. Пўлат тахтага ўйиб ёзилган аҳдномада «Хонлик Қабулхон авлодининг қўлида, сипоҳсолорлик эса Қачули баҳодир болаларида бўлсин, улар бир-бири билан ёвлашмасинлар» деган сўзлар битилган экан. Буни ўқиб кўргач, улуғлар аҳдига вафо қилиш юзасидан сипоҳсолорликка розилик бердим.

Мовароуннаҳрда мўғулларнинг⁴ жабру зулми ортиб кетди. Чунончи, саййид ва саййидзодалардан етмиш кишини асир олиб банд этдилар. Илёс Хожа давлат ва сиёsat ишларида лаёқатсиз бўлгани туфайли уларнинг зулму ситамига барҳам беришга ожиз эди. Мен бўлсан, ўз салобату ҳайбатим билан мўғуллар устидан ғалаба қозондим ва мазлумларни золимлар жабридан халос этдим. Бу Илёс Хожа амирлари ва мўғулларнинг менга нисбатан душманлик қилишларига сабаб бўлди. Улар Туғлуқ Темурхонга хат ёзиб, «(Амир) Темур бизга қарши исён тугини кўтарди» дедилар. Хон ёлғон гапларни чин билиб, мени ўлдириб йўқотиш ҳақида ёрлиғ юборди. Бу ёрлиғ менинг қўлимга тушиб қолди. Ундан ўлимга ҳукм қилинганимни билиб олдим. Бунга қарши чора кўриш учун қуийдаги тадбирни ишлатдим. Барлос улусининг баҳодир йигитларини ўз атро-

¹ Илёс Хожа – Мўғулистон хони Туғлуқ Темурнинг ўғли. Отаси ўлганидан кейин қисқа муддат Мўғулистон хони (1363–65) бўлган.

² Қачули баҳодир – барлос қабиласидан; Амир Темурнинг саккизинчи аждоди.

³ Қабулхон – турк-мўғулларнинг афсонавий онаси Алонқуванинг авлоди; Чингизхоннинг учинчи аждоди. (– А.А.)

⁴..Мўғуллар – Мўғулистондан (Жетадан), яъни Чигатой улусининг шарқий қисмидан Илёс Хожа билан бирга келган мўғуллар назарда тутилган. Форсча матнда «ўзбеклар» деб берилган, аммо бу бошқа тарихий манбаларга зид бўлиб, тарихий ҳақиқатта ҳам тўғри келмайди. (– А.А.)

фимга тўплаб, уларни бирлаштиредим. Менга бўйсунниб кўмақдош бўлмоқлик учун розилик берган биринчи киши – Ийгу Темур бўлди, иккинчиси – амир Жаку Барлос эди. Булардан бошқа улус баҳодирлари ҳам жону диллари билан менга бўйсунмоққа (ва хизмат этмоққа) аҳд қилдилар.

Мовароуннахр аҳолиси менинг бу ишимдан хабар топиши биланок, тезда мўғулларга ҳужум қилишим кераклиги ҳақида истак билдирилар. Чунки уларнинг қалби золим мўғуллар тоифасидан бутунлай безган эди. Мовароуннахр аҳолисининг каттаю кичиги мен билан бирлашди. Мамлакатнинг уламо ва машойихлари эса мўғуллар тоифасини йўқ қилиш ҳақида фатво ёзиб бердилар. Улус амирлари ва қўшун бошлиқларининг баъзилари ҳам бу ишга қўшилиб, биз билан бирлашдилар. Бу тўғрида ёзилган аҳднома ва фатволарининг нусхаси бу эди: «Тўғри йўлдан борувчи халифалар¹, Оллоҳ таоло уларнинг барчасидан мамнун бўлсун, тутган йўлларига ва қилган ишларига мувофиқ Мовароуннахрдаги бутун аҳли ислом, сипоҳу раият² ёхуд уламою машойих, Амир Темурга иззату икром кўрсатиб, уни Амир Темур қутби салтанати олий деб атасунлар ва уни Оллоҳнинг (ердаги) қудрати – салтанат таҳтига лойик, деб билсунлар. Мусулмонларнинг ер-суви,номуси, мол-мulkи ҳамда жонига зулм-ситам қўлини чўзган мўғуллар тоифасини даф қилишда ва умуман йўқотишда (Амир) Темурга (ёрдамлашиш учун) ўз молу жонларини (аямай) тиришиб ҳаракат қилсунлар. Биз ўз аҳду байъатимизга³ содик қолурмиз. Агар берган аҳд-паймонимиздан қайтсан, Оллоҳнинг қудратию қув-

¹ Матнда хулафо ар-рошидин (тўғри йўлдан борган халифалар) – Мұхаммад пайғамбар вафотидан сўнг ислом жамоасига раҳбарлик қилган тўрт халифа: Абу Бакр (632–634), Умар (634–644), Усмон (644–656) ва Али (656–661).

² Раият – солиқ тўловчи халқ.

³ Байъат – аҳд-паймон, қасамёд.

вати ва ёрдамидан чиқиб, шайтон қудратию ёрдами йўлига кирган бўлайлик».

Бу фатвони менга кўрсатганидан кейин жанг жадал байробини кўтариб, мўғуллар устига лашкар тортишга қарор қилдим ва мазлумлар ҳақини золимлардан олиб бермоқчи бўлдим. Лекин бир неча разил кишилар бу сирни фош қилиб қўйдилар.

(Шундан кейин) ўйланиб қолдим. «Мабодо Самарқанд шаҳри ичиди мўғулларга қарши уруш бошласаму, бироқ Мовароуннахр аҳли (жанг қилишдан) қўл тортса-чи? (Унда нима қиласман?) Яххиси, шаҳардан чиқиб, Самарқанд тоғларида ўринлашай, тики менга қўшилишни истаганлар ҳузуримга келсунлар. Шунда мен катта сипоҳ тўплаб, мўғулларга қарши жанг жадални бошлагайман», – деб қарор қилдим.

Самарқанддан чиққанимда олтмиш отлиқдан бошқа бир киши ҳам менга эргашмади. Шундан билдимки, ўйлаган кенгашим хато бўлмаган экан. Ўша тогда бир ҳафтача кутиб ётдим, (лекин) бирон киши бизга келиб қўшилмади. Шунинг учун кенгаш тузиб Бадахшон¹ тарафига ўтиб, у ернинг шоҳлари билан бирлашишга қарор қилдим. Отланиб, Амир Кулолнинг² ҳузурига бордим. Ул зот менга Хоразмга боришимни маслаҳат берди. Агар мўғуллар устидан ғалаба қозонсам, Самарқанднинг бир йиллик хирожини³ ул зотга назр

¹ Бадахшон – тоғли ўлка, Панж дарёсининг иккала қирғоги, Амударёнинг бошланиш қисми, Кўкча дарёси ва унинг ирмоклари ҳавзасини этгаликни. Ҳиндистонга дengиз йўли очилгунча, Бадахшон транзит маркази сифатида муҳим эди, чунки унинг ҳудудида Хитойдан Ҳиндистон, Эрон ва Европага борадиган карvon йўллари кесишаради. Ҳозир Бадахшон иккита бўлинган: шимолий қисми Тожикистон ҳудудида, маркази Хорог; жанубий қисми Афғонистонда. (– А.А.)

² Бу ерда Шамсиддин Кулол назарда тутилган.

³ Хирож – ер солиги ва умуман даромад солиги учун кўлланилган атама; айрим ҳолларда даромаднинг учдан бир ёки учдан икки қисмини ташкил этган; «мол» деб ҳам аталган.

қилишни кўнглимга тутдим. У менга зафар тилаб фотиҳа ўқиганидан сўнг, кетишимга ижозат берди.

Амир Кулолнинг хизматидан чиққанимда, менга ҳаммаси бўлиб олтмиш отлиқ ҳамроҳлик қиласарди. Илёс Хожа менинг Хоразмга юриш қилаётганимдан хабар топиб, Хивақ¹ ҳокими Тўкал баҳодирга хат ёзиб, менга қарши чиқишни ва мени ўлдиришни буюрган экан.

Тўкал баҳодир минг отлиқ аскар олиб, менинг устимга келди. Олтмиш отлиқ йигитим ҳамда йўлда менга кўшилган (қайноғам) Амир Ҳусайн билан бирга минг отлиқдан иборат фаним лашкарига юзма-юз бўлдим ва жангта киришдим. Бу жангда шундайин баҳодирлик қилиб, матонат кўрсатдимки, унинг минг кишисидан эллик киши, менинг олтмиш отлиқ йигитимдан эса ўн кишигине қолди. Оқибат, барибир, зафар мен томонимда бўлди. Зафар қучганим хабари Илёс Хожа ва Жета амирларига еттак, улар (таажжубланиб): «(Амир) Темур ажаб эр киши экан, унга Тангрининг мадади етиб, баҳту иқболи очилмиш», деб ўзаро сўзлашибдилар. Мен бу урушдаги зафарни яхшилик аломати деб билдим. Мўгуллар мендан чўчийдиган бўлдилар.

ЎЗ САЛТАНАТИМНИ ТУЗИШ ЙЎЛИДА ҚИЛГАН УЧИНЧИ КЕНГАШИМ

Ўша вақтда давлатимни тузиш йўлидаги уринишларим қаттиқ қаршиликка учраб, салтанатимнинг асоси кучсизлана бошлади. Чунончи, (шу пайт) менга эргашган йўлдошларим ўн нафардан ортиқ эмас эди. Улардан еттитаси отлиқ, уч киши эса пиёда эдилар. Бошқа мен билан ҳеч ким қолмаганди. Мұхтарама жуфти ҳалолим бўлмиш амир Ҳусайннинг² синглиси-

¹ Хивақ – ҳозирги Хива шаҳри.

² Амир Ҳусайн ибн Мусалло ибн амир Қазаган – Кобул, Балх, Ҳисори Шодмон ва Бадахшон вилоятларининг ҳукмдори. Аввалига Амир Темурнинг қайноғаси ва сафдоши, 1365 йилдан кейин асосий рақиби бўлган. 1370 йил апрелида Амир Темур Балхни эттаганидан кейин ўлдирилган. (–А.А.)

ни¹ ўзимнинг отимга миндириб олган эдим. Шу алпозда Хоразм чўлларида бир неча кун саргардон бўлиб юрдим. Кунларнинг бирида кеч тушгач, қандайдир қудуқ бошига келиб етдим. Ўша кечаси пиёда юрган уч нафар хурросонлик бевафолик қилиб, отларимизни миниб қочдилар. Етти киши тўрт от билан қолдик. Аҳволим жуда оғирлашди. Лекин кўнгил тўқ эди. Бу ишни чакки қилган эканман деб ҳеч ўқинмас эдим. Сўнгра бу ердан ҳам кўчдим. Шу вақт Алибек Жониқурбоний² ёпирилиб тепамга келди. Мени ҳибсга олиб, бургаси кўп бир қоронғу уйга қамаб қўйди. Бир неча кишини мени қўриқлаш учун қолдирди. Олтмиш икки кун тутқунлиқда сақлади. Ундан қутулиш чорасини излаб, ўз-ўзим билан кенгашдим ва Тангрининг инояти етиб баҳодирлигум тутди. Билакларим кучи билан соқчилардан бирининг қўлидан қиличини тортиб олдим-да, уларга ҳамла қилган эдим, ҳаммалари қочиб қолдилар.

Сўнгра тўғри Алибекнинг устига бостириб кирдим. Мени кўргач, номақбул ишидан пушаймон бўлиб, узр сўради. Отларимни, жабдуқларим ва яроқларимни ҳозирлатиб, менга бир ориқ от билан бир қари туя тортиқ қилган бўлди. Оғаси Мұхаммадбек менга атаб юборган бир қанча совға-саломларни эса очкўзлик қилиб ўзига олиб қолди. Сўнг кетишимга рухсат берди.

Хоразм чўли томон равона бўлдим. Ўн икки отлиқ атрофимга тўпланди. Икки кундан сўнг бир манзилга етиб, қандайдир уйга тушдик. Шу орада бир гурӯҳ, ўша ерлик туркманлар пайдо бўлиб, «Ўғри!» – дейишиб

¹ Бу ерда амир Ҳусайннинг синглиси Улжай Туркон оқа назарда тутилган. Амир Темур уни 1356 йили ўз никоҳига олган. Бу никоҳдан Амир Темурнинг қизи Султон Баҳт бегим туғилган.

² Алибек Жониқурбоний – Шимолий Хурросоннинг нуфузли туркман бекларидан. Тавсифланётган бу воқеа 1362 йили юз берган. (–А.А.)

бизга хужум қилмоқчи бўлдилар. Амир Ҳусайннинг синглисини бир уйга яшириб қўйиб, ўша жамоага қарши отландим, туркманлар ичida Ҳожи Муҳаммад деган одам мени таниб қолди, «Ҳой, тўхтанглар, бу Амир Темур-ку!» деб, уларни урушдан қайтарди. Ўзи эса тиз уриб олдимга келди. Мен ҳам унинг кўнглини овлаб, бошига мандилимни¹ қўйдим. Сўнгра бу киши ўз оға-инилари билан менга мулоzим бўлди.

САЛТАНАТИМНИНГ ДАСТЛАБКИ ДАВРЛАРИДА ҚИЛГАН ТЎРТИНЧИ КЕНГАШИМ

Менга эргашганлар сони олтмиш отлиқقا етиб қолгандан кейин ўзимча ўйладим: «Агар келган манзилда тураверсаму, мабодо ерлик аҳоли менга қарши қўзғалиб, мўгулларга хабар бериб қўйса-чи? Яхшиси, бу ердан кетиб, эл оёғи етмаган ерга бориб жойлашсам, тез фурсатда атрофимга салтанатимнинг куч-қудрати бўла оладиган қўшин тўпланар». Шу фикрда у ердан кўчиб, Хуросон томонга юзландим. Йўл устида Мохон² ҳокими Муборакшоҳ, Санжарий юз отлиқ, аскари билан келиб, менга қўшилди ва яхши отлар тортиқ қилди. У ернинг жами саййидлари ва аҳолиси ҳам менга қўшилди. Ўша саҳрода отлиқ, яёв бўлиб икки юзга яқин киши ёнимга кирди. Шу пайт Муборакшоҳ, саййид Ҳасан ва саййид Зиёуддин менга арз қилдилар: «Бу саҳрода туравериш (қўшин) тарқаб кетишига боис бўлур, бирор томонга юриб, бирон вилоятни эгаллашмиз керак». Мен ўз-ўзим билан кенгашиб, сўнг уларга айтдим: «Хотирамга бир фикр келди. Самар-

¹ Мандил – бош кийими, дўппи, кулоҳ, салла; ҳукмдорларда меҳри тушган бирон кимсага бош кийими, камари ёки чопонини тақдим этиш орқали ўз миннатдорчилиги, ҳурмат-эътиборини билдириш одати бўлган.

² Мохон – Марв шаҳри яқинидаги қишлок.

қанд тарафга борайлик. Сизларни (вақтинча) Бухоро атрофидаги жойларга тарқатиб тураман, ўзим эса Самарқанд теварагига бориб, эл-улус орасига кираман ва улар билан иттифоқ тузаман. Етарли лашкар тўплаб, сизларни чақириб оламан. Кейин Жета ва Илёс Ҳожа лашкарига қарши жангта отланиб Мовароуннаҳр мамлакатини қўлга киритамиз».

Уларнинг ҳаммаси менинг бу кенгаш ва тадбиримни тўғри деб топдилар. Сўнгра юришга фотиҳа ўқиб, йўлга тушдим. Икки юз одамимни Бухоро атрофлари га тарқатдим. Амир Ҳусайннинг синглиси Ўлжай Туркон оқани ҳам яширинча ўша ерда қолдирдим ва ўзим Самарқанд томон йўл олдим. Йўлда Тамука Қавчин¹ ўн беш отлиғи билан менга қўшилди. Сиримни унга айтиб, Муборакшоҳ олдига юбордим. Ўзим яширинча улус оралаб, икки мингта яқин кишини иттифоқдош қилдим. Самарқанд узра салтанат байроғини кўтаргудек бўлсам, улар ёрдамга келадиган бўлдилар.

Тунда пинҳона Самарқандга кирдим ва опам Кутлуг Туркон оқанинг уйига бориб жойлашдим. Кечаю кундуз фикр оғушида чора-тадбир изладим. Шу тариқа қирқ саккиз кун яшириниб ётдим. Охири шаҳарликлардан биттаси менинг бу ерга келганимни пайқаб қолди. Сирим очилишига оз қолганда, ночор, кечаси бирга келган эллик отлиқ билан Самарқанддан чиқиб, яна Хоразм томон йўл олдим.

Мен билан бир тўп пиёда кишилар ҳам бор эди. Йўлда туркманларга қарашли йилқидан бир нечта отни қўлга киридим ва пиёдаларимни уларга миндиридим.

(Кўп вақт) йўл юриб Амударё бўйидаги Ачиғи деган ўнқир-чўнқир ерга келиб тушдик. Шу ерга келганимда, Бухоро теварагида қолдирган ҳарам аҳли, Муборакшоҳ, Сайид Ҳасан ва бошқа жамоа ҳам етиб келиб, менга қўшилдилар. Темур Ҳожа Ўғлон, Баҳром

¹ Қавчин – нуфузли туркий қабилалардан бирининг номи.

Жалойир ҳам ўзларига қарашли күшин билан келиб, менга мулозим бўлдилар. (Шу тариқа), мингта яқин отлиқ аскар атрофимга жамланди. Шу ерда кенгаш қилиб, Бохтарзамин¹ билан Қандаҳор² томонларга равона бўлишга ва у ерларни тасарруфимга киритишга қарор қилдим.

ХУРУЖ КУНЛАРИ ҚИЛГАН БЕШИНЧИ КЕНГАШИМ

Бохтарзамин ва Қандаҳор томон кетаётиб, Ҳирманд³ дарёсининг бўйига етганимда тўхтаб бир юрг⁴ ясаттирдим. Аскарларимни дам олдириш учун бир неча кун ўша дарё бўйида турдим. Шу вақт Гармсир⁵ вилоятининг аҳолиси билан сипоҳидан қарийб минг отлиқ турк ва тожик ҳам менга (келиб) қўшилди. Шу тариқа Гармсир вилояти менинг тасарруфимга кириди.

Шунда Сейистонга⁶ турктоз қилишга қарор қилдим. Бу хабар Сейистон волийсига етгач, элчи орқали совға-саломлар юбориб, мендан ёрдам сўради: «Душманларим менга зулм қилиб, қўлимдан етти қалъамни тортиб олдилар. Агар мендан душман қўлини қисқа қилсалар, аскарларига олти ойлик озиқ-овқат етказиб берардим».

¹ Бохтарзамин – қадимги Бақтра; ўрта асрларда Балх ва унга ёндош ерлар.

² Қандаҳор – ҳозирги Афғонистоннинг жанубидаги қадимий ва катта шаҳарлардан.

³ Ҳирманд – ҳозирги Афғонистоннинг жанубидаги Ҳирманд дарёси.

⁴ Юрг – бу ерда қароргоҳ маъносида.

⁵ Гармсир (форсча – иссиқ ўлка) – Сейистон ва Балужистоннинг туашу ерлари. (–А.А.)

⁶ Сейистон – ҳозирги Эроннинг жануби-шарқида ва Афғонистоннинг жануби-ғарбида жойлашган ўлка. 1872 иили Эрон ва Афғонистон орасида бўлинган. Ҳирманд дарёсигача бўлган қисми Эронга, ундан шарқи Афғонистонга ўтган.

Ўзимча кенгашиб кўриб, Сейистон томонга лашкар тортишни маъқул топдим. Душманлар эгаллаб олган етти қалъадан бештасини куч ва қаҳр билан олганимни кўриб, Сейистон волийсинг юрагига қўрқув тушди ва кечаги душманларини энди ўзига дўст тутиб, ўзаро бундай кенгаш қилдилар: «Агар Амир Темур бу ерларда туриб қолар экан, Сейистон мулки қўлимиздан кетиши аниқдир», дейишиб, бутун Сейистоннинг сипоҳи ва раияти барчаси бирлашиб, менинг устимга бостириб келдилар.

Сейистон волийси ваъдасига вафо қилмагани учун иложсиз қолиб, уларга қарши жанг жадалга киришдим. Шу пайт бир ўқ келиб тирсагимга қадалди, яна бир ўқ оёғимга тегиб яралади¹. (Шундай бўлса ҳам) охири улар устидан ғалаба қозондим. (Лекин) ўша мамлакатнинг об-ҳавосини мизожимга мувофиқ кўрмай, у ердан кўчиб, яна Гармсирга бордим. Ўша вилоятда яраларим биттунча икки ой туриб қолдим.

ХУРУЖ ВАҚТИДА ҚИЛГАН ОЛТИНЧИ КЕНГАШИМ

У шундан иборатки, Гармсир тасарруфимга ўтиб, яраларим тузалгач, Балх² сарҳадидаги тогларда туриб, ўша ерда қўшин тўплаб, Мовароуннаҳр мулкини забт этиш учун юриш қилмоқчи бўлдим. Кенгаш шунга тўхтагач, бу ердан отланиб чиқиб (қарасам), мен билан фақат қирқ отлиқ кишигини қолган экан. Лекин уларнинг бариси аслзода, амирзода, насли пок йигитлар эди. Шундайин азаматлар бу оғир кунларда нима учундир мендек олтину молсиз, озиқ-овқатсиз бир

¹ Бу жанг 1362 йилда бўлган. Унда Амир Темур ўнг қўлининг тирсагидан ва ўнг оёғидан камон ўқи билан яраланган. Кейинчалик бунинг натижасида оқсоқланадиган бўлиб қолган.

² Балх – ҳозирги шимолий Афғонистонда, Мазори Шариф шаҳрининг ғарбидағи кўҳна шаҳар.

кишига ҳамроҳ бўлиб, итоат қилиб юрганлари учун Тангри таолога шукрлар айтдим. Ўзимча: «Оллоҳ таолонинг мен билан қиласарлик улуғ ишлари кўп бўлса керакким, ўзим каби йигитларни менга бўйсундирмиш», – деб ўйладим.

(Сўнг) Балх тоғларига қараб йўлга тушдим. Кетаётганимизда Йилдирим Қорачор нўён авлодидан бўлмиш Сиддиқ Барлосга дуч келдим. Мени излаб саргардон бўлиб юрган экан, ўн беш отлиғи билан келиб менга кўшилди. Унинг келганини яхшиликка йўйдим. Ўша кунлари ов гўштлари билан кун кечирмоқда эдик.

Шу зайдада илгарилаб борараканмиз, йироқдан тепа устида бир тўп кишининг қораси кўринди. Оддинга юрганимиз сари соатма-соат уларнинг сони ҳам ортиб борди. Тўхтадим. «Булар ким бўлди экан?» – деб уларнинг олдига қоровуллар¹ юбордим. Улар бориб: «Амир (Темур)нинг собиқ навкари Қозончи баҳодир экан ва Жета лашкаридан юз отлиқ билан ажralиб чиқиб, шундан бери амирни излаб, саргардон бўлиб юрган эмиш», – деган хабар олиб келдилар. (Буни эшитиб) ерга бош қўйиб Тангри таолога шукр қилдим. Дарҳол Қозончини ҳузуримга олиб келиш учун одам юбордим. У келгач, тиз уриб оёқларимни ўпди. Мен ҳам унинг кўнглини олиб, мандилимни бошига қўйдим. Сўнг бу ердан юриб Дарайи Арсаф² деган жойга келиб тушдим.

Эртасига отланиб, дарани айланга бошладим. Унинг ўртасида бағоят хушҳаво бир тепалик бор экан, ўша баландликка чиқдим. Лашкарлар ул тепаликни қуршаб жойлашдилар. Ўша кеча жума туни эди, тонг отгунча (худодан мадад сўраб) ухламай чиқдим. Тонг отгач, бомдод намозини ўтадим, сўнг қўлимни дуога оч-

¹ Қоровул – хон ўрдасини қўриқловчи ҳарбий бўлинма. Кўшиннинг маркази, қанотлари, илфор ва (ўғруқни) қўриқлаб борувчи ёки кўшиннинг олдида борувчи хабарчи маҳсус ҳарбий гурух.

² Дарайи Арсаф – Балх тоғлари ичида жойлашган дара.

ган эдим, кўзларим ёшланиб, юрагим бўшаши, Тангри таолога ёлвориб, мени бу сарсонликдан қутқарини тиладим. Дуо тамом бўлганича ҳам йўқ эдик, узоқдан бир тўп одам кўринди. Улар тепаликни ёнлаб ўтиб кетмоқда эдилар. Отланиб, уларнинг кимлигини билиш мақсадида орқаларидан бордим. (Қарасам) ҳаммаси бўлиб етмиш отлиқ экан. Улардан сўрадим:

– Баҳодирлар, ким бўласизлар?

Улар жавоб қилдилар:

– Амир Темурнинг навкарларимиз. Уни излаб топмай, кезиб юрибмиз.

Мен дедим:

– Мен ҳам амирнинг навкарларидан биридурмен. Юрингиз, сизларни унинг олдига бошлаб борайин.

Улардан бири отини чоптириб бориб гапимни ўз сардорларига етказибди, «Биз Амир Темурнинг ҳузурита олиб борағиган йўлбошловчини топдик», дебди.

Улар отларининг жиловини буриб, мени дарҳол ҳузурларига келтиришни буюрдилар. Улар уч фавж эканлар. Биринчи фавжнинг сардори – Туғлук Хожа Барлос, иккинчисиники – амир Сайфиғдин, учинчи-синики – Тутак баҳодир экан. Мени таниган заҳотлари ўзларидан кетаёзиб, отдан тушдилар. Тиз уриб, узангимни ўпдилар. Мен ҳам отдан тушиб, ҳар бири билан қуҷоқлашиб қўришдим. Мандилимни Туғлук Хожанинг бошига қўйдим. Жуда нозик ишланган, олтин билан зийнатланган камаримни эса амир Сайфиғдиннинг белига боғладим. Чопонимни Тутак баҳодирга кийдиридим. Уларнинг кўнгли юмшаб, бағоят таъсирандилар. Мен ҳам қаттиқ таъсирандим. Пайтида жамоат билан намозни адо этдик. Сўнгра отланиб, қароргоҳга бориб тушдик, мажлис қуриб, тўй бердик. Эртаси куни Шер Баҳром¹ ҳам келди. У илгари ёшлиқ қилиб, мендан ажраб, Ҳиндистон заминини ҳавас

¹ Шер Баҳром – Хутталон амири. (– А.А.)



қилиб кетиб қолган эди. Ўз қилмишидан пушаймон бўлиб, мендан кечирим сўради. Мен уни қучоғимга олдим ва узрини қабул этдим. Шу қадар унга меҳрибонлик кўрсатдимки, у хижолатдан бутунлай фориф бўлди.

ХУРУЖ КУНЛАРИ ҚИЛГАН ЕТТИНЧИ КЕНГАШИМ

Лашқаримнинг сонини ҳисоблаб кўрсам, ҳаммаси бўлиб уч юз ўн уч отлиқ экан. Ўзимча кенгаш қилиб бирон қалъани қўлга киритиб, жойлашишга қарор бердим. Дастваб Алачу қалъасини эгаллаб олишга жазм қилдим. Илёс Хожа томонидан Менгли Буға Сулдуз¹ бу қалъага қўйилган экан. У ерни озиқ-овқат ва юклар сақланадиган жойга айлантироқчи бўлдим. Шу мақсадда Алачу қалъасига йўл олдим. Шер Баҳром ва (Менгли Буға Сулдуз) ўрталарида қадимдан ошнолик бўлганидан, у: «Мен қалъага бориб, уни ўзимизга эл қилсан», – деб рухсат сўради. Бироқ Шер Баҳром қалъа атрофига етиб боргач, менга: «Менгли Буганинг сўзига қараганда, Илёс Хожа қалъани унга ишониб топширган, шундай бўлгач, энди Амир Темурга эл тутиниб, қалъани унга топширса, мардлик ва мурувватдан узоқ иш бўлур эмиш. (Шунинг учун) қалъани бизга топширишдан бош тортди», – деган хабар келди. Лекин тақдир экан. У менинг қўшин тортиб келаёттанимдан хабар топгач, кўнглига ваҳима тушиб, қалъани ташлаб қочди. Илгари менинг хизматимда мулоҳимлик қилган, Дўлон Жавун қавмидан уч юз йигит у (Менгли Буға) билан шу қалъада эди, келиб менга қўшилдилар. (Бу ердан кўчиб) Дарайи Суф² деган жойга келдим. Ўша вақтда Туман баҳодирнинг ўғли Амлас Балх шаҳри атрофида талончилик билан машғул эди.

¹ Сулдуз – нуфузли мўғул қавмларидан бирининг номи.

² Дарайи Суф – Балхни Кобул билан боғловчи йўл ўтган жой.

Довруғимни эшитиб, икки юз отлиғи билан ҳузуримга бош эгиб келди. Мен унга адаб бериб, кўнглини кўтардим.

Шу ердалик чогимда, Тамука баҳодирга уч отлиқ қўшиб, Термиз дарёсидан¹ кечиб ўтиб, Жета лашқари, унинг аҳволи ва режалари тўгрисида хабар топиб келтиришни буюрдим. Тамука тўрт кундан кейин шуни хабар қилдики, Жета лашқари Термиз вилоятига келган ва халқини талаб, уруш-талаш билан машғул эмиш. Буни эшитиб, Дарагез² деган жойга бориб туришни лозим кўрдим. Кейинроқ қулай фурсат топиб, Жета лашқари устига тўсатдан бостириб боришни ўйладим. Дарагезга келгач, Жайхун дарёси бўйида жойлашган Элчи Буға майдонига келиб тушдим. Илёс Хожа Дарагезга келганим ҳақида хабар топиши биланоқ қўшинидан бир неча фавжни менга қарши урушга ҳозирлади.

Шу орада Жета лашқарида от сурган амир Сулаймон Барлос, амир Мусо Барлос³, амир Жаку Барлос, амир Жалолиддин, амир Ҳиндука Барлос Жета амирларидан юз ўгириб, ўз аскарлари билан эски Термизга келиб тушганлари ҳақида хабар келтирдилар. Улар менинг ҳузуримга юборган Тўлан Буға етиб келиб, мулоҳиматимда бўлди ҳамда (номлари юқорида тилга олинган) амирлар минг отлиқ аскари билан менга қўшилмоқчи ва мулоҳим бўлмоқчи эканликларини маълум қилди. Мен эрсам уларнинг келишини ишимнинг ўнгланишидан даракчи деб тушундим. Улар менга тунда Жета лашқари устига кутилмаган босқин қилишни маслаҳат бердилар. Отланиб йўлга чиқсан ҳам эдикки, Жета лашқари етиб келганини билдиришди. Мен

¹ Термиз дарёси – Амударёнинг ўрта асрлардаги номларидан.

² Дарагез (Дарайи-гез) – Балхнинг жанубий тарафида, ундан таҳминан тўрт фарсаҳ масофада, Балхоб дарёси бўйлаб жойлашган тоғ дараси.

³ Амир Мусо асли Тойживут қабиласидан бўлган. (–А.А.)



ўз қўшиларимни сафга тизиб, душман қархисига бориб турдим. Икки лашкар ўртасида сув бор эди.

Ғанимларимни чучук сўз, ширин ҳикоятим билан ўз томонимга оғдириб олмоқчи ва улар вужудидаги ёндирувчи (разаб) ўтини тўғри тадбир суви билан ўчирмоқни маслаҳат кўрдим. Шу тарзда уларни ром қилмоқчи бўлдим ва Жета лашкарининг сардори амир Абу Саъидга (кўп яхши) сўзлар айтдим. У айтган гапларимни маъқуллади. Бироқ бошқа амирлар унга қарши чиқишиб, уруш қилиш тарафдори бўлдилар. (Буни кўргач) менинг ҳам шиддат ўтим алангаланиб, лашкаримни сафга тиздим.

ЖЕТА ЛАШКАРИНИ СИНДИРИШ МАҚСАДИДА ҚИЛГАН САККИЗИНЧИ КЕНГАШИМ

Ўз-ўзимга дедим: «Агар Жета лашкари билан жанг қилсам, улар кўп сонли бўлгани туфайли мабодо менинг лашкаримга зарар етса-чи?» Лекин шу заҳотиёқ ғайратим жўшди: «Салтанат даъво қилиб хуруж қилган экансан, салтанат шаъни ва мартабасига лойик иш шуки, жангта кириб, ё зафар қучиб голиб бўлгайсан, ёхуд ўлдирилгайсан», – дедим (ўзимга-ўзим).

Шундай азимат қилганимда ғанимлар уч фавжга бўлинниб, урушталаб бўлиб турганларини кўрдим. Мен ўз лашкаримни етти фавжга бўлдим. Етти фавжимни кетма-кет душман устига ташлаб туришни маслаҳат кўрдим. Жангу жадал ўти баланд кўтарилигач, амр қилдимки, ҳировул¹ фавжлари пистирмадан туриб ғанимга ўқ ёғдирсин. Шиқовул² ва чоповул³ фавжларига эса

¹ Ҳировул – лашкарнинг илфор қисми кетидан борувчи бўлинма; лашкарнинг марказ, қанотлари олдида турувчи олд қўшинлар.

² Шиқовул(шиғовул) – лашкар қанотларини қўриқлаб турувчи маҳсус бўлинма. (–А.А.)

³ Чоповул – ҳарбий юришлар пайтида ва қамал жанглари вақтида теварак-атрофдаги қишлоқларга тўсатдан босқин уюштирувчи ҳарбий қисм. (–А.А.)

ғанимнинг чап қўлига ҳужум қилишни буордим. Ўзим бўлса жавонгор¹ ва баронгор² фавжлари билан ҳаракатга келдим. Биринчи ва иккинчи ҳамланинг ўзидаёқ Жета лашкари амир ул-умароси Абу Саъиднинг фавжини енгдим. Шу пайт Ҳайдар Андҳудий ва Ментли Буға жанг майдонига тушдилар. Уларга қарши мен ўзим юзма-юз чиқдим ва биринчи ҳамладаёқ ҳар иккаласини ҳам чекинтирдим. Жетанинг тамоми лашкари енгилиб, сочилиб кетди.

САЛТАНАТНИ ТИКЛАШ ЙЎЛИДАГИ ТЎҚҚИЗИНЧИ КЕНГАШИМ

Жета лашкари амирлари устидан ғалаба қозонганимдан кейин, салтанат даъвоси билан хуруж этганим ҳақида Туронзаминда хабар тарқалди. Шунда мен адолат билан хукмронлик қилишга азму жазм этдим. Салтанатимни мустаҳкамлаш учун, тўплаган хазинамдаги нақд пуллар ва (қимматбаҳо) буюмларни сипоҳга тақсимлаб беришга ва даставвал Қаҳлақа қалъасини³ олишга қарор қилдим.


Лашкарга озуқа бериб, сўнг уларни сафга тиздим ва Жайҳун дарёси бўйига келиб тушдим. Термиз кечувидан ўтиб, Қаҳлақа қалъаси тарафига қоровуллар жўнатдим. Ўзим Жайҳун бўйида бир неча кун турдим ва қоровуллар олиб келадиган хабарни сабрсизлик билан кутдим.

Менинг келганим ҳақида хабар Илёс Хожага етгач, Беккичикнинг иниси Алачун баҳодирни катта қўшин билан устимга юборди. Қоровулларим ғафлат

¹ Жавонгор – лашкарнинг сўл қаноти.

² Баронгор – лашкарнинг ўнг қаноти.

³ Қаҳлақа қалъаси (Дарбанди Оҳанин) – Бойсундан (Сурхондарё вилояти) гарбда Саримас тизмасидаги тор дара, форсча «Дарбанди Оҳанин» (Темир дарвоза), қадимги туркий тида: «Темир қапуг» («қапуг» – дарвоза), арабча «Боб ул-ҳадид» (Темир дарвоза), мўгулча «Қаҳлақа» дейилган.



үйқусида қолган эканлар, уларнинг ёнидан ўтиб, билдирмай, тун қоронгусида тўсатдан устимга ҳужум қилиб келдилар.

Қароргоҳим уч томони сув билан ўралган ярим оролда жойлашганди. Ярим орол ташқарисида қурилган бир неча чодир Жета лашкари томонидан талон-торож қилинди. Омон қолган аскарлар ярим оролга кўчиб ўтдилар. Мен бўлсан жангта шайланиб, тезлик билан ярим оролнинг кириш қисмига бордим. Душман мендан қўрққани сабабли урушга ботиниб киролмади. Ўн кунгача шу ярим оролда турдим. Сўнг у ердан чиқиб, сув бўйларида олачуклар¹ тикириб, Жета лашкарининг қаршисида бир ой давомида кузатиб турдим. Охир фанимни қўркув босиб, орқасига қайтиб кетди. Мен сувдан ўтиб, уларнинг манзилига тушдим ва душман орқасидан таъкиб қилиш учун бир фавж аскар жўнатдим.

САЛТАНАТИМНИ МУСТАҲКАМЛАШ УЧУН ҚИЛГАН ЎНИНЧИ КЕНГАШИМ

Жета лашкарини мағлубиятга учраттанимдан кейин, Бадахшон вилоятига бориб, уни эгаллашга, (бу билан) салтанат ишларига ривож беришга қарор қилдим. (Шу ниятда) дарё бўйидан кўчиб Хулм² деган жойга тушдим.

(Шу ерда) амир Қазағаннинг³ набираси ва қайноғам бўлмиш амир Ҳусайн билан учрашдим. Унинг шарафига зиёфат бердим. Сўнгра у билан кенгашиб, Бадахшонга боришга қарор қилдим.

¹ Олачук — шу номли шолча туридан ясалган капа ёки чодир.

² Хулм — Афғонистоннинг шимолий қисмидаги шаҳар; ҳозир шу номдаги шаҳарча, шимол-жануб ва шарқ-ғарб йўналишидаги халқаро савдо йўллари чорраҳасида жойлашган.

³ Амир Қазаған (1346 – 1358) — Чигатой улусининг қудратли амири, 1346 йили Қарши яқинида бўлган жангда Қазанхонни енгиб, ҳокимиятни қўлга олган. 1358 йили фитна курбони бўлиб, ов пайтида ўлдирилган.

Қундузга¹ етиб боргач, бурулдай² элининг сардорлари менга келиб қўшилмагунларича ўша ерда кутиб турдим. Келишгач, уларнинг ҳар бирига фахрли хильатлар кийгизиб, кўнгилларини овладим.

Қўшинимнинг жангта ҳозирлиги ҳақидаги хабар Бадахшон шоҳларига еттач, урушга тайёргарлик кўра бошлидилар. Ўзимча мушоҳада қилиб, душман лашкар тўплаб улгурмасдан бурун этчилик, уддабуронлик билан зарба бериб, уларни тўзитиб юбормоқчи бўлдим. (Шунинг учун) юриш қилиб, Таллиқонга³ етиб келдим.

Таллиқонга келганимдан Бадахшон шоҳлари хабардор бўлгач, тинч йўл тутиб, менга мулоzим бўлишни ихтиёр қилдилар. Кўллаган тадбиримдан кўнглим тўлди ва хато қилмаганигимни англадим. Менинг салтанатим бутун Бадахшон вилоятига ёйилди. Бадахшон сипоҳларининг аксарияти тамом хизматимда бўлишни ихтиёр этдилар.

САЛТАНАТИМГА РИВОЖ БЕРИШ УЧУН ҚИЛГАН ЎН БИРИНЧИ КЕНГАШИМ

Бадахшон шоҳлари менинг итоатимга киргач, Хутталонга⁴ қараб юрдим. Бу мамлакатта келсам, қайноғам амир Ҳусайннинг қўрслигидан Пўлод Буға ва Шер Баҳром ундан ажралиб, ўз улусига кетиб қолишган эканлар.

¹ Қундуз — Афғонистоннинг шимолий қисмидаги жойлашган қадими шаҳар (қадимги номи Валволиж), маъмурӣ-сиёсий марказ. Ҳозир шу номдаги шаҳарча.

² Бурулдай — бу ерда жалойир қабиласига қарашли эл ҳақида сўз юритилмоқда.

³ Таллиқон (Тайхон) — ҳозирги Афғонистоннинг шимолидаги қадимги шаҳар. Ўтмишда Тоҳаристон давлатининг пойтахти. Ўрта асрларда яна иккита Таллиқон мавжуд бўлган: улардан бири — Ҳиротдан ғарброқда, иккинчиси — Каспийдан жануби-ғарбда жойлашган эди.

⁴ Хутталон — Панж дарёсининг ўнг соҳилидаги вилоят, ҳозир Тожикистоннинг Ҳатлон вилояти. Номи қадимги араб ва форс манбаларида Хутталон ёки Хутталон шакларида ёзилган.



Бу ердан күчіб, Даشتі күләнк¹ жилгасига бориб түшдім, (у ердан) Жета ва Илөс Хожа лашкарлари ахволини билиб келиш учун айғоқчилар жұнатдым. Улар ўн кундан кейин хабар келтирдиларким, Жета амирлари: биринчиси – Куч Темур Беккичик ўғли, иккінчиси – Темур Нұбқон, учинчиси Сариқ баһодір, түртінчиси – Шингум, бешінчиси – Ҳожибекнің иниси Тұғлук, Хожа йигірма мінг отлиқ аскар билан Халотий² ва Пули сангин³ оралиғида турған әмишлар.

Улар мен турған ер ва лашкарим қай ахвозда экан-лигини билиб келиш учун олдымга элчи жұнатдилар. (Элчини chalғitiш мақсадида) лашкаримни иккі марта қайта-қайта унинг олдидан үтказтирудим, сұнг элчига рухсат бердім.

(Кейин) кенгашиб, унинг ортидан кетма-кет (құшин тортиб) боришига қарор қылдым. Лекин лашкарим бу борада мен билан ҳамжиҳат бўлмади. Лашкаримни атрофимга бирлаштироқ учун баъзиларига муруват, меҳрибонлик қылдим; бошқалари билан келишишга интилдім, яна бир гурухини эса молу дунё билан ўзимга қаратиб олмоқчи бўлдим. Яхши сўз, аҳду паймон ва ваъдалар билан қолганларининг кўнглига тасалли бердім.

Шу пайт хабар келдіким, илгари менинг навкарларим бўлган Тұғлук Сулдуз ва Кайхусрав Жетанинг олти мінг отлиқ аскарига бошчилик қилиб, менинг устимга келмоқда әмишлар. Бу хабар лашкарим ўртасида тарқалгач, уларнинг иттифоқсизлиги янада кучайиб, саросимага тушиб қолдилар. Лекин амир Жаку, Ийгу Темур, амир Сулаймон ва амир Жалолиддин менинг ёнимда қолдилар.

¹ Даشتі күләнк – Хутталон яқинидаги мавзе.

² Халотий – аслида Ҳулъату бўлса керак. Ҳисор вилоятига қарашли мавзе.

³ Пули сангин – лугавий маъноси «тош кўприк», Ҳисор водий-сида Сурхоб дарёсининг irmоги Оби ҳингую дарёсида қурилган.

ЛАШКАРИМНИ ИТТИФОҚЦА КЕЛТИРИШ УЧУН ҚИЛГАН ЎН ИККИНЧИ КЕНГАШИМ

Амир Жаку, Ийгу Темур, амир Сулаймон, амир Жалолиддинларни хилватроқ ерга чорладим ва улар билан келишиб, ўзимга янада яқин тутдым, «Давлаттімга шерик бўласизлар», дедим. Бу билан (уларнинг дилида) ўзларига ишонч ва менга хизмат қилиш учун қатъият туйғуларини уйғотдим. Шунга ўхшаш, мен билан иттифоқи бузилган тоифадаги бошқа амирларни ҳам бирма-бир холи жойга чорлаб, ҳар қайсиси билан алоҳида гаплашдим. Булардан мол-дунёга ҳирс қўйган очкўз ва тамагирларига мол-ашё ваъда қилдим, мансаб-марtabага, мамлакатларни бошқаришга қўз тиккан амалпарамастларга қўлга киритган мамлакатлар, вилоятлардан бирининг ҳокимлигини бердим.

Уларнинг ҳаммасини умид ва қўрқинч орасида сақладим. Ҳар бирига биттадан ноиб ва кутвол¹ тайинладим. Қолган сипоҳийларни ҳам емак-ичмак, кийим-кечак умиди, ширин сўз, очиқ юз билан ўзимга ром этдим. Бир хизматини ўн баробар қилиб тақдирлаб, дилларини хушнуд айладим. Натижада мени қўллаб-куватлаганлар ҳам, тескари бўлган мунофиқлар ҳам барчаси атрофимда бирлашди. Ҳар ишда бирлик-иттифоқлиқни маҳкам тутишга, амримдан чиқмасликка ваъда бериб, мен учун мол-жонларини аямай, майдонда жонбозлик кўрсатишга аҳд қылдилар.

Лашкардан кўнглим тинчигач, Илөс Хожага қарши жанғта ҳозирлик кўра бошладим. Уни даф этиш ва (у билан) қай йўсунда уруш олиб боришим ҳақида кенгашибдим, ғанимлар хабар топиб улгурмасдан, чапдастлик билан уларнинг устига қўққисдан босқин қилишга қарор бердим. Бу хусусда Қуръони мажиддан фол

¹ Кутвол – қалъя бошлиғи.

очиб қарасам, ушбу ояти карима чиқди: «Қанчадан-қанча кичкина гурухлар Оллоҳнинг изни билан катта гурухлар устидан ғалаба қозонган»¹.

Ушбу башоратни топганимдан кейин лашкаримни тартибга келтирдим. Уни етти фавжга бўлиб, йўлга тушдим. Тонг ёриша бошлагандা (Илёс Хожанинг) ҳировули бўлмиш Туғлуқ Сулдуз ва Кайхусравга етишдим. Икки ҳамла билан уларни енгдим ва (уларни) Илёс Хожа жойлашган Пули сангингача қувиб бордим. Оқшом тушгач, етган еримизда тўхтадик. Жанг майдони совиб қолмасдан, қизигида Илёс Хожанинг қариб ўттиз минглик лашкари устига тўсатдан босқин қилишга қарор қилдим. Бордию (юришни) тўхтатсам ва бирон кор-ҳол юз берса, унинг иложини топиш учун (ўзгаларнинг) кўмагига муҳтож бўлиб қолишим мумкинлиги тўғрисида ўй сурдим. Орқадан амир Ҳусайн (лашкари билан) мени қўллаб-қувватлаб келаёттан эди, бироқ мен ўзимни унинг ёрдамига муҳтож бўлиб қолиш даражасига етказмадим. Тўғри чораю тадбир ишлатиб, Илёс Хожа лашкарини енгдим.

ЖЕТА ВА ИЛЁС ХОЖА ЛАШКАРИГА ШИКАСТ ЕТКАЗИШ ҲАҚИДА ҚИЛГАН ЎН УЧИНЧИ КЕНГАШИМ

Даставвал Илёс Хожа лашкарини бир жойга боғланган ҳолда ушлаб туриш учун зафарли фавжларимдан илгорини олдинга ташлашга қарор қилдим. Шу мақсадда амир Муайийид Арлот², Учқора баҳодир, амир Мусо бошчилигида икки минг отлиқ аскаримни Илёс Хожа қаршисидаги кўприк бошига жойлаштирдим. Ўзим эсам беш минг отлиқ билан дарёдан ўтиб, Илёс Хожа лашкари тепасидаги тоққа чиқиб ўрнашдим ва кечаси кўп жойга гулхан ёқишини буордим. Жета си-

¹ Қуръони карим, Бақара сураси, 249-оят.

² Арлот – туркий қабилалардан бирининг номи.

поҳлари тоғдаги беҳисоб гулханлару, Пули сантин бошида турган лашкаримнинг кўплигини кўриб, қўрқувдан саросимага тушиб қолдилар. Ўша тунни Илёс Хожа қўшини «Жангга ҳозирлан!» буйргуини кутиб (бедорликда) ўтказди. Мен туни билан тоғ устида ухламай Тангри таоло даргоҳига илтижо қилиб, ундан ожизу муҳтож бандасига мадад беришини тилаш ва пайғамбаримиз Муҳаммад саллоллоҳу алайҳи васаллам, унинг яқинлари ва саҳобаларига салавот айтиш билан машғул бўлдим. Ярим уйқу ва ярим уйғоқлик орасида қулоғимга аллакимнинг: «Темур, фатҳу зафар сенга ёр бўлади!» – деган овози эшитилди. Тонг отиб, ёруғ тушгач, намозни жамоат билан ўқидим. Шу пайт қарасам, Илёс Хожа ўз амирлари билан отланиб, фавж-фавж бўлиб кетаётиди. Амирларим ва сипоҳийларим уларнинг кетидан қувиш қасдида мендан буйруқ беришимни илтимос қилдилар. Мен ўйлаб туриб, тоғанимнинг мақсади маълум бўлгунча таъқиб этишни бир оз кечиктиришни маслаҳат қўрдим. (Тахминан) тўрт фарсанг ерга бориб тўхтаганларидан кейин, уларнинг мақсадларини тушундим. Ниятлари – бизни тоғдан тушириб, яланг ерда жанг қилиш экан.

(Бир неча кун илгари) мен шикаст етказган ҳировул амирлари ҳам (Илёс Хожа) қошига қочиб борганда Илёс Хожа уларни тоза койиб берган экан.

Уларнинг ниятларидан хабардор бўлиб, тоғдан тушмаётганимни кўришгач, орқаларига қайтиб, менга ҳужум қилишга мажбур бўлдилар. Мен фавжларимни тоғ этагида сафга тизиб, жангта киришни мўлжалладим. Жета лашкари етиб келиб, нима қилишини билмай ҳайрон турганда, баҳодирларимга ёв устига ёмғирдек ўқ ёғдиришни буордим. Душманнинг кўпини ярадор қилдилар. Кеч кириб қоронғу тушганда, (ғанимларим) қўлларидан бир нима келмаслигини кўришгач, тоғ этагини гир айлантириб жойлашдилар. Ўша кеч лашкаримни тўрт фавжга ажратиб, ўзим бош бўлиб,

тунда ғаним устига тўсатдан босқин қилиш фикрига келдим. Менинг бу кенгашим амирларимнинг ҳам дилига ўтиргач, тонгта яқин отландим ва тун панасида тўрт томондан уларнинг устига ҳамла қилдим. Жета лашкари ўзини йифиб, тартибга келтиргунча баҳодир йигитларим уларни тўзитиб ташладилар. Чопқилашиш пайтида ҳар икки томондан жуда кўп аскар нобуд бўлди. Жета лашкари «ал-фирор»¹, «ал-фирор», дея чекиндилар. Мен Илёс Хожага етиб олиб, «Йўл бўлсин?» деб қичқирдим. Овозим Илёс Хожанинг қулоғига еттагч, у ғазаб билан лашкарига дўқ-пўписа қилди ва аскарлари ортларига қайтдилар. Кун кўтарилигунча лашкарларимиз ўртасида жанг чопқин давом этди. Садоқ-ўқдонларимиз бўшади. Ғаним лашкари чекина туриб жанг қиларкан, тўрт фарсанг узоқлиқдаги ўз қароргоҳига тўклилиб-сочилиб, шикастахол, базур етиб олди. Мен ҳам тизгин тортиб, орқаларидан бошқа кувламадим ва ўша атрофда қўндим.

Жета лашкари урушда енгилганига иқрор бўлганидан кейин иккинчи бор жанг қилишга ботинолмади. Мен эса сипоҳим билан Илёс Хожа қароргоҳини қуршаб олдим. Сўнг вақти-вақти билан уларга ҳужум қилдим. Тинкасини қуритдим. Охири чорасиз қолган Илёс Хожа Хўжанд сувидан ўтиб кетди. Мен ҳам уларни таъқиб қилиб ўтирмасдан фатҳу зафар билан Мовароуннахрга қайтдим.

(Шундан сўнг) салтанатимнинг мустақиллиги ва мустаҳкамлиги борасида кенгашлар ўтказдим. Кенгашларим ўзини шавкатли, буюк амир деб ҳисоблаган ва бошқа амирлардан ҳам улуғроқ билаётган амирларни итоат эттириб, бўйсундиришга қаратилганди. Биринчи навбатда Мовароуннахрда салтанат байробини кўтар-

¹ «Ал-фирор» (қочмоқ, маъносида) — Қуръони карим Аҳзоб сурасининг 16-оятига ишора. Оятда, хусусан, бундай дейилган: «(Эй Мұхаммад) айтинг: агар сизлар ўлиш ёки ўлдирилишдан қочсангизлар, бу қочиш сизларга (барибир) бирон фойда бермас...»

ган амир Қазағаннинг набираси амир Ҳусайнни давлатимга шерик деб атадим ва у билан муросаю мадора қилдим. Гарчи у ташқи кўринишидан менга дўстлик билдириса-да, аммо ичидан ҳамиша ҳасад ва нифоқ мақомида турди. (Чунки) ўзи Мовароуннахр салтанати таҳтига ўтиришни орзу этарди¹. Унга ишончим йўқлиги туфайли уни хожа Шамсицдин² мозорига бошлаб бориб, дўстлик изҳор қилиб қасам ичдим. У ҳам дўстликка хилоф бирон иш қилмаслик ҳақида аҳду паймон қилди.

(Амир Ҳусайн) шундан кейин яна уч бор Қуръони мажидни қўлига олиб, дўстлик бобида онт ичди. (Лекин) аҳдига вафо қилмагани учун охири менинг (жазойимга) гирифтор бўлди.

Амир Баён Сулдузнинг ўғли амир Шайх Мухаммад ўзини улуғ амир деб ҳисобларди. Унинг ҳам (кўнглини топиб), ўз томонимга оғдириб олдим ва етти қўшинга бошлиқ атаб, ўзимга муте ва мулоғим қилдим. Мазкур қўшинларнинг амирларидан ҳар қайсисига вилоят инъом этдим.

Мендан ажралиб, ўз улуси билан кетиб қолган Шер Баҳром ҳали ҳам менга бўйсунишни истамас эди. Уни ҳам ўзимга оғдириб олдим ва ҳузуримга чақиртирдим. У ўз улуси билан келиб, итоатда бўлажагини билдириди. Шер Баҳромни ўз мулоғимим этиб, бир вилоятни унга тортиқ қилдим.

Амир Ҳусайн билан орамиздаги қариндошлиқ ришталарига кўра унга турли мурувватлар кўрсатиб, муросаю мадора қилдим, лекин менга дўст бўлмади. Иш шу даражага бориб етдики, Балх ва Ҳисори Шодмон

¹ Амир Темур билан амир Ҳусайн 1365 йилгача иттифоқдош бўлишган. Лекин 1365 или «Лой жангига» давомида амир Ҳусайн ўз иттифоқчисини кўллаб-қувватламасдан, жанг майдонини ўзбошимчалик билан ташлаб чиқиб кетгандан бошлаб муносабатлари бутунлай бузилган. (— А.А.)

² Бу ерда Шамсицдин Кулол назардә тутилган.

вилоятларини мендан тортиб олди. Синглиси ҳарамимда бўлгани боис уни сиқувга олмадим. У билан муросаю мадора қилишга шунчалик интилдимки, ҳатто унинг амирларига ҳам бу таъсир этиб, менга бўйсундилар. Лекин амир Ҳусайн ҳамма вақт мени мағлуб этиш пайида бўлиб, макру фириб бериб келарди. Охирокибат у ҳақидаги кенгашим шу бўлдики, уни шамшир зарби билан муте қилишга қарор қилдим.

Туронзамин вилоятини забт этиб, ғанимлар¹ вужудининг хас-хашагидан тозалаганимдан кейин, баъзи улусларнинг амирлари менга итоат билан бош эгишни истамадилар ва ҳар бири ўз қабилалари олдида ҳеч кимдан қўрқмаслигини кўрсатмоқчи бўлгандай, кибру ҳавога берилилар. Амирларимдан баъзилари уларнинг ёнини олиб, менга: «Бу давлатга баримиз шерик бўлганимиздан кейин, уларни ҳам давлатта шерик деб билийлик», — дедилар. Лекин уларнинг гаплари менинг салтанат юритишмидаги ғайратимга таъсир қилмади. Ўз-ўзимча: «Худо битта, унинг шериги йўқдир. Шундай бўлгач, Оллоҳ, таолонинг муқаддас мулки — ер юзига эгалик қиласидиган подшоҳ, ҳам битта бўлиши керак», — деб ўйлар эдим.

Шу пайт (авлиёлардан ҳисобланган) Бобо Али Шоҳ, ҳузуримга келди ва: «Темурбек, Тангри таоло буюрганки, agar ерда ва кўкда икки худо бўлса, жаҳоннинг иши бузилур», — деди. Мен унинг сўзларида ҳидоят топдим. Куръони мажиддан фол очсан, ушбу қутлуғ оят чиқди: «Инна жаалнака халифатан фил арз», яъни «Биз сени ер юзига халифа қилдик»². Мен буни (истиқболнинг) хайрлик ва муборак фоллари қаторига киритдим. Ўзларини давлат шериги билиб, менга бўйсунишни истамаган амирларни турли тадбирлар ишлатиб, ўзимга итоат эттириш учун турли йўллар

¹ Илёс Ҳожанинг кўшини назарда тутилади. (—А.А.)

² Куръони карим, Сод сураси, 26-оят.

қидирдим. Энг аввал Амир Ҳожи Барлос олдига бориб, уни ўзимга иттифоқдош қилдим. Баён Сулдуз ўғли Шайх Муҳаммад¹ шароб ва майхўрликка муккасидан берилиб кетганди. Охири шароб унинг бўғзидан олди ва у олам билан видолашибди. Унинг вилоятини ўз тасаруфимга олдим. Амир Боязиц Жалойир Ҳўжанд вилоятининг ҳокими эди. (Дўстона) насиҳат айласам, унга таъсир қилмади. Оқибатда ўз улусининг одамлари ўзига қарши чиқиб, олдимга кишанлаб келтирдилар. Мен (үтган ишларни юзига солмай) унга илтифотлар кўрсатдим. Буни кўриб, ўзи (уятдан) шарманда бўлди.

Элчи Буга Сулдуз Балҳда ўз салтанати туғини кўтарган эди. Бобоси Амир Қазаган таҳти шу ерда бўлганилиги учун Балх таҳтига даъво қилаётган амир Ҳусайнни Элчи Бугага қарши қайрадим.

Муҳаммад Ҳожа Апардий найман аймогидан бўлиб, Шибирғонот² вилоятини босиб олиб, менга қарши исён туғини кўтарганди. Мен унга бошқа вилоят бериб, уни ўзимга содик навқар қилиб олдим. Бадахшон вилоятiga эгалик қилаётган Бадахшон шоҳлари эса менга қарши душманлик йўлини тутдилар. Уларнинг ҳар бири билан турли келишувлар қилдимки, бир-бирлари билан урушиб кетдилар. Охири менинг паноҳимга кириб (бўйсундилар).

Кайхусрав Хутгалон вилоятини ва Ўлжайту Апардий Арҳанг³ вилоятини тасарруфларида тутардилар. Кайхусравга Улжайту Апардийнинг вилоятини босиб

¹ Бу ерда тап ўтил эмас, ота амир Баён Сулдузининг ўзи ҳакида кетмоқда. (—А.А.)

² Шибирғонот — Балҳдан жануби-ғарбий тарафда жойлашган вилоят, бош шаҳри Шибирғон. (—А.А.)

³ Арҳанг — қадимги Тоҳаристон вилоятидаги шаҳар; Амударёнинг юқори оқимидан Таллиқоннинг шимоли-шарқидаги жой. XIV аср иккинчи ярмидан Арҳанг — Сарой деб номланган; таҳм. XVI асрдан бошлаб уни Имом (Ҳазрати Имом) деб ҳам атаганлар. Ҳозирги номи Имомсоҳиб, Панҷ дарёсининг чап соҳилида, Афғонистонда.

олиши учун мадад жўнатдим. У бориб Ўлжайту Апардийнинг вилоятини забт этди. Оқибатда Ўлжайту Апардий паноҳ излаб менинг хизматимга келди.

Амир Хизр Ясурий¹ ўз халқи – ясурийлар мадади билан Тотканд² вилоятини босиб олган эди. Кайхусрав билан Ўлжайту Апардийни бир-бири билан яраштирудим. Буларга ёрдамчи куч йўсинида бир тўда киши қўшдим. Икковлари бирлашиб, ясурийларга ҳужум қилиб, талон-торож этдилар. Амир Хизр (Ясурий) ожиз қолиб, менинг паноҳимга келди.

Шундай қилиб, Мовароуннаҳрни уруш-талащдан тинчитдим. Менинг қаҳрамон аскарларим тўла куч-қувватта кирди. Ҳар томонга барлос улусининг номи ва донғи тараалди. Менинг ҳимматим билан Чиратой қўшинлари ва туманларининг овозаси оламга ёйилди. Жами элу халқ, қўшунот ва тумонот ҳамда кўчманчилар менинг ҳукмронлигим остига ўтди. Бироқ Мовароуннаҳрдаги баъзи қалъалар (ҳамон) амир Ҳусайн қўлида эди, уларга менинг ҳукмим ўтмасди.

Амир Ҳусайн салтанатим азимати ва шон-шавкатининг кучайганини кўргач, унда ҳасад томирлари (қаттиқроқ) ура бошлади. Қасам билан қилган аҳд-паймонларини бузиб, менга қарши исён туғини кўтарди. Мен унинг олдига кўп марта (лутф-марҳаматлар кўрсатиб) бордим, у бўлса асло қошимга келмади. Бунинг устига сиртидан такаллуфлар билдириб, аслида ҳийланайранг ишлатиб, мендан Қарши қалъасини олиб қўйди. Қарши қалъасини қўриқлаб туриш учун қўрғон-

¹ Хизр Ясурий – Чингизхон лашкарининг сўл қанотига қўмон-донлик қилган амир Ясурнинг авлодларидан. Ясурий Вахш ва Талиқонни босиб олишда иштирок этган ва эли ўша юртларда ўтириб қолган. Хизр Ясурий эса аввалига Амир Темурнинг ишонган яқин амирларидан ҳисобланган. Бироқ кейинчалик амир Ҳусайн томонида туриб жанг қилган ва шу жанглардан бирида ўлдирилган.

² Тотканг – ўрта асрларда Самарқанд гарбидаги шу номли шаҳарча ва вилоят, ҳозир Самарқанддан 25 км ча гарбдаги шу номли қишлоқ. (– А.А.)

беги амир Мусо бошчилигида етти минг отлиқ, аскар тайинлади. Кейинроқ у ерга яна қўшимча беш минг отлиқ аскар юборди. Бу билан кифояланмай, мени ўлдирмоқчи бўлди. Мендаги салтанат гайрати тугёнга келиб, Қарши қалъасини ундан тортиб олишга ундади. Баъзи амирларим у ерга юриш қилиб, қалъани жанг билан қўлга киритишни менга маслаҳат бердилар. Қарши қалъасини олиш режаларини тузга бошладим. Улар айтгандай уруш билан олсанам, бунинг хатарли томонлари кўплиги кўнглимдан ўтди. Ўзимча: «Мабодо қалъани жанг билан олмоқчи бўлсанам, фаним лашкарининг ёмон қўзидан қўшинимга зарар етса-чи?» – деб ўйладим. Сўнгра жанг қилиш фикридан вақтинча воз кечдим ва бошқа тадбирни қўллашга киришдим. Хурросон томонга юзланиб, бу билан Қарши қалъаси бекларининг хотирини жам қилмоқчи бўлдим. Кейин эса лашкарим билан (яширинча) орқага қайтиб, тунда тўсатдан қалъага ҳужум қилиб, у ерни босиб олишни режаладим. Хуллас, бу ердан кўчиб, Хурросонга қараб йўлга тушдим.

Амуй сувидан¹ кечиб ўтганимда, Хурросон томондан Қаршига келаётган карвонга дуч келдим. Карвон бошлиғи менга совғалар тақдим этди. Мен ундан Хурросон амирларининг ҳол-аҳволини суриштирдим ва Хурросон вилоятияга бораётганлигимни айтдим, кейин кетишлирига ижозат бердим. (Лекин) карвонга айгоқчи қўшиб юбордим ва дарё соҳилида бирон ёққа жилмай хабар келишини кутдим. Айгоқчи хабарига кўра, карвондагилар амир Мусога шундай деган эмишлар: «Амир Темурни Амуй суви ёқасида қўрдик, Хурросон тарафга кетаётган экан». Бу гап амир Мусо ва амир Ҳусайннинг лашкарига етгач, хурсанд бўлиб, ўйин-кулги ва айш-ишратга берилибдилар.

¹ Амуй суви – Амударё.



Бу хабарни эшитишим билан лашкарим ичидан энг ишончли, довюрак, жанг кўрган ёш баҳодир йигитлардан икки юз қирқ учтасини танлаб олдим ва дарёдан ўтиб, илфор юбордим. Ширкент¹ мавзеига етдим ва ўша ерда бир кеча-кундуз тўхтаб, (сўнг) яна йўлга тушиб, Қарши қалъасидан бир фарсанг масофага келиб тушдим. (Одамларга) арқонларни бир-бирига боғлаб нарвон ясад қўйишларини буюрдим. Шу пайт амир Жаку тиз чўкиб: «Бир гурӯҳ баҳодирлар орқада қолдилар, улар етиб келгунча тўхтаб туриш зарур», — деб ўтинч қилди. Шунда хотирамга бир фикр келди: баҳодирларим етиб келгунча қалъани ўзим кўздан кечирмоқчи бўлдим. Қирқ отлиқ ҳамроҳлигига Қарши қалъаси томон йўл олдим. Йироқдан қалъа қораси кўринганда, баҳодирларимни келган ерда тўхтатиб қўйдим ва уйимизда туғилиб ўсган Мубашшир ва Абдулло исмли (йигит)ларни бирга олиб кетдим. Хандак² бўйига етдим. Қарасам, хандақ сув билан лиммо-лим экан. Теварак-атрофга назар солиб, хандақ тепасидан ўтказилган, қалъага сув олиб борадиган тарновга кўзим тушди. Отимни Мубашshirga қолдириб, ўша тарнов орқали хандақ устидан ўтдим ва қалъанинг хокрезига³ етдим. Дарвоза олдига бориб, эшик қоқдим. (Лекин) дарвозабонлар ухлаётган экан, (ичкаридан садо чиқмади). (Ҳар эҳтимолга қарши) дарвозани ташқарисидан кесак-тош ва лой билан тўлдириб қўйишган экан. Қалъа девори атрофини кўздан кечириб, нарвон ва зиналар қўйса бўладиган жойни топдим. (Сўнг) орқамга қайтдим ва отланиб баҳодирларим ҳузурига бордим.

Орқада қолган лашкар фавжи ҳам нарвонлар билан етиб келишган экан. Ҳаммалари шайланиб, нар-

¹ Ширкент – ҳозирги Бешкент, Қарши туманининг маркази.

² Хандақ – шаҳар ёки кўргон девори ташқарисидан гир айланасига душмандан мудофаа мақсадида қазилган чукурлик, одатда унга сув тўлдириб қўйилган.

³ Хокрез – душман ўқлари ва хужумидан ҳимоя мақсадида қалъа девори остига уюлган тупроқ.

вонларни олишди ва қалъа сари юзландик. Хандакдан тарнов орқали қалъага ўтдилар. Зиналарни ҳам олиб ўтдилар ва деворга қўйдилар. Эр йигитлардан қирқтаси тепага чиқиб, қалъага кириб олдилар. Мен ҳам нарвонга оёқ қўйиб энди қалъага кирмоқчи бўлган эдим, карнай тортиб, бургу¹ чалдилар. Тангри таолонинг қўллаши билан қалъани қўлга киритдим.


Бу хабар амир Ҳусайнга еттач, (энди) макру ҳийла йўли билан, дўст-ошно либосини кийиб, мени ром этмоқчи бўлди.

МЕНИ ҚЎЛГА ТУШИРМОҚЧИ БЎЛГАН АМИР ҲУСАЙННИНГ МАКРУ ҲИЙЛАСИДАН ҚУТУЛИШ УЧУН ҚИЛГАН КЕНГАШИМ

Амир Ҳусайн: «Менинг дўстлик ва қариндошликни риоя қилишдан бўлак ниятим йўқ», — деб Қуръон устида қасам иди, кейин ўша Қуръонни менга жўнатди. У яна мана буларни ҳам айтиб юборибди: «Агар сенга айтган гапларимга хилоф бирон иш тутиш ниятим бўлса ва ўртадаги аҳд-паймонимни бузиб сенга ёмонлик қилсан, шу ушлаган Қуръон — Худонинг китоби мени урсин». Уни мусулмон деб билганим учун сўзларига ишондим. Шундан кейин у менинг ҳузуримга яна одам юбориб: «Ўртадаги аҳд-паймонимизни янгиласак, худо ҳақи, дуруст бўларди», — деб мени Чакчак² дарасида учрашишга даъват этди. Унинг мақсади мени макру фириб билан қўлга тушириш эди. Аҳд-паймони, сўзига ишониб бўлмаслигини билсан ҳам, аммо Қуръон ҳурматини сақлаб, (айтган жойига) учрашувга боришга қарор қилдим. (Бироқ бу борада) эҳтиёт шарт, Чакчак дараси атрофига баҳодирларим-

¹ Бургу – карнайнинг бир хили, ковак шоҳ шаклида бўлган.

² Чакчак дараси – Чакчак тизмасининг жанубий этапидаги жойлашган мавзе, ҳозирги номи Чакдара (Қашқадарё вилоятининг Деконобод тумани ҳудудида).



дан бир гурухини юбориб, яшириб қўйиш, кейин эса ўзим суюнса бўладиган ишончли одамларимни олиб, учрашувга бориш режасини туздим.

Амир Ҳусайн хизматида бўлган дўстларимга хат юбориб, унинг найрангларидан мени огоҳ, этиб туришларини сўрадим. Дўстларимдан бири Шер Баҳром амир Ҳусайннинг нияти шум эканлигидан мени огоҳлантириди. Амир Ҳусайн (буни сезиб қолиб) Шер Баҳромни қатл эттириди, менинг устимга эса минг отлиқ аскар билан ҳужум бошлади.

Бу хабар менга етганида, энди дарага келиб тушган эдим. Қўшинимни тартибга солдим. Шу вақт амир Ҳусайн лашкарининг қораси кўринди. Қоровуллар бу фақат амир Ҳусайн лашкарининг бир қисми эканлиги, унинг ўзи бу ерда йўқлигини хабар қилдилар ва: «Амир Темур бир ўзи келибди, деган гапни эшитиб, сизни қўлга тушириш учун лашкарининг бир қисмийигина юборди», – дедилар.

Мен (жангу жадалга) ҳозирлана бошладим. Бу ерда ҳаммаси бўлиб икки юз отлиқ аскар бор эди. Амир Ҳусайн қўшинининг фавжи дарага киргунигача сабр қилиб турдим. Ўзим келгунга қадар (бу ерга) юборган одамларимга уларнинг қайтиш йўлини тўсишларини буюрдим, ўзим эса ёғийга юзма-юз бўлдим. (Хуллас) дарада икки ёқдан қамалиб қолган ғаним лашкарининг кўп қисмини қўлга туширдим. (Сўнг) одамларими ни саф-саф қилиб туздим ва Қаршига қараб юзландим. Тажрибамдан шуни кўриб билдимки, дўст ҳар ерда асқотар экан. Амир Ҳусайнга (эса) ушбу мазмунда туркий байт ёзиб юбордим:

*Ёрга еткур, сабо, ким макр қилмишдир манга,
Қилди эрса кимга макрин, қайтадур бир кун анга.*

Бу хатим амир Ҳусайнга бориб етгач, кўп хижолат бўлди ва мендан узр сўради, (лекин) мен иккинчи бор унинг сўзига ишонмадим.

ТУРОНЗАМИННИ МЎГУЛЛАР ТОИФАСИ ҚОЛДИҚЛАРИДАН ТОЗАЛАШ УЧУН ҚИЛГАН КЕНГАШИМ

Жета ва Илёс Хожа лашкарини Мовароуннахрдан қувиб, Хўжанд дарёсининг нариги қирғогига ўтказиб юборган бўлсан ҳам, мўгулларнинг баъзи фавжлари Мовароуннахр қалъаларида мустаҳкам жойлашиб олган эдилар. Аввалига уларни бостириш учун лашкарим қисмларини юбормоқчи бўлдим, бироқ мабодо бу иш чўзилиб кетса-чи, деган фикр мени ташвишга солди.

Шу орада менга мўгуллар қалъаларга яшириниб олганлари ҳақида хабар келтирдилар. Лашкар қисмларини у ерга юбориш тўғри бўлмас, деб (бошқа) чора излай бошладим. Сўнгра Илёс Хожаномидан қалъадагиларга қаратса ёрлиф ёзиб, урушиз топширишларини буюрдим. Ёрлиқни бир мўгул қўлига тутқазиб, унга ҳамроҳ қилиб лашкаримнинг бир қисмини жўнатдим. Аскарларимга чанг-тўзон кўтариб, ўзларини ғанимга кўпдай қилиб кўрсатишни буюрдим. Илёс Хожанинг талаби ёзилган ёрлиф ғанимлар қўлига тегиб, лашкарларим кўтарган чанг-тўзонни кўришгач, тун қоронғусида қалъаларни ташлаб қочдилар. Хуллас, Мовароуннахр тупроғи мени ўлдиришга қасд қилган ўша золимлардан тозаланди ва мамлакат тамоман менинг қўлимга ўтди.

Қариндошлик хурмати учун Балх билан Ҳисори Шодмон вилоятларини амир Ҳусайнга тортиқ этдим. У эса бу эҳсону муруватимни назарига илмай, мени маҳв этишга қасд қилди. Мен ҳам ўз-ўзим билан кенгашиб, амир Ҳусайнни ўртадан кўтаришта қарор бердим.

Амир Ҳусайн мен қўлга киритган ғалаба ва ютуқларимни кўролмай, ҳасад ичини кемириб, мен-



га ва ҳарамимдаги ўз синглисига кўп озор берди¹. У Мовароуннахри мендан тортиб олишга, мени (эса) ўлдириб, тахтга ўзи ўтиришга бел боғлаган эди. Ўртамиизда неча бор урушлар бўлиб ўтган бўлса-да, барчасида енгилди². Унинг адолатсизлиги, инсоф-сизлиги ҳаддидан ошган, мени енгиш ва ўлдириши-га оз қолган вақтлар ҳам бўлди. Айнан шу вақтда кўрслиги, ёмон йўл тутиши туфайли амирлари ун-дан юз ўтирилди. Хутталон ҳокими амир Кайхус-равнинг инисини сабабсиз қатл эттириди. Оқибат-да, амир Кайхусрав ҳам Хутталонда унга душман бўлиб қолди.

Амирлари (анчадан бери) ундан норози бўлиб, адо-ват сақлар эдилар, у эса уларни ўз тарафдори деб биларди. Шу сабабли яна мени тор-мор келтириб, маҳв этиш қасдида қароргоҳини Балх чеккасидаги бир жой-га кўчирди³. Бу хабарни эшитишим билан амир Ҳусайн ҳаракатта келмасдан бурун, устига бостириб боришга қарор қилдим. Бор лашкарим билан Балх сари юз-ландим. Йўлда ҳар ёқдан зафарли лашкар фавжлари келиб менга қўшилдилар ва Балх атрофига бориб туш-дим. Амир Ҳусайн қарши чиқиб, мен билан жанг қилди. Охири қочиб қалъага кириб олди. Сўнгра бо-шига нима келган бўлса, ўз қилмиши туфайли кўрги-лигини кўрди⁴.

¹ 1365 йилда амир Ҳусайн Самарқандда Амир Темурга яқин бир неча бекларни исён кўтаришда айблаб, уларга катта жарима солади. Амир Темур бисотидаги бор олтин ва жавоҳирларни, шунингдек, хотини Улжай Туркон оқанинг қимматбаҳо тақинчоқларини ҳам қўшиб, товонга тўлайди.

² 1366 – 1370 йиллар давомидаги Амир Темур ва амир Ҳусайн ўрта-сида мутгасил равишда ўзаро урушлар бўлиб турган.

³ Бу ерда сўз амир Ҳусайн тиклаган Балҳдаги Ҳиндувон ҳисори ҳақида бораётир.

⁴ Низомиддин Шомий ва Шарафидин Али Яздийлар ўз «Зафар-нома»ларида амир Ҳусайннинг очиқ жангдан қочиб ичкари қалъага яширингани, 1370 йил апрелда кўлга олингани ва ўлдирилгани воқе-асини батафсил баён этганлар.

МЕНГА ҲАР ТУРЛИ ЁМОНЛИКЛАР ҚИЛИБ ЧЎЧИБ ЮРГАН ВА ҚИЛМИШЛАРИ УЧУН «МЕНИ ЎЛДИРАДИ» ДЕБ ВАҲИМАДА ЮРГАНЛАРНИ ЎЗИМГА ЭЛ ҚИЛИБ ОЛИШ БОБИДАГИ КЕНГАШИМ

Амир Ҳусайн менга асир тушгандан кейин, унинг навкарлари ва амирлари «Энди бизни ўлдиради», деб гумон қилган эдилар. Аввалига ниятим шундок эди, кейинроқ, «Ахир булар аскарлар-ку?» деб барчалирини афв этдим ва яна аскарликка тайинладим.

Бадаҳшонда ҳоким бўлиб турган уларнинг бош ами-ри кўп мартаба жангда мен билан юзма-юз келиб, қилич чопишган киши эди. Амир Ҳусайн қатл этилганини¹ эшиитгач, менинг қаҳримдан қўрқиб, ўзини сергак тут-ди ва бордию уни тутиш учун қўшин юборсан, тўғри иш қилмаган бўлур эдим. (Шунинг учун) ўзимни уни унугтган кишидек тутдим ва (унинг борасида) ушбу тад-бирни қўлладим: мажлисларда, йиғин-ўтиришларда уни яхши сўзлар билан ёд этиб, мардлиги ва баҳодирлиги-ни мақтадим, токи дўстлари: «Амир (Темур) сенга нис-батан марҳамат ва иноят мақомида турибди», деб унга хат ёздилар. У зорланиб менга мактуб юборди ва иноя-ту марҳаматимдан умиждвор бўлиб, паноҳимга келди.

ХУРОСОН ПОЙТАХТИ (ҲИРОТ)НИ ОЛИШ БОБИДА ҚИЛГАН КЕНГАШИМ

Амир Ҳусайн ўлдирилиб, (унга қарашли) Балх, Ҳисори Шодмон² ва Бадаҳшон вилоятлари менинг та-сарруфимга ўтгани ҳақидағи хабар Хуросон ҳокими

¹ Амир Ҳусайнни Хутталон ҳокими амир Кайхусрав хун талаби билан ўлдирган, чунки амир Ҳусайн 1360 йили унинг иниси Кайқу-бодини қатл этдирган эди.

² Ҳисори Шодмон – Ҳисор вилояти (қадимги Чагониён)нинг бош шахри; мустаҳкам қалъаси бўлган, қадимги номи Шумон. Харобалари Душанба шаҳрининг гарбий тарафида ҳозир ҳам мавжуд.



Малик Фиёсиддинга¹ етганида, уни қўрқинч босди, (уруш қилиш учун) лашкару сипоҳ тўплаб, мудофаага шайланди.

Кенгашиб, хурсонликлар хушёргини сўндириб, гафлат уйқусига чўмдириш учун, мен ҳарбий ҳийла ишлатиш фикрига тушдим. Шу мақсадда Самарқандга юриш қилмоқчидаи бўлиб орқага қайтдим. Шу аснода Малик Фиёсиддиннинг (мендан кўнгли тинчиб), жабрзул қилмоқда қўл урганлиги ҳақида пирамидан² хат олдим. Менинг Самарқанд тарафга қайтганим ҳақида ги хабарни эшишиб Фиёсиддин хотиржам ўтирган эди. Шунда мен ўз-ўзимга кенгашиб: «Ана энди хурсонликларнинг кўнгли мендан хотиржам бўлди, уларнинг устига бостириб боришнинг айни пайти», – дедим ва Балх чеккасидан қайтиб, Балҳда қолдирган аскарларим билан Ҳиротта қараб юрдим, Малик Фиёсиддинни гафлат уйқусида босдим ва у ночор шаҳардан чиқди, хазина ва тамом бойлигини менга пешкаш³ қилди. Шундай қилиб, Хурсон мулки менинг қўлимга ўтди⁴. Хурсоннинг барча амирлари менга бўйсундилар.

СЕЙИСТОН, ҚАНДАҲОР ВА АФГОНИСТОН⁵ МАМЛАКАТЛАРИНИ ЗАБТ ЭТИШ ҲАҚИДАГИ КЕНГАШИМ

Хурсон мамлакати бўйсундирилгандан кейин амирларим юқорида эслатилган уч мамлакатга лашкар юборайлик, деб маслаҳат бердилар. Мен дедим-

¹ Малик Fuёsiddin – 1245 – 1389 йилари Фур (ҳозирги марказий Афғонистон) ва Ҳирот вилоятларини тасарруф этган куртлар сулоласи вакили. Ҳақиқий исми – Малик Фиёсиддин II Пир Али. 1370 – 1381 йилларда ҳукмронлик қилган.

² Бу ерда Зайниддин Абубакр Тайободий назарда тутилган.

³ Пешкаш – ҳадя, тортиқ.

⁴ Амир Темур томонидан Хурсоннинг узил-кесил бўйсундирилиши 1381 – 1383 йиллари амалга ошган.

⁵ Бу ерда Афғонистон атамасининг мавжудлиги мантиқа зид, чунки бу ном билан аталувчи давлат Соҳибқироннинг даврида ҳали хари-

ки: «Агар лашкарларнинг ўзи билангина иш битмасачи? Унда ўзим боришим керак бўлади. Менинг эса мўлжаллаб қўйган бошқа ишларим кўп».

Маслаҳатни шундай деб билдириб олиш учун: «Агар менга қўшилсанглар (кутуласизлар), курашсанглар йиқиласизлар. У ҳолда тақдирингизда нима бўлса, ўшани кўрасизлар», – деган мазмунда ёрлиглар йўлладим. Бу тадбирим тақдирга тўғри келди. Ёрлигларим уларга етиши биланоқ, итоат бошларини бўйсуниш мақомига қўйдилар¹.

ЎРУСХОННИ² БАРТАРАФ ҚИЛИШ ВА ДАШТИ ҚИПЧОҚНИ БОСИБ ОЛИШДА ҚИЛГАН КЕНГАШИМ

Тўхтамишхон³ таҳт талашиб (Дашти Қипчоқ) хони Ўрусхондан енгилиб, менинг паноҳимга қочиб келган эди. Унинг билан қўшин юборсаммикан, ё ўзим бор-

тада йўқ, эди. Бу атама 1756 йили Аҳмадшоҳ Дурроний мустақил Афғонистон давлатини зълон қилганидан кейин муомалага кирган. Бироқ, маълумки, «Тузуклар» Ҳиндистонда, Бобурйлар даврида бир ё иккى марта «таҳрирланган», яъни матнга ноўрин ўзгартишлар киритилган. Бизга маълумки, шундай «таҳрирлар»дан бири император Шоҳ, Жаҳон I (1628 – 1657) даврида бажарилган. Лекин у даврда ҳам ҳали Афғонистон давлати бўлмаганилиги учун у «таҳрирда» бу атама матнга киритилган бўлиши мумкин эмас. Демак, ҳозирча бизга номаълум бўлиб қолаётган иккинчи «таҳрир» Афғонистон давлати ташкил топган 1756 йилдан кейин бажарилган ва бу билан асарга тузатиш киритиш ўрнига чалкашликка йўл қўйилган. «Муҳаррир»лар томонидан асарга киритилган бу ва бопкә чалкашликлар ҳозирги баъзи тадқиқотчиларда унга нисбатан шубҳа уйғонишига сабаб бўлди. (– А.А.)

¹ Бу воқеа 1383 йили рўй берган.

² Ўрусхон – Жўчи авлоди, Оқ Үрда хони (1361 – 1376). Унинг Оқ Үрда ва Кўк Үрда давлатларини битта Олтин Үрдага бирлаштириш учун ва ўз рақиби, Амир Темур томонидан қўллаб-қувватланган Тўхтамишхон билан курашлари муваффақиятли бўлмади.

³ Тўхтамишхон – Жўчи авлоди. Олтин үрда хони (1376 – 1395). 1378 йили Амир Темурнинг ёрдами билан Жўчи улусининг ҳар иккала қисмини, Оқ Үрда билан Олтин Үрдани бир-бирига қўшиб, 1395 йилга қадар Дашти Қипчоқда Жўчи улуси устидан ҳукмронлик қилади. 1405 йилдан кейин Сибир ўрмонларида касаллиқдан вафот эттан.

саммикан деб турганимда, Ўрусхоннинг элчиси келиб қолди. Кенгашиб, элчининг кўнглини овлаб, сўнг кетишига ижозат беришни, ўзим эса Даشتி Қипчоқ томон юзланиб, элчининг кетидан лашкар жўнатишни мўлжалладим, токи элчи хотиржамлик билан бўлган воқеаларни Ўрусхоннинг мажлисида баён қилсин, эртаси куни менинг қўшинларим қўққисдан уларнинг устига бостириб борсин.

Ўйлаганимдек иш тутгандим, тадбирим тақдирга тўғри келди. Ўрусхон элчиси бўлган воқеаларни сўзлаб бераётган пайтда, менинг қўрқмас лашкарим ногаҳон келган селдек Ўрусхон устига ёпирилди. У эса қаршилик кўрсатолмай, қочишни ихтиёр қилди. Даشتி Қипчоқ мамлакати менга бўйсунди¹.

ГИЛОН², ЖУРЖОН, МОЗАНДАРОН, ОЗАРБАЙЖОН, ШИРВОН³, ФОРС ВА ИРОҚ МАМЛАКАТЛАРИНИ ЗАБТ ЭТИШ БОБИДА ҚИЛГАН КЕНГАШИМ

Ироқ аҳолисининг Музаффарийлар⁴ ва турли тоифадаги хукмдорлар⁵ зулмидан шикоят қилиб ёзган аризалари қўлимга тушгач, Ироққа юриш тадоригини кўришга жазм қилдим⁶.

Шу пайт хотирамга: «Бу мамлакатларнинг подшоҳлари иттифоқ бўлиб, менга қарши урушга кўтарилсалар-чи? Демак, жангта шай бўлиш лозим!» — деган

¹ Бу воқеа 1376 йилда бўлган.

² Гилон (Жилон) — Каспий денгизининг жануби-ғарбидағи вилоят; ипак матолари билан машхур бўлган.

³ Ширвон — Озарбайжондаги тарихий вилоят. Кура дарёсининг қўйи ҳавzasида. Уни Ануширвон бунёд қилган деган ривоятта боис шу ном билан аталган.

⁴ Музаффарийлар — 1314—1393 йилларда Жанубий Эронни идора қилган сулола.

⁵ ..хукмдорлар — бу ерда мўгуллардан кейин хукумат тепасига келган Сарбадорлар, Чўпонийлар, Жалоирийлар давлатлари кўзда тутилган

⁶ Бу юриш Хурсонда амир Валибек ва Алибек Жоникурбоний исёнини бостириш мақсадида қилинган.

фикр келди. Амирларим ҳам жангдан аввал тегишли тайёргарликни кўриш керак, деб маслаҳат бердилар. Ўзим эса буларни бирма-бир ром этган ҳолда бўйсундириш, итоатга келмаганларини эса жазолаш даркор, деган фикрда эдим. Менинг паноҳимга келган биринчи одам Мозандарон ҳокими амир Али бўлди. У менга пешкаш жўнатиб, мактубида: «Биз ҳазрати Али аводидан бўлган бир жамоамиз. Шу ерда қаноат қилиб кун кечираётимиз. Бу ерни олсангиз, қуввату кучингиз ортар, аммо кечиб юборишингиз тақвога яқинроқ ишдир¹», — деган гаплар битилган эди.

Мен Мозандарон ҳокимининг итоат билдириб қилган бу мурожаатини яхшиликка йўйдим. Кейин Гилон ва Журжонга қараб йўл олдим. У ўлканинг ҳокимлари менга бўйсунмагач, қаҳрли лашкарим фавжларини уларнинг устига жўнатдим, ўзим эса Ироқ сари лашкар тортдим.

Исфаҳонни забт этдим. Шаҳар аҳолисига ишонч билдириб, қалъасини ўзларининг кўлига топширдим. Улар эса исён кўтариб, мен тайинлаган даругани² ҳамда уч минг аскаримни тиғдан ўтказдилар. Мен Исфаҳон аҳолисини қатли ом қилиш ҳақида буйруқ бердим³.


ФОРС ПОЙТАХТИ (ШЕРОЗ)НИ ВА ИРОҚНИНГ ҚОЛГАН ҚИСМИНИ ЗАБТ ЭТИШ БОБИДАГИ КЕНГАШИМ

Шерозни Музаффарийларга қолдириб, Исфаҳонда эса уч минг одамимни тайинлаб, ўзим Тўхтамишхонни даф этиш учун Даشتி Қипчоққа лашкар тортиб борганимда, Исфаҳон аҳолиси даругани ўлдириди. Шу вақтнинг ўзида Шероз аҳолиси ҳам менга бўйсунмай қўйган эди. Шу сабабдан, уларни жазолаш мақсадида яна Ироққа юриш

¹ «Қуръони карим». Бақара сураси, 237-оят. (—А.А.)

² Даруга — шаҳар ҳокими.

³ Бу воқеа 1387 или 18 ноябрда содир бўлган. Қуролсиз кишилар, сайдилар, шайхлар ва ҳунармандларга тегилмаган.



қилишга тайёрлана бошладим. Саксон минг отлиқ аскар түпладим. Лекин бу катта лашкар билан бир йўла Ироқ ўлкасига кирсан, у ерга сифмай қолиши мумкинлигини эътиборга олиб, лашкаримни фавжларга бўлиб, уларни Ироқ мамлакатини забт қилишга бирин-кетин юбориш керак, деган қарорга келдим.

Шундан сўнг, лашкаримни уч фавжга бўлдим ва ўзимдан олдинда боришни буюрдим. Ироқнинг ҳар ер-ҳар ерида тўпланган ғаним аскарларининг ҳаммаси тарқалиб кетди. Сўнг Шероз устига лашкар тортдим. Шоҳ Мансур¹ жанг майдонида мен билан тўқнашиб, жазосини топди.

ТЎХТАМИШХОНГА ШИКАСТ ЕТКАЗИШ БОБИДА ҚИЛГАН КЕНГАШИМ

Лашкарларим беш ой давомида Тўхтамишхоннинг ортидан қувиб юргани сабабли² кўпинча оч қола бошлидилар. Чунончи, бир неча кун ош балмоқ³, ов гўшти, сахро паррандаларининг тухуми билан кун кечирдилар. Лашкарим бундай оғир аҳволга тушиб қолганини эшиттан Тўхтамишхон фурсатдан фойдаланмоқчи бўлиб, чумолиу чигиртқадан ҳам кўп аскари билан устимизга ёпирилиб келди ва мен билан тўқнашди. Аскарларимнинг очлиқдан тинкаси қуриган эди. Тўхтамишхон аскарлари эса тўқ ва осуда эдилар. Фарзандларим ва набираларим ҳузуримга келиб тиз чўкиб, мен учун жон фидо қилишга тайёр эканликларини билдирамагунларича, саркардаларим ва аскар бошлиқларим жанг қилишга рўйхушлик бермадилар. Шу пайт Тўхтамишхоннинг байроқдори мен билан тил бириктириди – уруш бош-

¹ Шоҳ Мансур – Музafferийлар сулоласидан. 1387 – 1393 йиллари Форс, Исфаҳон ва Ироқи Ажамни идора қилган ҳукмдор. 1393 йил 26 апрелда жангда ўлдирилган.

² Амир Темурнинг Тўхтамишхонга қарши 1391 йилдаги юриши назарда тутилоқда, Жанг Амир Темурнинг ғалабаси билан якунланган.

³ Ош балмоқ – атала. (–А.А.)

лаганимда, икки томон лашкари юзма-юз келганда, байроқдор байробини тубан қилиши ҳақида у билан келишиб олдим. Фарзандларим (ва набираларим) олдимга келиб, тиз чўкканини эшиттагач, амирларим ва нўёнларимнинг¹ жасурлиги тутиб, жангта шай ҳолатта келдилар. Мен (набирам) амирзода Абу Бакрни² саккиз минг отлиқ билан ҳировул этиб тайинладим. Савашу чопиши қизишиб, жанг жадал ўти кўкка кўтарилганда, чодирлар тикиб, таом тайёрлашга киришишни буюрдим. Худди шу пайт ғаним байроби тубан бўлди ва Тўхтамишхон саросимага тушиб қолди. У Жўчи улусини³ форатта ташлаб, жанг майдонига орқа ўтириб қочди⁴.

ДОРУССАЛОМ⁵ (БАҒДОД)НИ ВА АРАБ ИРОҚИНИ⁶ ЗАБТ ЭТИШ ТЎҒРИСИДАГИ КЕНГАШИМ

Ажам Ироқи⁷ ва Форсни забт этганимдан кейин, қутб ул-ақтоб⁸ пиримдан менга қуйидаги мазмунда

¹ Нўён – туман, яъни 10 минг кишилик лашкар қўмондони.

² Абу Бакр (1382 – 1417) – Амир Темурнинг невараси, амирзода Мироншоҳнинг ўғли, Озарбайжон ва Ироқ ҳукмдори.

³ Жўчи улуси – Чингизхоннинг тўнгич ўғли Жўчи ва унинг ўғли Ботухон томонидан бунёд этилган давлат. Унинг таркибига ҳозирги Россиянинг бир қисми ҳамда Украина, Қозогистоннинг Балхаш кўлидан фарбдаги ерлари кирган. (–А.А.)


⁴ Бу ерда Кундузча яқинида (ҳозирги Самара ва Чистополь ўртасида) 1391 йил 18 июня ида бўлиб ўтган жангда Тўхтамишхоннинг мағлуб этилиши воқеаси келтирилган.

⁵ Доруссалом – (араб. – тинчлик маскани) – мусулмонлар томонидан Бағдод шаҳрига берилган сифат, чунки шаҳар барпо қилинишида уч йил давомида халифалик уруш олиб бормаган. (–А.А.)

⁶ ..араб Ироқи (Ироқи араб) – араблар истиқомат қилиб турган Ироқ; асл Ироқ (қадимги Бобил). (–А.А.)

⁷ ..ажам Ироқи (Ироқи ажам) – ажамликлар, яъни араб бўлмаган ҳалқлар истиқомат қилиб турган Ироқ (қадимги Мидия), Эроннинг Ироқ билан чегарадош гарбий ерлари, Месопотамияга туташ жойлар тушунилади.

⁸ Кутб ул-ақтоб – «қутблар қутби». Улуғ мартабали шайхлар, дин пешволари ва валийларга бериладиган фахрли ном. Бу ерда Мир Сайид Барака назарда тутилган, дея тахмин қилиш мумкин.



мактуб келди: «(Эй), араб Ироқи ва ажам Ироқининг буюк фотихи, (Оллоҳ) сенга (иккинчи) Ироқни ҳам тақдим этди!».

Бағдодни забт этиш учун даставвал султон Аҳмад Жалойир¹ ҳузурига Бағдод волийси лашкарларининг қай аҳвозда эканлиги, юриш-туриши, қудрати ҳақида маълумотлар олиб келиш учун элчи юборишга келишилди. Элчи Бағдоддан менга: «Султон Аҳмад икки кўзли бир бўлак гўшт экан», — деган мазмунда хат юборди. Мен Тангрининг иноятига суюниб, (Бағдод устига) қараб юрдим ва тез фурсатда Бағдодга етиб бордим. Султон Аҳмад Жалойир жонининг омонлигини афзал кўриб, Карбало томонга қараб қочди. Шу билан Доруссалом Бағдод менга бўйсунди².

ТЎХТАМИШХОННИ ЙЎҚОТИШ УЧУН ҚИЛГАН КЕНГАШИМ

(Тўхтамишхон мендан енгилиб) Жўчи улусини талон-торожга ташлаб, ўзи қочган эди. Кейинроқ менинг йўқлигимдан фойдаланиб, Дарбанд³ ва Ширвон орқали Озарбайжонга кўп сонли лашкар юбориб, фитнаю фасод кўтарди. Бу вақтда мен ҳар иккала Ироқни ҳам эндинина забт этиб бўлгандим. Тўхтамишхонни йўқотиш учун беҳисоб лашкар билан Дарбанд йўли орқали яна Даشتி Қипчоққа юришни маслаҳат кўрдим.

¹ Султон Аҳмад Жалойир – 1382–1410 йилларда Ирок, Курдистон ва Озарбайжонда ҳукмронлик қилган.

² Бу ерда Бағдоднинг Амир Темур томонидан 1393 йил сентябрь ойи охирида биринчи марта забт этилиши назарда тутилган. Султон Аҳмад Жалойир Мисрга қочиб, мамлуклардан бўлмиш Сайфиддин Баркуқ (1382–1399) саройидан паноҳ, топган эди. Кейинчалик 1401 йил 20 июня Амир Темур иккинчи марта Бағдодни фатҳ этган. (– А.А.)

³ Дарбанд – Каспий дengизининг чап соҳилидаги тарихий шаҳар, асрлар давомида у ерда жойлашган мудофаа иншоотлари ва қалъя муҳим чегара пункти ва Каспий дengизидаги катта бандарлардан бири бўлиб ҳисобланган.

Юриш олдидан кўрик қилиб, лашкарим қаергача бориб етишини билмоқчи бўлдим. Қарасам, тўрт фарсанг масофада лашкарларим саф тортиб турарди. Тангри таолога шукр келтирдим. Сўнг Самур сувидан¹ ўтиб, Даشتி Қипчоқнинг элу улусига ушбу мазмунда ёрлиқлар йўлладим: «Кимки менга келиб қўшилса, улуғланади, кимки мен билан курашмоқчи бўлса йиқилади».

Хижрий 797 (милодий 1394–95) йили Даشتи Қипчоққа кирдим ва узоқ шимолида ястаниб ётган ерларигача бордим². Менга қарши бўлган Жўчи эл-улусини бўйсундириб, ўзимга тобеъ этдим. Бешинчи ва олтинчи иқлим³ вилоятлари, улуслари, қалъяларини забт этиб, ғалабаю зафар қучиб ортимга қайтдим.

ҲИНДИСТОННИ ЗАБТ ЭТИШ УЧУН ҚИЛГАН КЕНГАШИМ

Даставвал, фарзандларим ва амирларимнинг кўнгли, ўй-фикрларини билиш учун уларга маслаҳат солдим.

Амирзода Пирмуҳаммад Жаҳонгир⁴: «Агар Ҳиндистонни олсак, унинг олтинлари билан бутун ер юзи-

¹ Самур суви – Догистон ва Озарбайжон чегарасидаги дарёча, Каспийга қуйилади. (– А.А.)

² Амир Темур билан Тўхтамишхон ўртасидаги бу уруш 1395 йил 17 апрелда Терек дарёси бўйидаги водийда бўлган ва Соҳибқироннинг ғалабаси билан яқунланган. Шундан кейин Амир Темур, Низомиддин Шомий ва Шарафиддин Али Яздий «Зафарнома»ларида келтирилишича, Даشتи Қипчоққа қарашли қатор вилоят ва шаҳарларни, Олтин Ўрданинг пойтахти Сарой Беркани эгаллаган, Москвагача борган. (– А.А.)

³ Етти иқлим тушунчаси фанда илк бор Муҳаммад ал-Хоразмий томонидан муомалага киритилган. Хоразм, Мовароуннаҳр, Фарғона, Даشتси Қипчоқ ерлари бешинчи ва олтинчи иқлимлардан жой олган. (– А.А.)

⁴ Пирмуҳаммад Жаҳонгир (1376–1406) – Амир Темурнинг набираси. Отаси Жаҳонгир вафотидан (1376) кейин у Кобул, Қандайхор, Фазна ва Балхни идора қилган.

ни эгаллаймиз», – деди. Амирзода Мұхаммад Султон¹ эса: «Хиндистонни оламизу, бироқ (бунга) түсікдар бор: бириңчиси – денгизлар, иккінчиси – ўрмому түқайлар, учинчиси – жанговар сипохийлар ҳамда одам овлагувчи филлари күп», – деди. Сүзга амирзода Султон Ҳусайн² қўшилди: «Агар Ҳиндистонни қўлга кирила олсак, тўрут иқлимга ҳукмрон бўлурмиз».

Амирзода Шоҳруҳ³ сўзни бундай давом эттириди: «Мен турк қонунларида ўқиган эдимки, жаҳонда бешта шон-шавкатли подшоҳ бордир. Уларнинг улугворлигини ҳурматлаб номларини атамай, лақаблари билан айтадилар: Ҳинд подшосини – рой, Рум подшосини – қайсар, Хитой ва Чину Мочин подшосини – фагфур, Туркистон подшосини – хоқон, Эрону Турон подшосини – шаҳаншоҳ дейдилар. Шаҳаншоҳ ҳукми ҳамиша Ҳиндистон мамлакатларида (ҳам) жорий этиларди. Ҳозир Эрону Туронзамин бизнинг қўлимида бўлгани учун, Ҳиндистонни ҳам фатҳ, этмоғимиз лозимдир».

Амирлар эшитишиб: «Борингки, Ҳиндистонни олдик ҳам дейлик. Бироқ у ерда турғун бўлиб қолсак, наслимиз йўқолади, авлодларимиз ўз аслидан ажраб, тиллари ҳиндча бўлиб кетади», – дейишиди.

Мен, Ҳиндистонга юриш учун ҳиммат камарини белга боғлаганимдан ўз азму жазмимдан воз кечишни истамадим ва шундай жавоб қилдим: «Тангри таолога ўтингч билан мурожаат этайлик. Жанг қилиш ёки

¹ Мұхаммад Султон – Амир Темурнинг набираси. Жаҳонгиринг ўғли (1376 – 1403). Онаси Олтин Ўрда хони Ўзбекхоннинг (1312 – 1341) набираси Хонзода бегим бўлган. Амир Темур ўзига валиаҳд этиб тайинлаган. 1403 йили Қора шаҳар (Туркия)да касал бўлиб вафот этган.

² Султон Ҳусайн – Амир Темурнинг набираси, қизи Ака Беги (Тағайшоҳ)нинг ўғли.

³ Шоҳруҳ (1377 – 1447) – Амир Темурнинг кенжা ўғли, 1405 йилдан Хуросон ноиби, 1409 – 1447 йилларда Темурийлар салтанати олий ҳукмдори.

қилмаслик ҳақида Қуръондан фол очайлик, Тангри таоло нени буюрса шунга амал қилгаймиз».

Ҳаммалари менинг таклифимни маъқуллашди. Қуръони мажиддан фол очсан, ушбу улуғ оят чиқди: «Эй пайғамбар, коғирларга ва муноғиқларга қарши жаҳд қилгил». Уламо мазкур оятнинг мазмунини амирларга тушунириб бергандан кейин, бошларини эгиб, жим бўлиб қолдилар. Уларнинг хомушлигидан дилим ранжиди.

Ўз-ўзимча кенташиб, Ҳиндистонни зabit этишга розилик бермаётган амирларни мансабларидан олиб, қўшинларини кутволларига топширсаммикан, деб ўйладим. Лекин ўзим тарбиялаган кишилар бўлганликлари учун, уларни хароб қилишни истамадим. Гарчи юрагимни қонга тўлдириб эзсалар-да, уларга мулоҳимлик кўрсатдим. Охири фикримга қўшилганларида, кўнглимда уларга нисбатан губор қолмади. Сўнгра қайтадан кенгаш чақириб, иқболимиз хонаси – Ҳиндистонга юзланиб, зафару фатҳ, дуосини ўқидим.

ҲИНДИСТОН ПОЙТАХТИ (ДЕҲЛИ)ГА ЛАШКАР ТОРТИШ БОРАСИДА ҚИЛГАН КЕНГАШИМ

Кобулда жавонгорнинг ўттиз минг отлиқ аскари билан турган амирзода Пирмуҳаммад Жаҳонгирга Сулеймон тоги орқали юриб, Синд дарёсидан ўтгач, Мўлтон² вилояти устига тўсатдан бостириб бориб, зabit этишни тайинладим.

Султон Муҳаммадхон³, амирзода Рустам⁴ ва бошқа амирларга баронгорнинг ўттиз минг отлигини олиб

¹ Қуръони карим, Таҳрим сураси, 9-оят.

² Мўлтон – ҳозирги Покистондаги шаҳар.

³ ...Султон Муҳаммадхон – «Тузуклар»ни аслиятдан форсчага таржима қилган таржимон ёки хаттот хатоси, аслида Султон Маҳмудхон (1388 – 1402) бўлиши лозим, Чигатойхон авлоди, Амир Темур ҳукмронлиги даврида хон деб эълон қилингандардан бири. (– А.А.)

⁴ Амирзода Рустам (1381 – 1424) – Амирзода Умаршайхнинг ўғли. 1405 – 1408 ва 1415 йиллари Исфаҳон ҳокими бўлган. 1424 йили Исфаҳонда вафот этган.



Синд дарёсидан кечиб ўтиб, Кашмир тоғи этагидаги йўл билан, Лоҳур вилоятига қўққисдан босқин қилишни буюрдим. Ўзим ўттиз минг отлиқ аскар билан фўлни¹ бошқардим. Ҳиндистон юришига жамланган лашкарлар умумий сони тўқсон икки минг отлиқقا етган эди. Лашкарим сони Оллоҳнинг ердаги элчиси Муҳаммад саллоллоҳу алайҳи васаллам исми шарифлари сонига тўғри келганлиги учун, бу тасодифни истиқболнинг хайрли ва муборак фоллари сирасига киритдим.

Отланиб йўлга тушдим ва Бадахшон чегарасидаги Андароб деган жойга келиб тушдим. (Бу ерда бир неча кун бўлиб) Катур² тоғида истиқомат қилиб турган коғирларни енгдим. Уларга жазо берганимдан сўнг, дор ул-ҳарб бўлмиш Ҳиндистон газовотига юзландим³.

ҲИНДИСТОНГА ОЛИБ БОРАДИГАН ЙЎЛНИ АФГОНЛАРДАН ТОЗАЛАШ УЧУН ҚИЛГАН КЕНГАШИМ

Шу орада менга арз қилдиларки, бир тўда афлонлар Ҳиндистонга олиб борадиган йўлга босқин қилиб, у ерда қароқчилик қилаётган эканлар. Хусусан, булардан Каркас⁴ қабиласининг бошлиғи Мусо Афоний ҳаддидан ошаётган экан. Менинг вафодор хизматкор ва тобеъларимдан бири бўлган Лашкаршоҳ Афонийни Пирмуҳаммад Жаҳонгир Эрёб қалъасини қўриқлашга қўйган эди. Мусо Афоний мазкур қалъага отсолиб, шиддат билан босиб олибди, Лашкаршоҳ Афонийни ўлдириб, қалъадагиларнинг бор-йўгини талаб кетибди.

¹ Фўл (ёки қўл, қалб) – лашкарнинг марказий қисми.

² Катур – Ҳиндистондаги тоғли вилоят, Кофиристон, ҳозир Нуристон деб ҳам аталади.

³ Ҳиндистонга юриш 1398 йил апрель ойида бошланиб, 1399 йил апрель ойининг 27 сигача давом эттан.

⁴ Каркас – хато ёзилган. Какар бўлиши керак. Ҳозирги Покистоннинг шимоли-ғарбида яшайдиган қабила. (–А.А.)

Шу пайтда (хузуримга) Лашкаршоҳнинг иниси Малик Муҳаммад дод-фарёд кўтариб келди. У оғасини ўлдирган Мусо Афонийнинг жабру зулмидан шикоят қилди. Мен бўлсан (унинг сўзига қулоқ солмаган бўлиб): «Ҳой инсон, Мусо Афоний менга хайрҳолардан биридир», дедим ва уни қамаб қўйишларини буюрдим. Амирларим мени ноҳақ зулм ўтказди, деб айладилар.

Бироқ, бунинг аксича, Мусо Афоний Малик Муҳаммаднинг ҳибсга олингани ҳақидаги хабарни ва менинг айтган гапларимни эшишиб, кўнгли таскин топди. Шундан кейин, уни ҳузуримга келишини талаб қилиб ёзган ёрлигимни олгач, ҳадиксирамасдан дарҳол етиб келиб, қалъани менга пешкаш қилди.

Мен у қалъани томоша қилиш учун ичкарисига кирганимда, унинг (Мусо Афонийнинг) сипоҳийларидан бири мени ўлдириш қасдида ўқ-ёй отди. Кейин Мусо Афоний ўзига яраша жазосини топди. Ҳиндистон йўли очилди.

ДЕҲЛИ ҲОКИМИ СУЛТОН МАҲМУД ВА МАЛЛУХОНЛАРНИ ЕНГИШ БОБИДАГИ КЕНГАШИМ

Султон Маҳмуд¹, Маллухон² иккиси эллик минг отлиқ ва пиёда аскар, 120 занжирбанд фил билан Деҳли қалъасини мустаҳкамлаб, менга қарши жангта шайландилар. Кўнглим ғаш бўлди. Бордию Деҳли қалъасининг қамалига киришсам, бу иш узоқ муддатта чўзилиб кетса, (унда нима қиламан?) Кенгашни шундан топдимки, ғаним лашкари дадилланиб, (қалъадан) чи-

¹ Султон Маҳмуд (Султон Носиридин Маҳмудшоҳ, II) – Шимолий Ҳиндистонни идора қилган Туглуқийлар сулоласи (1320–1413)дан чиққан подшоҳ. У 1393–1399 йиллари мамлакат ҳукмдори бўлган.

² Маллухон – Султон Маҳмудшоҳ, ҳукмронлиги даврида вазир ва амиралумаро бўлиб, ҳукуматни деярли ўзи бошқарган.



қиб, саф тортиб жанг майдонига кириши учун, ўзими-ни кучсиз ва (қўрқандек) қилиб кўрсатмоқчи бўлдим. Шу сабабдан, лашкардан узоқроқда хандақ қаздирдим. Лашкарим билан хандақ ичига яхшилаб жойлашганимдан кейин, лашкарларимнинг бир фавжини душманга қарши жангта ташладим. Душман қаршисига боргач, ўзларини кучсиз кўрсатиб, қўрқандай бўлиб чекинишларини ва ғанимларни дадиллантириб келиши ни буюрдим. Душман лашкари бу ҳолни кўриб ўзларини голиб ҳисоблаб, гердайиб жанг майдонига чиққан эдиларки, (менинг) қаҳрли лашкарим фавжлари билан юзма-юз келдилар. Дехли ҳокими султон Маҳмуд жангта киришди ва енгилиб тоғ тарафга қочди. Беқиёс хазина ва мол-мулки сипоҳийларимга насиб бўлди.

Бир йил ичида Ҳиндистон пойтахти Дехлини забт этдим¹ ва мазкур йилнинг охириларида салтанатим пойтахти (Самарқанд)га қайтдим².

ГУРЖИСТОН МАМЛАКАТИНИ ЭГАЛЛАШ УЧУН ҚИЛГАН КЕНГАШИМ

Ҳиндистондан зафар қозониб қайтганимдан кейин, ҳали сафар чарчоги чиқмай туриб, икки Ироқ ҳокими-ларидан менга арзнома келди. Ёзишларича, Гуржистон кофирлари ҳаддиларидан ошиб, чегарани бузган эмишлар.

Мен ҳамиша подшоҳлар учун кофирларга қарши разовот қилишдан, мамлакатларни забт этишдан ва жаҳонгириликдан яхшироқ иш йўқ, деган фикрда эдим. Гуржистон имонсизларининг түғён кўтаргани ҳақида-ги хабар келиши биланоқ кенгаш ўtkазиб, «ўша диёрдаги бошқа бузуқи одамларнинг ҳам бош кўтаришига йўл очилмасин», дея зудлик билан уларни даф

¹ Дехли 1398 йил 18 декабрда забт этилган.

² Бу воқеа 1399 йил 27 апрелда юз берган.

қилишга тутиндим. Ҳинд юришидан келган сипоҳийларимга «хоҳловчилар шу ерда қолсин, хоҳловчилар мен билан борсин», деб ихтиёрни ўзларига бердим. Хурросон, Қандаҳор, Сейистон, Кермон, Табаристон, Гилон, Мозандарон ва Форс вилоятларида лашкарларимга жанг ҳозирлигини кўриб, Исфаҳон атрофига келиб, менинг зафарли лашкаримга қўшилсинлар, деб ёрлиғлар жўнатдим.

Ҳар бир мамлакатдаги итоатдан бўйинтовловчиларни турли ерларга тарқатиб юборишни маслаҳат кўрдим. Чунончи, Хурросон ва Форсдаги бўйинтовловчиларни Туронзаминга кўчирдим ва бу мамлакатларнинг сатҳини уларнинг муҳолифлигидан тозаладим.


Сўнг Гуржистон вилояти қалъаларини забт этиш учун ўша мамлакат устига отландим. Сипоҳийларнинг кўнглига нима ўтиrsa, шуни қилдим. Бошимга пўлат дубулға, этнимга довудий совут кийдим, белимга Миср қиличини боғлаб, баҳодирлигу кураш тахтига ўтирдим. Туронлик довюракларга, Хурросон паҳдавонларига, Гилон ва Мозандарон ботирларига қўрқинч солдим ва Сивос¹ ҳамда Гуржистон қалъаларини фатҳ қилдим. Қалъадан туриб (қаршилик кўрсатгандарнинг) барчасини мағлуб этдим, қалъадан олган ўлжаларни эса голиб аскарларимга улашдим. Озарбайжонлик бузуқи, бевош кишиларни жазоладим.

Шундан кейин Малатия² қалъаси ва унинг тевара-гидаи ерларни фатҳ, этишга киришдим. Ўша қалъаларни фатҳ айлаб хотиржам бўлганимдан сўнг Ҳалаб³

¹ Сивос – Кичик Осиёнинг йирик қалъа-шаҳарларидан; ўрта асрларда Себастия деб номланган. «Султония – Табриз – Кўниё» карвон йўли устида жойлашган шаҳар. Ҳозирги вақтда Туркиядаги шу номдаги вилоят маркази. (– А.А.)

² Малатия – Рум мамлакатининг машҳур шаҳарларидан. Ҳозирда Туркиянинг шу номдаги вилоят маркази.

³ Ҳалаб – Шом(Сурия)нинг шимолида жойлашган қадимий шаҳар (милод.ав. 20-асрдан маълум), ўрта асрларда Алеппо номи билан машҳур бўлган.



ва Ҳұмс¹ томонларга қараб йўналдим ва бир оз ҳаралат билан бу мамлакатларни ҳам ўзимга қаратдим. Сўнг Миср ва Шом мамлакатларини забт этишга камар боғладим².

МИСР ВА ШОМ (МАМЛАКАТЛАРИ) НИ ФАТХ ЭТИШ БОБИДА ҚИЛГАН КЕНГАШИМ

Менинг шон-шавкатим ва қудратим овозаси (Рум) Қайсарининг³ қулогига етди. У ўзига қарашли Сивос ҳамда Малатия қалъалари ҳамда уларга тобеъ ерларни забт эттаним, қалъалар ичидағи аскарларининг барисини тарқатиб, теварак-атрофга сочиб ташлаганим ҳақидағи хабарни эшиштет, томирлариңдаги ғайрат ҳаралатта келди ва лашкарим зарбасидан қочиб, Қайсар қошида паноҳ топган Қора Юсуф Туркман⁴ ифвоси билан устимга лашкар тортишга қарор қилди.

Қайсар балога йўлиқиб, давлати вайрон бўлиши яқинлашиб қолганди, чунки у Қора Юсуфнинг ифвосига учиб, менга қарши лашкар тортган эди. (Қолаверса) Миср ва Шом қўшинларини ҳам ёрдамга чақирган эди. Мен кенгашиб лашкаримни уч фавжга ажратсан яхши бўлар, дедим. Бироқ жангда енгиш-енгилиш иши тақдир пардаси остида яшириллиги боис бу тўғрида амирларим билан кенгаш ўтказдим. Улар

¹ Ҳұмс – қадимги Эмесса, Оси (Оронт) дарёси бўйида жойлашган ва Шомга қарашли қадимий шаҳар.

² Миср ва Шом забтига Амир Темур етти йиллик (1399 – 1404) юриш вақтида, аниқроги 1399 – 1401 йиллари киришган.

³ Бу ерда Усмонли империяси султони Йилдирим Боязид I (1389 – 1402) назарда тутилади. 1403 йилнинг 8 марта Оқшаҳарда вафот эттан. Ўтра асрларда битилган тарихий манбаларда Рум мамлакати султонлари шу ном билан аталган. (– А.А.)

⁴ Қора Юсуф Туркман – 1380 – 1468 йиллари Ироқ ва Озарбайжон устидан ҳукм юритган Қора-қўюнлилар сулоласидан чиққан ҳукмдор (1388 – 1420). (– А.А.)

силоҳийларга хос иш тутиб, уруш очмоқни маслаҳат бердилар.

(Шундай бўлса) ҳам мен Қайсарнинг (ғайрат) ўтини аччиқ-чучук гап билан сўндиromoқни маслаҳат кўрдим ва унга мактуб йўлладим. Ҳатнинг қисқача мазмуни шундай эди: «Еру кўкни яраттан Тангри таолога чексиз шукрлар бўлсинким, етти иқдим мамлакатларининг кўпини менинг фармонимга киргизди ва олам султонлари, ҳокимлари менга эгилиб, итоат ҳалқасини жон қулоқларига тақдилар. Ўз қадрини билиб, ҳадидан ошмай жасорат оёқларини тийган бандасини Тангри ёрлақасин! Сенинг наслу насабинг қаерга бориб тақалиши жаҳон ҳалқи олдида матъумдир. Шундай экан, ҳолингта муносиб иш тутиб, журъат оёғини олдинга қўймагилки, ранжу меҳнат балчиғига ботиб, бало чуқурига йиқилгайсан. Иқбол эшигидан ҳайдалган бир тўда извогар кишилар ғаразли ишларини бажариш учун сенинг паноҳингдан жой олиб, ухлаб ётган фитнани уйғотмишлар. Яна ўшаларнинг ифвоси билан давлатинг юзига офат ва бало эшигини очмагил. (Дарҳол) Қора Юсуфни менинг олдимга юборгил. Йўқ эса тақдир пардаси икки лашкар сафлари тўқнашганда юзингта очилғусидир»¹.

Мактубни танилган элчиларим билан Қайсарга юборганимдан кейин Шом пойтахти (Дамашқ)га бориб туришга қарор қилдим. Ҳұмс ва Ҳалаб йўли орқали у ерга равона бўлдим. Ҳалаб шаҳрига еттанимда Миср подшоси Малик Барқуқ ўғли Малик Фараж² менинг Дамашққа келаётганимни эшитиб, шошилинч равишда Мисрдан Дамашққа қараб йўл олгани ҳақида

¹ Лекин Боязид Йилдирим Амир Темурнинг талабини инобатта олмаган, аксинча, унга ҳақоратомуз жавоб мактуби йўллаган.

² Малик Барқуқ ўғли Малик Фараж – 1382 – 1517 йилларда Миср билан Шомда ҳукмронлик қилган Буржийлар сулоласидан чиққан ҳукмдор (1399 – 1405). Шарқдаги Амир Темурга қарши кучлар, Тўхтамиш, Қора-қўюнли туркманлари, Султон Аҳмад жалойир ва Рум султонлари билан иттифоқдош бўлган.

хабар келтирдилар. Мен Миср ва Шом лашкарларининг қўшилишига йўл қўймаслик учун зудлик билан отланиб, олдинга юрдим. Лекин Малик Фараж абжирлик қилиб, мендан олдин Дамашққа етиб олди. (Шундай бўлса ҳам) мен унинг орқасидан шаҳарга етиб бордим ва Дамашқни забт этдим¹.

РУМ² МАМЛАКАТИНИ ЗАБТ ЭТИБ, ҚАЙСАР³ ЛАШКАРИНИ СИНДИРИШ БОБИДА ҚИЛГАН КЕНГАШИМ

Шом шаҳарларини забт этганимдан кейин ва Мисру Шом подшоси Малик Фараж жант майдонини ташлаб қочгандан сўнг, Румга юборган элчим Йилдирим Боязиднинг тескари жавобини олиб келди. Лекин (Боязид) Миср ва Шом лашкари мендан енгилганини эшитгач, ўйланиб қолгани ва саросимага тушиб, шошилинч равишда юришга тайёргарлик кўра бошлаганини ҳам айтди. Мен эса кенгашиб Дамашқ шахрини олиб, Шом вилоятларини бўйсундиргач, Мосул⁴ йўли билан Бағдодга қараб юрдим. Бу билан Қайсарнинг менга қарши уруш қилиш нияти бор-йўқлигини билиб олмоқчи бўлдим.

Табриз тарафга қараб борар эканман, амирзодалардан баъзиларини кўп сонли лашкар фавжлари билан Бағдод устига жўнатдим. Бу вақтда Бағдод ҳокими Султон Аҳмад Жалойир шаҳарни ва унинг қалъасини қўриқлашни навкари Фаражга топшириб, ёнига кўп одамларни қўшиб берганди. Амирзодалар Бағдодга етиб, шаҳарни қуршаб олдилар. Иш уруш қилишга

¹ Бу воқеа 1401 йил 11 январда юз берган.

² Рум – бу ерда: Усмонли сultonлиги. (–А. А.)

³ Қайсар – бу ерда: Усмонли сultonи Боязид I Йилдирим назарда тутилган. (–А. А.).

⁴ Мосул – араб Ироқининг шимолидаги катта шаҳар, Жазира ўлкасининг маркази.

бориб тақалгач, (чопар орқали) бор ҳақиқатни менга арз қилдилар. (Бу хабарни) эшитиб ўзим Бағдодга бориб, шаҳар ва қалъани озод этишга қарор бердим. Табриз йўлидан орқага қайтиб, юриш билан Бағдодга келдим ва эҳтиёткорлик билан ҳарбий ҳийалар ишлатиб, қалъани қўлга олишга киришдим. Қамал муддати икки ойу ва яна бир неча кунга чўзилгандан кейингина қалъя билан шаҳар ишғол этилиб, ғалаба қозонилди¹. Қалъя бошлиғи Фараж Дажла дарёсида ғарқ бўлди. Мен шаҳарга кирдим ва барча бебош, бузуки кишиларни қатл этишни, қалъя ва иморатларни бузиб ер билан баробар қилишни бујордим.

Бағдоддан кейин Озарбайжонга келдим ва ўша ерда бир қанча вақт туриб қолдим. Шу аснода Қайсарнинг Ҳалаб, Ҳумс ва Диёрбакр² вилоятларига лашкар фавжларини юборгани ва мендан қочиб унинг паноҳига кирган Қора Юсуф эса қароқчилар бошлиғига айланниб, айниқса, икки муқаддас шаҳар³ зиёратига қатновчиларнинг карвонларига кўп зарар келтираётганилиги хабари қулогимга чалинди. Бунинг устига ўша тарафлардан бир жамоат кишилар келиб, улар ҳам Қора Юсуфнинг жабр-зулмидан арз қилдилар. Шунинг учун унинг жазосини бериб, Қайсарнинг кўзини фафлат уйқусидан очиб қўйишим лозим кўринди. Бу хусусда маслаҳатни шундан топдимки, ҳар бир шаҳар ва қабиладан лашкар тўплаб, Қайсарнинг устига ёпирлиб боргайман. Лашкарлар жам бўлгандан кейин ҳижрий 804 йилнинг ражаб ойида (милодий 1402 йил февралида) Озарбайжондан чиқиб, унга қарши жанг қилиш учун йўлга тушдим. Ўзимдан илгари лашкарим-

¹ «Зафарнома» муаллифи Шарафиддин Али Яздийнинг ёзишича, Амир Темур 1401 йил 9 июлда Бағдодни иккинчи маротаба эгаллаган.

² Диёрбакр – Шарқий Анатолиядаги шаҳар, ҳозир Туркияning жануби-шарқида.

³ Маккай мукаррама ва Мадинаи мунавварага берилган фахрли ном.

дан бир неча фавжини Рум мамлакати устига тўсатдан босқин қилишга тайин этдим. Яна бир неча фавжга эса йўлимиздаги тўхташ манзилларини кўздан кечириб, озиқ-овқатни ҳозирлаб туришни буюрдим. Ўзим Анкурия¹ йўли билан юриш қилдим. Қайсан тўрт юз минг отлиқ ва пиёда аскари билан менга қарши юзланди. Урушни бошладим ва уни енгдим². Қайсанни лашкарбошиларимдан бири қўлга тушириб, ҳузуримга келтириди.

Етти йиллик юришдан сўнг зафар ва нусрат билан Самарқандга қайтдим³.

Иккинчи китоб

Мамлакатларни фатҳ, этгувчи баҳтли фарзандларим ва жаҳонни идора этгувчи қудратли набираларимга маълум бўлсинким, Тангри таоло даргоҳидан умидим шулки, кўплаб фарзандларим, авлоду зурриётим салтанат таҳтига ўтириб, мамлакатларни идора эттай. Шунинг учун салтанат қуриш, давлат тутиш боғида ўзим қўллаган ишларни бир неча Тузукка¹ боғладим ва салтанатни бошқариш ҳақида қўлланма ёзив қолдирдим, токи фарзандларим, авлодим ва зурриётимдан бўлганларнинг ҳар бири унга мувофиқ иш юритсин. Мехнату машаққатлар, кўп ҳарбий юришлар, уруш-талошлар билан, Тангрининг иноятию ҳазрати Мухаммаднинг, унга Тангрининг марҳаматлари ва саломлари бўлсин, толеъни баланд ҳалқининг шарофати, онҳазратнинг улуғвор авлоди, қимматли саҳобаларига бегараз муҳаббатим, дўстлигим орқали қўлга киритган давлат ва салтанатни сақлагайлар.

Бу тузуклардан салтанат ишларини бошқаришда қўлланма сифатида фойдалангайлар, токи мендан уларга етадиган давлат ва салтанат зарару таназзулдан омон бўлгай.


Энди менинг номдор баҳтиёр фарзандларим ва мамлакатларни забт эттувчи иқтидорли набираларимга йўлйўригим шулки, мен ўн икки нарсани ўзимга шиор қилиб олиб, салтанат мартабасига эришдим. Шу ўн

¹ Анкурия – ҳозирги Анқара шаҳрининг ўрта асрлардаги номи.

² Бу жанг 1402 йилнинг 20 июляда Анқара остонасидағи Чимбуқобод мавзеида Амир Темурнинг Боязид Йилдирим устидан қозонган тўла ғалабаси билан якунланган. (–А.А.)

³ Амир Темурнинг Ҳарбий Эрон, Озарбайжон, Кичик Осиё ва Сурияга қилган етти йиллик ҳарбий юриши 1399 – 1404 йилларда рўй берган. Амир Темур 1404 йил август ойида Самарқандга қайтган. (–А.А.)

¹ Тузук – қонун; туркий ҳалқлар орасида амалда бўлган қонун-қоидалар.



икки тузук ёрдамида мамлакатни қўлимда тутиб, салтанатимни бошқардим ва салтанат таҳтига зебу зийнат бердим. Улар ҳам ушбу тузукка амал қилсиллар. Менинг ва ўзларининг давлату салтанатларини эҳтиёт қилсиллар.

Тузуклар жумласидан ўз давлатим ва салтанатимга боғлаган биринчи тузуким шулким, Тангри таолонинг дини ва Муҳаммад мустафонинг шариатига дунёда ривож бердим. Ҳар ерда ва ҳар вақт ислом динини қўллаб-қувватладим.

Иккинчи (тузуким) шулки, ўн икки табақа ва тоифадаги кишилар билан мамлакатни қўлимда тутиб, салтанатимни бошқардим. Давлат, салтанат устунларини ўшалар билан қувватлаб, мажлисларимни шулар билан зийнатладим.

Учинчи (тузуким) шулки, маслаҳат, кенгаш, тадбиркорлик, фаоллик ва ҳушёрлик, эҳтиёткорлик билан ғаним қўшинларини енгиб, мамлакатларни ўзимга бўйсундирдим. Салтанатим ишларини муросаю мадора, мурувват, сабр-тоқат ва чидам билан юргиздим. Кўп нарсани билиб турсам ҳам ўзимни билмасликка солдим, дўсту душман билан муросаю мадора қилдим.

Тўртинчи (тузуким) – давлатим ишларини тўра ва тузукка асосланган ҳолда бошқардим. Тўра ва тузукка таяниб, салтанатда ўз мартаба ва мақомимни мустаҳкам сақлаб турдим. Амирлар, вазирлар, сипоҳ, раяят, ҳар бири ўз лавозим ва мартабасидан мамнун ҳолда хизматимда бўлиб, ундан ортиғига даъвогарлик қила олмади.

Бешинчи (тузуким) – амирларим ва аскарларимни мартабаю унвонлар, олтин-кумуш билан хушнуд этдим. Базмларда уларга (муносиб) ўрин бердим, шунинг учун жангларда жонларини фидо қилдилар. Дириҳам ва динорларни улардан аямадим. Уларнинг юмушларини енгиллашибди учун меҳнату машаққатларини ўзимга юкладим ва уларни тарбият этдим. Амир-

лар, сипоҳсолорлар, баҳодирлар билан иттифоқ, бўлиб, уларнинг мардлигу мардонаворлигига таяниб, шамшир зарби билан йигирма етти подшоҳнинг таҳтини эгалладим. Эрон, Турон, Рум, Мағриб, Шом, Миср, Ироқи араб, Ироқи ажам, Мозандарон, Гилон, Ширвон, Озарбайжон, Форс, Хурсон, Жета Даҳти, Даҳти Қипчоқ, Хоразм, Хўтсан, Кобулистон, Бохтарзамин, Ҳиндистон мамлакатларига подшоҳ бўлиб, ҳукм сурдим.

Салтанат тўнини кийгач, ўз тўшагимда роҳатда ухлаш ҳузур-ҳаловатидан воз кечдим. Ўн икки ёшимдан жаҳонгашталик қисматим бўлди, ранжу меҳнатлар тордим. Ҳар хил тадбирлар қўлладим, (ғаним) фавжларини синдиридим. Амирлар ва аскарларнинг исёнларини кўрдим, улардан аччиқ сўзлар эшитдим. Лекин сабру бардош билан ўзимни эшитмаган, кўрмаганга солиб, уларни тинчтитдим. Қилич қўтариб жанг майдонига отилдим ва вилоятлар, мамлакатларни бўйсундирб, дунёда ном чиқардим.

Олтинчи (тузуким) – адолат ва инсоф билан Тангримнинг яратган бандаларини ўзимдан рози қилдим. Гуноҳкорга ҳам, бегуноҳга ҳам раҳм-шафқат билан, ҳақоният юзасидан ҳукм чиқардим. Хайр-эҳсон ишларим билан одамларнинг кўнглидан жой олдим. Сиёsat ва инсоф билан сипоҳларимни, раиятни умид ва қўрқинч орасида тутиб турдим. Фуқаро ва қўл остимдагиларга раҳмдиллик қилдим, аскарларимга инъомлар улашдим.

Золимдан мазлумнинг ҳақини олдим. Золим етказган моддий ва жисмоний заарларни исботлаганимдан кейин, уни шариатта мувоғиқ иккиси ўртасида муҳокама қилдим ва бир гуноҳкорнинг ўрнига бошқасига жабр-зулм етказмадим.

Менга ёмонликлар қилиб, бошим узра шамшир кўтарғанлар, ишимга кўп зиён етказганларни ҳам, агар улар илтижо билан тавба-тазарру қилиб келсалар, ҳурматлаб, ёмон қилмишларини хотирадан ўчирдим.



Мартабаларини оширдим. Улар билан муомалада шундай йўл тутдимки, агар хотираларида менга нисбатан шубҳаю қўрқув бўлса, бутунлай унтишар эди.

Еттинчи (тузуким) – сайдиллар, уламо, машойих, оқилу донолар, муҳаддислар, тарихчиларни сара, эътиборли одамлар ҳисоблаб, иззату ҳурматларини ўрнига кўйдим. Шижаотли кишиларни дўст тутардим, чунки Тангри таоло жасур кишиларни ардоқлади. Уламо билан сухбатда бўлдим ва пок ниятли, тоза қалбли кишиларга талпиндим. Буларнинг ҳимматларидан улуш тилаб, муборак нафаслари билан дуо-фотиҳа беришларини илтимос қилдим. Дарвиш, фақир ва мискинларни ўзимга яқин тутдим, уларнинг кўнгилларини оғритмадим ва бирон талабларини рад этмадим. Бузуки, оғзи шалоқ, фийбатчи одамларни мажлисимга йўлатмадим, сўзларига амал қилмадим. Бирор кимсага нисбатан тұхмату фийбат қилсалар, қулоқ солмадим.

Саккизинчи (тузуким) – азму жазм билан иш тутдим. Бирор ишни бажаришни ўйласам, бутун зеҳним, вужудим билан берилдим, битирмагунимча ундан қўлимни тортмадим. Ҳар неки десам, унга ўзим амал қилдим. Ҳеч кимга ғазаб билан қаттиқ муомалада бўлмадим ва ҳеч бир ишда танглик қилмадим, токи Тангри таолонинг ғазабига дучор бўлмайин ва ишимни бузиб, ҳолимни танг айламасин деб. Одам Атодан бошлаб то Хотамгача ва ундан то ҳозирги дамгача¹ ўтган сultonларнинг қонунларини ва туриш-турмушларини донолардан сўраб-суриштирдим. Ҳар қайсиларининг йўл-йўриқлари, туриш-турмушлари, қилиш-қилмишлари, айтган гапларини хотирамда сақладим ва яхши ахлоқлари, маъқул сифатларидан ўrnак олиб, уларга амал қилдим. Давлатларининг таназзулга учраши сабабларини суриштирдим ва давлату салтанат заволига

¹ Форсча матнда шундай: «Аз Одам то Хотам ва аз Хотам то ин дам». (—А.А.)

сабаб бўлувчи ишлардан сақландим, наслни бузувчи, очарчилик, вабо касали келтирувчи зулму бузуқчиликдан сақданишни ўзимга лозим билдим.

Тўққизинчи (тузуким) – раият аҳволидан огоҳ бўлдим, улуғларини оға қаторида, кичикларини фарзанд ўрнида кўрдим. Ҳар ернинг табиати, ҳар эл ва шаҳарнинг расму одатлари, мизожидан воқиф бўлиб турдим. Ҳар бир ўлка ва шаҳар аҳдининг ашроф-улуғлари билан дўст тутиндим. Мизожларига, табиатига тўғри келган, ўзлари тилаган одамларни уларга ҳоким қилиб тайинладим. Ҳар бир диёр аҳолисининг аҳволидан огоҳ бўлиб турдим. Ҳар бир мамлакатнинг аҳволини, сипоҳу раият кайфиятини, туриш-турмушкини, қилиш-қилмишларини, булар ўрталаридағи алоқаларни хатта битиб, менга билдириб туришлари учун диёнатли, тўғри ёзувчи кишиларни белгиладим. Бордию эгри ёзганлари менга билдирилса, уларни жазоладим. Ҳокимлару сипоҳдан қай бирининг ҳалқа жабр-зулм етказганини эшитсам, уларга нисбатан дарҳол адолату инсоф юзасидан чора кўрдим.

Ўнинчи (тузуким) – турку тожик, арабу ажамнинг турли тоифа ва қабилаларидан бўлган ва менга нисбатан хайриҳоҳлик қилган кишиларнинг улуғларига ҳурмат кўрсатдим, қолганларини ҳам ўз ҳолига яраша сийладим. Яхшиларига – яхшилик қилдим, ёмонларини эса ўз ёмонликларига топширдим.

Ким менга дўстлик қиласа қадрладим, дўстлигини унутмадим ва унга мурувват, эҳсон, иззату иқром кўрсатдим. Кимки менинг хизматимни қилса, унинг хизмати ҳаққини адо этдим. Кимки менга душманлик қиласаю, кейин пушаймон бўлиб, илтижо билан ҳимоя истаб, тиз чўкиб ҳузуримга келса, душманлигини унтутиб, мурувват ва дўстлик кўрсатдим. Чунончи, улус амири Шер Баҳром аввал менга ҳамроҳ эди, бошимга иш тушганда мени ташлаб кетди ва душманларимга қўшилиб, менга қарши қилич кўтарди. Охири берган



тузим ҳаққи тиз уриб, яна илтижо қилиб келди. Асл эр-йигит экани ва жанг-жадал билан суяги қотган мардлардан бўлганлиги сабабли ёмон ишларининг ҳаммасидан кўз юмдим. Ҳузуримга келгач, ўзини хурматлаб, мартабасини оширдим. Уни марду мардоналиги учун кечирдим.

Ўн биринчи (тузуким) – фарзандлар, қариндошлар, ёру биродарлар, қўшнилар ва мен билан бир вақтлар дўстлик қилган барча одамларни давлату неъмат мартабасига эришганимда унутмадим, (молу мулк ва нақд пул билан) ҳақларини адо этдим. Ўз фарзандларим, қавму қариндошларимдан қариндошлик меҳрини узмадим. Улардан нораво иш ўтган бўлса, дарҳол (кўл-оёғини) боғлаб, ўлдиришга буюрмадим. Ҳар кимни (турниш-турмушнинг пасту баландларида) турли йўллар билан синаб билиб олдим ва уларга шунга яраша муомала қилдим. Ҳаётнинг кўп иссиқ-совуғини кўриб, улардан сабоқ олиб, тажрибани оширдим. Шунинг учун дўсту душман билан келишиб яшадим.

Ўн иккинчи (тузуким) – дўст-душманлигига қарамай, ҳар жойда сипоҳларни хурмат қилдим, чунки улар боқий мато бўлган жонларини фоний дунё моли учун сотадилар. Ўзларини маърака-майдонга, ҳалокатга отиб, жонларини қурбон қиласидар.

Агар ғаним сипоҳидан бирор кимса ўз валинеъматига сидқидилдан хизмат қилиб, уруш кунларида менга қарши қилич қўтарган бўлса ҳам, ундаи одамга нисбатан лутф-марҳаматлар кўрсатдим. Кошимга (паноҳ истаб) келганда, уни қадрлаб, ишончини қозондим, вафодорлиги ва ҳақиқат билан хизмат қилишига ишондим.

Қайси бир аскар туз ҳақи ва вафодорликни унтиб, хизмат вақтида ўз эгасидан юз ўтириб, менинг олдимга келган бўлса, ундаи одамни ўзимга энг ёмон душман деб билдим. Чунончи, Тўхтамишхон билан бўлган урушда унинг амирлари менга хабарлар ва

шикоятлар ёзиб, ўз хукмдори, яъни менинг душманим бўлмиш Тўхтамишхон берган туз ҳақини унудилар. Вафодорлик ва ҳақиқатни бир чеккага йифиштириб қўйиб, менинг ҳузуримга паноҳ истаб келганлари учун уларни лаънатладим, ўзимча, «Булар ўз соҳибига вафо қилмагач, менга қиласиди?» деб ўйладим.

ДИНУ ШАРИАТ ТУЗУКИ

Ўз тажрибамда кўриб билдимки, давлат агар дину тартиб асосида қурилмас, тўра-тузукка¹ боғланмас экан, ундаи салтанатнинг шукуҳи, қудрати ва тартиби йўқолади. Бундай салтанат ялангоч одамга ўхшайдирким, кўрган ҳар кимса (ундан) нигоҳини олиб қочади. Ёхуд ҳар хил қаланғи-қасанғи одамлар тап тортмай кириб чиқадиган томсиз, эшиги-тўсиги йўқ уйга ўхшайди.

Шунинг учун ҳам мен салтанатим биносини исломдини, тўра ва тузук асосида мустаҳкамладим. Салтанатни бошқаришмда учраган ҳар қандай воқеа ва ишни тўра ва тузук асосида адо этдим.

Дилимнинг машриқидан кўтарилган биринчи тузук шундан иборат бўлдики, ислом динини ёйиб, Муҳаммад, унга Тангрининг марҳаматлари ва саломлари бўлсин, шариатини қувватладим. Жаҳоннинг турли мамлакатлари, катта-кичик шаҳарларида ислом динини ва одамларнинг энг хайрлиси (ҳазрати Муҳаммад пайғамбар)нинг тўғри йўлларини тартиб этдим. Ўз салтанатимни шариат билан безадим.

Равшан динга ривож беришда қўллаган биринчи тузуким шу бўлдики, саййидлар орасидан лаёқатли биттасини аҳли исломга бошлиқ – садр этиб тайинладим. Тамом вақфларни² бошқариш ва назорат қилиш

¹ Тўра – бу ерда: тартиб, қоида ёки қонун матьносида (– А.А.)

² Вақф – подшоҳ, ва бой-бадавлат кишилар тарафидан масжидлар, хонақоҳлар, мозорларга ёки айрим йирик дину тариқат арбобларига, уларнинг маоши учун берилган ер-сув, мол-мулк.

учун мутавалли танлашни, ҳар бир шаҳар ва вилоятда қози, муфтий, муҳтасиб тайинлашни унинг ўзига ҳавола қилдим. У сайдилар, уламо, шайхлар ва бошқа арбобларга суюргол¹ белгилаб, ҳар бирининг вазифасини тайин қилсин, дедим.

Лашкар учун маҳсус қози ва раият учун алоҳида қози тайинладим; ҳар мамлакатта шайхулислом юбордимки, токи мусулмонларни гуноҳ ишлардан қайтариб, уларни яхши ва савоб ишларга ундасин. Ноибларимга ҳар бир шаҳарда масжиidlар, мадрасалар, хонақоҳлар қуришни, йўловчи мусофиirlар учун йўл устига работлар солишни, дарёлар устига кўприклар қуришни буюрдим.

Мусулмонларга диний масалалардан таълим бериб, шариат ақидалари, ислом дини илмлари, тафсир, ҳадис, фиқҳдан дарс берсинлар деб, ҳар бир шаҳарга олимлар ва мударрислар тайин қилдим.

Турли мамлакатлардаги садрлар ва қозиларга шариатнинг асосий талаблари қандай бажарилаётганлиги хусусида менга хабар қилиб туришларини буюрдим. Шунга ўхшаш ҳар эл ва ҳар шаҳарда сипоҳ ва раият орасида урф-одатларга оид жанжалли ишлар ҳақида менга маълумот бериб турсин, деб адолат амирини тайинладим.

Шу тариқа ислом динини ривожлантириб, шариатни мусулмон мамлакатларига ёйдим. Ислом динини ёйиб, унга равнақ берганим ҳақидағи овоза каттаю кичик аҳли мўминнинг қулогига етгандан кейин, ислом олимлари: «Тангри таоло ҳар юз йилда Муҳаммад, унга Тангрининг марҳаматлари ва саломлари бўлсин, динига ривож бериш учун бир кишини ислом динининг ёйувчиси ва ривож бергувчиси сифатида ихтиёр этади. Бу саккизинчи юз йиллиқда² Амир

соҳибқирон¹ ислом динини жаҳон аҳлига тарқатди. Шунинг учун бу юз йиллиқда Муҳаммад динига ривож бергувчи зот шу киши бўлғай», деб фатво бердилар.

Замон уламосининг улуғи бўлмиш Мир Сайд Шариф² бу хусусда менга мактуб йўллаб, унда илгариги ва кейинги авлод ислом олимларининг барчаси бир оғиздан иттифоқ бўлиб, Оллоҳи таоло, ҳазрати рисолатпаноҳ Муҳаммад пайғамбаримиз, унга Тангрининг марҳаматлари ва саломлари бўлсин, динига ривож берувчи сифатида ҳар юз йилда бир кишини ихтиёр этади, деб ёзибдурлар. Саккизинчи юз йилликнинг бошида Амир Соҳибқирон дини мубинни ривожлантириди ва ҳар томонга ёйди. Дини ислом оламнинг турли ўлкалари ва шаҳарларида равнақ топди. Ҳақли равищда (бу асрда) диннинг тарқатувчиси Амир Соҳибқирон эканлиги тасдиқланди. Ушбу мактубнинг нусхаси будир:

«Ё, Оллоҳ! Кимки Муҳаммад динини кўллаб-куватласа, Сен ҳам уни қўллагил, кимки Муҳаммад динини хор қилса, Сен ҳам унинг ўзини хор қилғил.

Рисолатпаноҳ пайғамбаримиз ҳижрат этганларидан то шу кунгача саккиз юз йилдан ошди. Ҳар юз йил бошида Оллоҳи таоло ва тақаддус ўз элчиси ҳамда ҳабиби Муҳаммад динини унинг умматига тарқатувчи ва ривож бергувчини ихтиёр қиласи. Оллоҳга ҳамду санолар бўлсинки, саккизинчи юз йиллик бошида Ол-

¹ Соҳибқирон – Амир Темурга замондошлари томонидан унинг толеига қараб берилган ном. Муштариј ва Миррихнинг бир-бирига яқинлашган ҳолати «Қирон буржиги» деб аталади, Амир Темур Муштариј (Юпитер) ва Миррих (Марс)нинг бир-бири билан яқинлашган фурсалларда туғилган, деб ҳисобланади. Эътиқодга кўра, бундай бола келажакда тож-тахт ва баҳт-саодат эгаси бўлади.

² Мир Сайд Шариф Журжоний (1330–1414) – журжонлик машҳур файласуф олим. 1387 йили Амир Темур уни Самарқандга олиб келган ва у Соҳибқирон томонидан қурилган «Дорушшифо» мадрасасида дарс берган.

¹ Суюргол – инъом, совға (ер, мол-мулк).

² Саккизинчи юз йиллик – ҳижрий ҳисоб; милодий XIV аср.

лоҳи таоло Амир Соҳибқиронни ислом динининг ёйувчиши ва ривожлантирувчиси сифатида ихтиёр этди ва у турли ўлкалар ҳамда мамлакатларда ҳалқقا Муҳаммад динини қабул қилдириди. Илк ислом олимлари динни ёйувчилар ва ривожлантирувчилар аҳволини ўрганиб, ўз китобларида бу ҳақда маълумот берганлар. Бу ривож берувчилар қуидагилардир:

Хижратдан кейинги биринчи юз йилликда динга ривож берувчи киши Умар ибн Абдулазиз¹ эди. У хорижийлар² минбардан туриб, ҳазрати Алига таъна қилишиб, лаънатлар ёғдиришиб, ислом динини заифластирганда, бу (низони) бартараф қилди. Ўша вақтда ислом аҳли иттифоқи бузилиб, ўртада кинаю адоват пайдо бўлган эди. Бир тоифа одамлар тўғри йўлдан борган халифаларни лаънатлаб, уларга таънаю дашном ёғдидилар; бошқа бирлари эса мўминлар амири ҳазрати Алини, имом Ҳусайн³ ва ҳазрати Аббосни⁴ лаънатлар эдилар. Бу икки гурух, ҳам ўзаро адоватда бўлиб, ўта мутаассиб эдилар. Умар ибн Абдулазиз бу низоларни бартараф қилиб, ислом динига ривож берди.

Иккинчи юз йилликнинг бошида келган динга ривож берувчи халифа Маъмун ибн Хорун ар-Рашид⁵ эди. У ислом динида пайдо бўлган етмиш икки турли ботил⁶ мазҳабларни йўқотиб, ҳақ мазҳаби – аҳли сун-

¹ Умар ибн Абдулазиз (712–720) – Умавия сулоласи (661–750)га мансуб саккизинчи халифа. Форсча матнда «мураввиж», «мужаддин» истилоҳлари келтирилган.

² Хорижийлар – (араб. «ажралиб чиққанлар»; исёнчилар) – VII асрнинг иккинчи ярмида пайдо бўлган исломдаги гоявий-сиёсий оқим.

³ Имом Ҳусайн – халифа Али ибн Абу Толибнинг кичик ўғли (626–680). Куфада халифа Язид (680–683) аскарлари билан бўлган урушда 680 йил 10 октябрь куни ўлдирилган.

⁴ Ҳазрати Аббос – Муҳаммад пайғамбарнинг амакиси ал-Аббос ибн Абдулмутталиб. (–А.А.)

⁵ Маъмун ибн Хорун ар-Рашид (813–833) – машхур халифа Хорун ар-Рашид (786–809)нинг ўғли ва таҳт вориси, Аббосийлар сулоласидан етгинчи халифа.

⁶ Ботил – бекор қилинган, бузук, ёлон.

нат ва жамоатни ривожлантириди. Али ибн Мусо Жаъфарни¹, ундан Оллоҳ рози бўлсин, Хуросондан олиб келиб, уни ўзига валиаҳд деб эълон қилди. Унинг изни ва маслаҳати билан мамлакатда ҳукмронлик қилди.

Учинчи юз йиллик бошида дини Муҳаммадийга ривож бериб равнаққа етказган халифа Муқтадир Биллоҳ, Аббосий² эди. Абу Тоҳир бошчилигидаги қарматлар³ Маккан муazzамани босиб олиб, арафа куни ҳажга борганлардан ўттиз мингтасининг жонига қасд қилдилар ва уларни шаҳид этдилар. Муқаддас қора тошни⁴ Каъба деворидан суфуриб олдилар. Ислом мамлакатларини вайрон этиб, (халқни) қатлиом ва талон-торож қилдилар. Шу сабабдан ислом дини заифлашиб қолди. Муқтадир Биллоҳ бу қавм устига лашкар тортиб, уларни улоқтириб ташлади (ва фитнани бостириди). Бу билан ислом дини ва шариатига ривож берди.

Тўртинчи юз йилликнинг бошида дини Муҳаммадийни ривожлантирган киши Иззуддавла Дайламий⁵ эди. Шу даврнинг халифаси аббосий Мутиъ Амриллоҳ⁶ (ҳукмронлиги вақтида бўлган) кину адоватлар ҳамда унга тобеъ кишиларнинг зулми оқибатида дини ислом заифлашган ва ислом мамлакатларида турли туман фисқ-фасод кўпайган эди. Иззуддавла бу халифани таҳтдан йиқитиб, ўрнига ўғли Ат-тоиъ Биллоҳни⁷ валиаҳд қилди. Иззуддавла шахсан ўзи бу динни тарқатиш ва тозалашда, бидъатни йўқотища, ношаръий

¹ Али ибн Мусо Жаъфар (765 ёки 770 – 818) – Муҳаммад пайғамбар авлоди.

² Муқтадир Биллоҳ Аббосий (908–932) – Аббосийлар хонадонига мансуб ўн тўққизинчи халифа.

³ Қарматлар – исмоилийлар мазҳаби шоҳобчаларидан бирининг тарафдорлари, IX асрда Ироқнинг жанубида пайдо бўлган.

⁴ Матнда «ал-ҳажар ал-асвад».

⁵ Иззуддавла Дайламий – Бувайхийлар сулоласидан (932–1062) чиққан ва Ироқда 967–978 йиллари ҳукмронлик қилган подшоҳ.

⁶ Мутиъ Амриллоҳ (946–974) – Аббосий халифалардан бири.

⁷ Ат-тоиъ Биллоҳ (974–991) – Аббосий халифалардан.



ишларни бартараф этишда, жабр-зулмни тутатища мутасадди бўлди. Муҳаммад динига ривож берди.

Бешинчи юз йиллик бошида дину шариатни ривожлантирган одам Султон Санжар ибн султон Маликшоҳ¹ эди. Шайх Аҳмад Жом² ва Ҳаким Саноий³ унинг замондошлари бўлиб, султон уларнинг муриди эди. Бу даврда динсизлар ва жоҳиллар ислом динини заифлаштирилар. Султон Санжар динсизларни йўқотиб, ислом динини ривожлантиришга киришди. Муҳаммад динига итоат ва тобелиқда шундай даражага эришдики, шариатта хилоф бўлган ҳеч бир иш қилмади.

Олтинчи юз йилликнинг бошида динга ривож бергувчи Фозонхон ибн Арғунхон ибн Ҳулогухон⁴ эди. Ислом дини туркистонлик кофиirlарнинг⁵ истилоси натижасида заифлашган эди. Оллоҳи таоло дин ривожи учун Фозонхонни юз минг аскари билан оёққа турғизди. (Тангри таолонинг иродаси билан унга топширилган) юз минг аскар Лор саҳросида шайх Иброҳим Ҳамавий⁶ раҳнамолигида Оллоҳга иймон келтириб, мусулмон бўлдилар. Тилларини: «Оллоҳдан бошқа худо йўқ, Муҳаммад Оллоҳнинг (ердаги) элчисидир», деган иймон калимасига очдилар ва куфр-бидъат ишларини

¹ Султон Санжар ибн султон Маликшоҳ (1118 – 1157) – 1038 – 1194 йиллари Эрон билан Ироқни идора қилган Салжуқийлар сулоласи вакили.

² Аҳмад Жом (1049 – 1142) – хурносонлик машҳур ҳадис олими ва мутасаввиф шоир.

³ Ҳаким Саноий (1070 – 1140) – Фазнавийлар сулоласи даврида яшаган йирик мутасаввиф шоир.

⁴ Гозонхон ибн Арғунхон ибн Ҳулогухон (1295 – 1304) йилларда Эрон, Озарбайжон ва Ироқни идора қилган, тарихда Элхонийлар номи билан машҳур бўлган мӯғул сулоласи вакили. Ислом динини қабул қилиб, қатор ижтимоий-сиёсий ислоҳотлар ўтказган.

⁵ «туркистонлик кофиirlар...» – бу ерда Мовароуннахр, Эрон, Озарбайжон ва бошқа мамлакатларни истило қилган (ХІІІ аср) Чингизхон кўшинлари назарда тутилган.

⁶ Шайх Иброҳим Ҳамавий – хурносонлик йирик шайх Садриддин Иброҳим назарда тутилмоқда.

ташладилар. Мамлакатда ва шаҳарларда шариатга ривож бердилар.

Еттинчи юз йилликнинг бошида келган Улжайту Султон¹ ибн Арғунхон, лақаби Султон Муҳаммад Худобанд эди. Мазкур санада² оғаси Фозонхондан сўнг салтанат таҳтига ўтириди. (Бир куни) унинг қулогига «Дини Муҳаммадий шу қадар бўшашибганки, намоз вақтида мусулмонлар ташаҳҳуддан³ сўнг Муҳаммадга, унинг авлодига салавот айтмай қўйибдилар», деган гап етказилди. У ўрнидан туриб Султония⁴ жоме масжидига борди ва у ерга ислом уламоси ҳозир бўлишини буюрди. Сўнгра султон улардан: «Намоз вақтида Муҳаммадга ва унинг наслу авлодига салавот айтишнинг нима фазилатлари бор?», – деб сўради. Улар бир овоздан: «Худойи таоло ҳукмига кўра, намозда Муҳаммад ва унинг авлодига салавот айтиш лозимдир», – деб жавоб бердилар. Ўша пайт бир гуруҳ, уламо: «Имом Шофиъий⁵, Муҳаммадга ва унинг авлодига салавот айтмасдан ўқилган намоз бузилган ҳисобланади, деб айтгандар», – деб ўз фикрини билдириди. Яна бир гуруҳи айтдиларким: «Имоми Аъзам⁶ демишдирки, Муҳаммадга ва унинг авлодига салавот айтилмай ўқилган намоз макруҳдир⁷».

¹ Улжайту Султон (1304 – 1317) – Элхонийлардан. Мусулмон бўлгани учун Султон Муҳаммад Худобанд номи билан танилган.

² 1304 йил назарда тутилмоқда.

³ Ташаҳҳу (араб. гувоҳлик) – Оллоҳнинг ягоналиги ва Муҳаммад пайғамбарнинг элчилитини билдирувчи диний ибора; ислом динидаги 5 асосий арконнинг биринчиси; кўпинча «калима шаҳодат» дейилади.


⁴ Султония – Элхон Улжайтухон қурдирган шаҳар, Ҳулогуйлар пойтахти.

⁵ Имом Шофиъий – суннийликда шофиъийлик мазҳабининг асосчиси ва бош имоми, фақиҳ. Асли исми Абу Абдулоҳ (767 – 820).

⁶ Имоми Аъзам (улуғ имом) – суннийликдаги тўрт мазҳабдан бири ҳисобланган ҳанафийлик мазҳабининг асосчиси. Асл исми Абу Ҳанифа Нуъмон ибн Собит (699 – 767).

⁷ Макруҳ (араб. – рад этилган, қораланган, номақбул) – шариат ҳукмларидан бирни (фарз, маңдуб, мубоҳ, ҳаром билан бирга). Қатъиян тақиқ қилинмаган, лекин номақбул ҳисобланган ва рад этилган амаллар макруҳ, ҳисобланган, бундай хатти-ҳаракат учун жазо белгиланмаган.





Шунда султон уламодан сўради: «Нега салавот айтганда пайғамбаримизнинг наслу авлодидан бўлган ҳар бир кишининг исми (алоҳида) зикр этилмайдио, (фақат) хотам ул-анбиё бўлмиш пайғамбаримизга салавот айтгандагина «ва унинг авлоди...» деб қўшадилар?». Бутун уламо бу саволга жавоб беришга ожизлик қилиб, ўйланиб қолишибди. Шунда султон айтди: «Бу саволга жавоб беришда хотиримга икки далил келади. Биринчиси шулки, душманлар пайғамбаримиз Муҳаммадни ўғисиз (абтар) деб атадилар. Тангри таоло наслсизликни уларнинг ўзига раво кўрди. Дунёдан насллари узилди. Агар насл қолган бўлса ҳам ном-нишонсиз бўлиб, уларнинг номини бирор киши тилга олмайди. Аммо пайғамбаримиз оиласининг зурриётлари сони шу қадар ўсдики, уларнинг ҳисобини Оллоҳдан бошқа ҳеч ким билмайди. (Шунинг учун) пайғамбаримизга, унга Оллоҳнинг марҳаматлари ва саломлари бўлсин, салавот айтгандан кейин уларга ҳам (Оллоҳдан) яхшилик тилайдилар. Иккинчиси шулки, ўтган барча пайғамбарларнинг динлари, қилган ишлари ё йўқоларди ёки ўзгаради. Улардинининг аҳкомлари доимий эмас эди. Аммо ҳазрати Муҳаммад, унга Оллоҳнинг марҳаматлари ва саломлари бўлсин, дини ўзгаришдан омон бўлиб, қиёматтacha шу йўлда сақланур. Шундай бўлгач, онҳазрат (пайғамбар)нинг умматлари салавот айтиш вақтида, унинг муборак номини зикр эттан пайтда, унинг авлодини ҳам эслашлари лозимdir. Умматларга маълум бўлсинким, Муҳаммад динининг ҳомийлари, Куръони каримни шарҳловчилар, мақтovга лойиқ шариат илмининг ҳофизлари, пайғамбарлик илмининг ворислари айнан шу кишилардир. Мусулмон динининг илмлари ва исломнинг фарзу вожибларини улардан ўргансинлар, уларга эргашиб, ҳурмат қилишни бурчларидан бири деб билсинлар», – деди.

Султон шу сўзларни айтгани ҳамоно, масжида тўпланган уламо ва одамлар бирданига гулдиратиб, пай-

ғамбарга ва унинг авлодига салавот ўқидилар. Шунда султон айтди: «Муҳаммад авлодидан биринчиси – ҳазрати Али, сўнгтиси – имом Муҳаммад Маҳдий охирзамондир. Шундай бўлгач, пайғамбаримиз авлодининг изни ва рухсатисиз унинг мулкини ўз тасарруфимизга киритмаслигимиз зарур, акс ҳолда босқинчилик қилган бўламиз».

Султоннинг бу сўзлари хосу оммнинг қулогига эшистилгач, барча уламо унинг айтгандарини қабул этди. Гаплари инобатта олинганидан сўнг, султон амр қилди: «Ҳақиқат шул эркан, аҳли байт¹ номига хутба ўқиб, уларнинг номи зарбланган пуллар чиқариш лозим». Бу гапларни эшигтган, кўрган уламо унинг фикрини тасдиклаб, Оллоҳга иймон келтирдилар ва «Улжайту Султон – дину шариатта ривож берувчи», деб фатво ёздилар.

Саккизинчи юз йиллиқда чиққан зот динни ривожлантириб равнаққа етказувчи Амир Соҳибқирондирки, оламнинг турли мамлакатлари ва шаҳарларида дину шариатни ривожлантириди; саййидлар ва уламони иззату икром қилди. Пайғамбар хонадони зурриётларининг изни ва рухсати билан унинг мулкини ўз тасарруфига киритди...

Мир Сайийд Шариф ёзган ушбу мактуб менга етгач, Тангри таолога шукр айтиб, Муҳаммад ва унинг хонадонига илтижо қилиб, Тангри таолога ёлвордим: «Менга дину шариатни ёйиш ва унга ривож беришда куч-қувват ато этгил!» Сўнг бу мактубни олиб, пиримнинг ҳузурларига юбордим. (Ул зот) мактуб ҳошиясига мана бу сўзларни ёзиб менга қайтардилар: «Дину шариатта ривож берувчи (Амир) Темур Соҳибқиронга, Оллоҳ, уни қўлласин, маълум бўлсинким, бу иш улқутби салтанатта Оллоҳи таоло тарафидан берилган

¹ Аҳли байт – Муҳаммад пайғамбар хонадонига мансуб, умуман эса, яқин кишилар тушунилади.



жуда катта эҳсон ва буюк ёрдамдир. Динни ёйиш, шариатга ривож беришдек улкан ишда Тангри таоло сенга ёрдам бағишиламиш. (Садоқату ихлосинг ва яхши ишларингни) қанча кўпайтирсанг, Оллоҳ ҳам сенга (иноят ва қарамини) шунча оширгай».

Пиримга юборган ушбу мактуб, унинг хати билан зийнатланиб менга қайтгач, саййидлар ва уламони иззату икром этишни бажо келтириб, шариат ривожи учун илгаригидан ҳам кўпроқ саъй-ҳаракат қилдим. Бу мактубни (бошимдан кечмиш) воқеалар дафтарига¹ ёзишларини буюрдим.

МАМЛАКАТ ИШЛАРИ ТУЗУКИ

Дину шариат ишлари тузукини тартибга келтирганимдан кейин, салтанатим корхонасининг тузукини тузишга киришдим. Салтанат ишларини қонун ва қоидалар, тўра ва тузукка солиб, салтанатим марта-баю эътиборини сақладим. Салтанатим обрў-марта-басини сақлаш тузуклари қўйидагилардир.

Биринчидан, салтанатим қонун-қоидаларини ислом дини ва кишиларнинг энг хайрлиси (ҳазрати Мұхаммад)нинг шариатига боғлаб, иззату ҳурматлаш во жиб бўлган онҳазратнинг авлоди ва саҳобаларига муҳаббат билдириш асосида туздим. Салтанатим марта-басини тўра ва тузуклар асосида шундай сақладимки, унинг ишларига аралашибга ҳеч бир кимсанинг қурби етмасди.

Иккинчидан, сипоҳу раиятни умид ва қўрқув орасида сақладим. Дўст-душманни муросаю мадора марта-басида тутдим. Қилмишларини, айтган гапларини

¹ Воқеалар дафтари – подшоҳликда ҳар куни бўлиб турадиган воқеалар ёзib борилган маҳсус дафтар, кундалик. Асар матнида «Дафтари вақое». «Темур тузуклари» асари қатор шарқ қўлёзмалари каталогларида «Вақое», «Воқеот» деб ҳам номланган. «Бобурнома» асари ҳам кўпгина шарқ қўлёзмалари каталогларида шу ном билан келтирилган.

сабр-тоқат ва чидам билан ўтказдим. Дўст-душмандан кимки менга илтижо қилиб келса, дўстларга шундай муомала қилдимки, дўстлиги янада ортди, душманларга эса шундай муносабатда бўлдимки, уларнинг душманлиги дўстликка алмашди.

Менда бирон кимсанинг ҳақи бўлса, ҳақини ҳеч вақт унутмадим. Бирон кимса билан танишган бўлсам, уни ҳеч вақт назаримдан четда қолдирмадим. Давлатим ва салтанатим қуёши кўтарилиб келаётган вақтда менга илтижо қилиб келган яхши-ёмон одамлар, хоҳ яхшилик, хоҳ ёмонлик қилган бўлсин, салтанат тахтига ўтирганимдан кейин уларни хайр-эҳсонларим билан хижолатта қўйдим. Ўзимни уларнинг ёмонликларини унугтандек тутиб, ёмон қилмишлари дафтари устига афв қаламини тортдим.

Учинчидан, ҳеч кимдан ўч олиш пайида бўлмадим. Тузимни тотиб, менга ёмонлик қилганларни Парвардигори оламга топширдим. Иш кўрган, синалган, шижаоатли эр-йигитларни қошимда тутдим. Софдил кишилар, саййидлар, олимлар ва фозилларга даргоҳим доим очиқ эди. Нафси ёмон ҳимматсизларни, кўнгли бузук қўрқоқларни мажлисимдан қувиб юбордим.

Тўртинчидан, очиқ юзлилиқ, раҳм-шафқат билан ҳалқни ўзимга ром қилдим. Адолат билан иш юритиб, жабр-зулмдан узокроқда бўлишга интилдим.

Шу пайтда пиримдан¹ хат келди. Улар бундай ёзибдилар: «Буюк зафарлар соҳиби Амир Темурга, Оллоҳ уни ҳамиша қўлласин, маълум бўлсинким, (унинг) салтанати корхонаси Тангри таоло корхонасининг бир (кичик) нусхасидурки, унда турли мансабдаги ходим ва хизматкорлар, ноиблар, эшик оғалари бордир, уларнинг ҳар бири марта-басига яраша ўз юмуши билан машғулдир, ҳеч бири ўз марта-басида туттага чиқмайди ва доимо Оллоҳнинг амрига мунтазир туради. Шундай

¹ Мир Сайид Барака тахмин қилинади. (–А.А.)



экан, сен ҳамиша хушёр ва эҳтиёткор бўл, токи вазирлар, лашкарбошилар, амалдорлар, иш юритувчилар, сипоҳсолорлардан ҳеч бири ўз мартабаси чега-расидан чиқмасун ва доимо сенинг ҳукмингни кутиб туришсун. Ҳар тоифа ва ҳар қавмни ўз мартабаларида тутгинки, (бу билан) салтанатинг низомга келиб, давлат интизомга киргай. Агар ҳар нарсани ва ҳар кимни ўз мартабасида сақлай олмасанг, салтанатингга бундан кўп халалу зиён еттай. Демак, ҳар кимнинг қадр-қийматини, тутган мавқеини, ҳар нарсанинг ўлчовини белгилаб олишинг ва шунга мувофиқ иш юритишинг керак.

(Ҳазрати) Мұхаммад авлодидан бўлғанларнинг мартабасини бошқалардан юқори кўтариб, уларнинг иззат-ҳурматини ўрнига қўйгил. Уларга қанча кўп муҳаббат билдиранг ҳам, уни исроф деб ўйлама, чунки қайси иш худо йўлида бўлса, унда исроф йўқдир. Ўн икки тоифа билан давлатингта зийнат бериб, шулар билан салтанат қургил. Вассалом».

Пиримнинг ушбу мактуби менга етгач, унда буюрилган ҳар бир нарсани бажо келтирдим. Салтанатим ишларини тартиб-интизомга солиб, салтанатим мартабасига тўра ва тузук билан зебу зийнат бердим. Салтанатимни ўн икки тоифадаги кишилар билан мустаҳкамладим.

Салтанатим мартабаси бўлмиш тўра-тузуклар ва қонун-қоидаларни ҳам шу ўн икки тоифага боғлаб туздим. Бу ўн икки тоифани салтанатим фалакининг ўн икки буржи ва давлатим корхонасининг ўн икки ойи деб ҳисобладим.

Биринчи тоифа – сайдилар, уламо, шайхлар ва фозилларни ўзимга яқинлаштиридим. Улар менинг саройимга доимо келиб-кетиб, мажлисларимни безаб туришарди. Диний, ҳуқуқий, ақлий масалаларни ўртага ташлаб, қимматли фикрлар билдиришарди. Ҳалол ва ҳаромга оид масалаларни мен улардан ўргандим.

Иккинчи тоифа – ақли кишилар ва кенгаш соҳиблари, эҳтиёткор, қатъиятли арбоблар, кейинини ўйлаб, олисни кўриб иш юритувчи, кекса ва тажрибали кишиларни хос мажлисимга киритиб, уларнинг суҳбатларидан, ишларидан наф олиб, тажрибалар ҳосил қиласардим.

Учинчи тоифа – дуогўй кишиларни қадрладим. Хилватда улардан дуолар тилаб, истакларимнинг бажо этилишини ўтиниб сўрадим. Мажлисларда, йиғинлар, базмлар ва жанг майдонларида улардан кўп баракотлар топдим. Чунончи, менинг лашкарим Тўхтамишхон лашкарининг кўплигини кўриб саросимага тушиб қолганда, соҳиби дуо бўлмиш Мирзиёуддин Сабзаворий¹ бошидан салласини олди; кўлларини дуога очиб (мен учун) Тангридан зафар тилади. Ҳали дуоси тугамай, дуо таъсири кўринди ва лашкарим ёғийни қочирди.

Яна бир мисол шулки, саройим ҳарамидагилардан бири қаттиқ бетоб бўлиб, ўлими яқинлашди. Дуогўй сайдилардан ўн икки киши йиғилишиб келдилар. Ҳар бири ўз умридан бир йилни унга бағишлади ва у сорайиб яна ўн икки йил умр кўрди.

Тўртинчи тоифа – амирлар, сарҳантлар², сипоҳсолорларга мажлисимдан ўрин бериб, мартабаларини юқори кўтардим. Улар билан суҳбатлашиб, маслаҳатлар олдим.

Жанг майдонида мардона қилич чопишган шижжатли жасур кишиларни хуш кўрардим; жанг майдонларига от чоптириб кириб-чиқиш усулларини, фаним лашкари тўпини бузиб, сафларини синдиришни, найза санчиб, қилич чопишни улардан сўрар эдим. Си-

¹ Низомиддин Шомий ва Шарафиддин Али Яздий «Зафарнома»-ларида Мир Сайдид Барака номи келтирилади. (—А.А.)

² Сарҳанг – (форс. қўшин қўмондони) – саркарда; Бу атама таржимон Абу Толиб Ҳусайний ат-Турбатий томонидан кўлланган бўлиши мумкин.

поҳгарлик ишларида уларга ишониб кенгаш сўрар эдим.

Бешинчи тоифа – сипоҳ, ва раият бўлиб, ҳар иккисига бир кўз билан қарадим. Сипоҳийлардан чиққан баҳодирлар, довюракларга махсус фахрли ўтог¹, камар ва ўқдон тақдим этиб, мартабаларини кўтардим.

Ҳар мулк ва мамлакатнинг беклари, улувлари, бошлиқ – оқсоқолларини² ҳурматладим; уларга совфа-саломлар бериб, хизматларидан фойдаландим. Сипоҳийларимни ҳамиша жангта тайёр ҳолда тутдим; ойлик ҳақларини сўраттиrmай вақтида берардим. Чунончи, Рум юришида сипоҳийларимга ўтган ва келажақда қиладиган хизматлари учун етти йиллик озиқ-овқатларини бирваракайига бердим. Сипоҳ, ва раиятни шундай тутдимки, биронтаси иккинчисига зулм кўрсатиб, оёқости қилолмас эди. Бошқа сипоҳийларни ўз мартабаларига ва даражаларига қараб шундай сақладими, улар ҳаддидан ошиб ортиқча қадам қўёлмасди. Уларнинг мартабаларини на кўп кўтариб ҳовлиқтиридим ва на кўп тушуриб кўнгилларини чўқтиридим. Қайси бири бирор хизмат кўрсатар экан, инъомлар бериб, бошқалардан айрича ҳурматладим.

Кимнинг ақли ва шижаотини синов тарозусида тортиб кўриб, бошқаларнидан ортиқроқлигини кўрсам, уни тарбиямга олиб, амирлик даражасига кўтарар эдим. Сўнgra кўрсатган хизматларига яраша мартабасини ошириб борардим.

Олтинчи тоифа – ишончли, тўғри эътиқодли оқилхирадманд кишиларким, давлат сирларини уларга очиб, салтанат ишлари бўйича улардан маслаҳат олишимга лойик эдилар. Бу тоифа кишилар билан сирдошлиқ қилиб, ўз махфий ишларим ва пинҳоний сир-асроримни ўшаларга топширидим.

¹ Ўтог – яъни ўтов, бу ерда махсус жиҳозланган ўтов назарда тутилади. (–А.А.)


² Матнда «Калонтарон ва қадхудоён».

Еттинчи тоифа – вазирлар, девон котиблари ва муншийларки, салтанатим саройини шулар билан бе-затдим. Буларни менга тобеъ мамлакатларни кўрсатувчи кўзгу деб билдим. Чунки улар ҳар мулк – мамлакат, сипоҳ, ва раият воқеаларини менга билдириб турдилар. Булар давлат хазинаси, сипоҳ, ва раиятга оид ишларни тартибга солиб юритдилар. Салтанат мулкига тушган рахналарни беркитишнинг лойик чораю тадбирларини кўрдилар. Салтанатим корхонаси хазинасининг кирим ва чиқимиға оид ишларни тўғри олиб бордилар. Ҳамиша мамлакатда тўқинчилик ва унинг ободдиги учун ҳаракат қилдилар.

Саккизинчи тоифа – ҳакимлар, табиблар, мунахжимлар ва муҳандисларки, улар салтанат корхонасига ривож берувчилардир. Уларни ўз атрофимга тўпла-дим. Ҳакимлар ва табиблар билан иттифоқда беморларни даволатар эдим. Мунахжимлардан сайёralарнинг қутлуғ-қутсиз қунлари, уларнинг ҳаракати ва осмонда айланишини аниқлаб олардим. Муҳандислар билан иттифоқда олий иморатлар барпо этиб, бофу бўстонларнинг тарҳини чиздирадим.

Тўққизинчи тоифа – муҳаддислар, (пайғамбар, унинг авлодлари ва саҳобалари) ҳақида ривоятлар нақл қилувчилар ҳамда қиссаҳонлар бўлиб, уларни ҳам ўзимга яқинлаштиридим. Пайғамбарлар ва авлиёлар ҳақидаги қиссаларни, ўтган подшоҳлар тўғрисидаги хабарларни, уларнинг салтанат таҳтига қандай етишганларини, давлатларининг қандай сабабларга кўра завол топганини улардан сўраб билардим. Ҳар қайси-сининг қиссалари ва хабарлари, ишлари ва сўзларини эшитиб тажрибам ортди. Оламда бўлаётган воқеаларни улардан эшитардим ва жаҳон аҳди аҳволидан хабар топар эдим.

Ўнинчи тоифа – машойихлар, сўфийлар, (Худони таниған) орифлардир. Уларнинг хизматларида бўлиб, сухбатлар курдим ва охират фойдаларини олдим. Улар-



дан Тангри таолонинг сўзларини эшитиб, кароматлар кўрдим, мўъжизаларини мушоҳада этдим ва сухбатларидан роҳатланиб, ҳузур қилдим.

Ўн биринчи тоифа – касбу ҳунар эгалари; буларнинг ҳар тоифа ва синфидан бўлғанларини давлатхонамга олиб келиб, ўз ўрдамдан ўрин белгиладимки, сафардаю турғунлиқда сипоҳимга керак яроқлар ҳамда бошқа жиҳозларни ҳозирладилар.

Ўн иккинчи тоифа – ҳар мамлакат ва диёр саёҳатчиларию мусофиirlарининг бошини силадим, улар турли мамлакатлардан менга хабар келтириб турдилар. Ҳар бир мамлакату диёрга савдогарлар ва карвонбошилар тайинладимки, улар Хўтан, Чину Мочин¹, Ҳиндистон, араб мамлакатлари, Миср, Шом, Рум, Жазоир, Фарангистонгами², қаерга боришмасин, у ерларнинг нафис матолари ва муносиб тухфаларидан келтирсинглар. Ўша мамлакатларда истиқомат қилувчи кишиларнинг ҳол-аҳволи, туриш-турмуши ҳақида менга хабар олиб келсинлар. Ҳар бир мамлакат ҳукмдорининг ўз раиятига қандай муомалаю муносабатда эканлигини аниқласинлар.

МЕНИНГ ДАРГОҲИМГА ИЛТИЖО ҚИЛИБ, ПАНОҲ ИСТАБ КЕЛГАН ТУРКУ ТОЖИК, АРАБУ АЖАМ ТОИФАЛАРИДАН БЎЛГАНЛАР ҲАҚИДАГИ ТУЗУК

Биринчи навбатда, мазкур тоифа ва табақалардан бўлган саййидлар билан уламони иззат-хурмат қилишни, ҳар қандай истаклари бўлса дарҳол муҳайё этиб, муқаррар равишда уларнинг аҳволидан хабардор бўлиб туришни буордим. Агар сипоҳийлар тоифасидан бўлса-

¹ Чину Мочин – Шарқ қўлёзмаларида одатда Хитой назарда тутилади. (–А.А.)

² Фарангистон – кенг маънода Фарбий Европа, тор маънода Франция. (–А.А.)

лар, хизмат ўринларини белгилаб, ҳол-аҳволларига яраша эҳтиёжлари таъминлансан. Агар касбу ҳунар ва маърифат аҳлларидан бўлсалар, бундайларга салтанат корхоналаридан юмуш берилсин. Булардан бошқа билагида кучи бор фақир-мискинлар эса ўз аҳволи ва касбу корига қараб иш тутсинглар. Яна шундай амр қилдимки, сармояси қўлидан кетиб қолган савдогарга ўз сармояси ни қайтадан тиклаб олиши учун хазинадан етарли миқдорда олтин берилсин. Дехқонлар ва раиятдан қайси бирининг дехқончилик қилишга қурби етмай қолган бўлса, унга экин-тикин учун зарур уруғ, асбоб (мехнат куроли) тайёrlаб берилсин. Агар фуқародан бирининг ўй-иморати бузилиб, тузатишга қурби етмаса, керакли ускуналар билан таъминлансан ва ёрдам берилсин.

Ҳар тоифа ва ҳар синфдан кимки ўз ихтиёри билан сипоҳийлик хизматига киришни истаса, уни ҳарбий (хизмат)га олсинлар. Асил ва шиҷоатли сипоҳийзода қайси тоифадан бўлмасин, унга ўрин бериб, хизматига ва ишига яраша тарбият қилсинлар.

Яна амр этдимки, узоқ-яқиндан бирон киши келиб, менинг мажлисимга кирап экан, қайси тоифадан бўлса ҳам, давлатим дастурхони неъматидан уни маҳрум қилмасинлар.

Кимки ҳузуримга киритилса ва кўзим унга тушса, ҳолига яраша ҳурматлаб, совға-саломлар билан кузатсинглар. Ҳар қандай одам менинг адолат девонимдан паноҳ, топган экан, гуноҳи бўлса ҳам, уни кечирсинглар. Иккинчи, учинчи марта яна гуноҳ йўлига кирса, у ҳолда гуноҳига яраша жазоласинлар.

САЛТАНАТНИ ЎЗ ТАСАРРУФИМДА САҚЛАШ УЧУН АМАЛ ҚИЛГАН ТУЗУКИМ

Ушбу ўн икки тузукни ўзимга шиор қилиб олганимдан кейин катта ишончу салобат билан салтанат тахтига ўтирдим. Ўз тажрибамдан синааб билдимки, агар

қай бир подшоҳ шу ўн икки нарсага эга бўлмас экан, салтанатдан бебахра қолур.

Биринчидан. Подшоҳ, ўз сўзига эга бўлсин, ишини ўзи билиб қилсин, яъни сипоҳ ва раият подшонинг айтган сўзини, қилган ишини ўзи айтади, ўзи қилади, ҳеч кимнинг бунга дахли йўқ, деб билсин. Шундай бўлгач, подшоҳ бирор кимсанинг салтанат мартабасига шерик бўлгудек қилиб айтган гапига ва қилган ишига эргашмасин. Гарчи яхши сўзни ҳаммадан ҳам эшитиш зарур бўлса-да, лекин бошқалар сўзда ва салтанат ишларида подшоҳга шерик ёхуд ундан устун бўлмасликлари шарт.

Иккинчидан. Султон ҳар нарсада адолатпарвар бўлсин, қошида инсофли, адолатли вазирлар тутсин, токи подшоҳ зулм қилгудек бўлса, одил вазир унинг чорасини топсин. Аммо агар вазир золим бўлса, кўп вақт ўтмай салтанат уйи қулади. Чунончи, амир Ҳусайннинг золим бир вазири бор эди. У сипоҳу раиятга ноҳақ жарималар солар эди. Орадан кўп вақт ўтмай ўша ноинсоф вазирнинг шумлигидан амир Ҳусайннинг салтанат уйи хароб бўлди.

Учинчидан. Бутун мамлакатда буйруқ ва тақиқлашлар подшоҳнинг ўз ихтиёрида бўлиши лозим. Подшоҳ ҳар ишда ўзи хукм чиқарсин, токи ҳеч ким унинг хукмига аралашиб, ўзгартира олмасин.

Тўртингчидан. Подшоҳ, ўз қарорида қатъий бўлсин, яъни ҳар қандай ишни қилишга қасд қилар экан, уни бекор этмасин ва то битирмагунича ундан қўл тортмасин.

Бешинчидан. Подшоҳ ҳукми жорий этилиши зарур, яъни қандай ҳукм чиқаришидан қатъи назар, амалга оширилиши керак. Бирон кимса гарчи ҳукмни зарарли деб билган бўлса ҳам, унга монелик қиломасин. Чунончи, эшитганманки, султон Маҳмуд

Фазнавий¹ Фазна² шаҳри майдонига катта тошни келтириб қўйишни буюрган экан. Ундан ўткинчи-кеткинчиларнинг от-увовлари ҳуркиб ўта олмай қолибди. Шунда одамлар тош йўл бўйидан олиб ташланса, деб султон ҳузурига қанчалик арз-шикоят қилиб боришимасин, султон: «Чиқарган ҳукмимдан қайтмайман, унга хилоф бирон иш ҳам қилмайман», – деган экан.

Олтинчидан. Подшоҳлик ишларини тамоман бошқага топшириб, эркни унга бериб қўймасинким, дунё бевафо хотин каби, унинг хуштори кўпdir. Агар шундай қилар экан, ўзганинг нафси тез орада подшоҳ бўлишни тилаб, салтанат таҳтини ўзи эгаллашга киришади. Чунончи, султон Маҳмудга хоинлик қилган вазирлар уни салтанат таҳтидан тушириб, таҳтни ўзлари эгалладилар³. Шундай бўлгач, салтанат ишларини ишончли ва мўътабар бир неча кишига бўлиб бериш лозим. Шунда ҳар бири ўз ишига боғланиб, салтанат таҳтига кўз олайтира олмайди.


Еттинчидан. Салтанат ишларида ҳар кимнинг сўзини эшитсан, ҳар кимдан фикр олсин. (Лекин) қайси бири фойдалироқ бўлса, уни кўнгил хазинасида сақлаб, вақтида ишлатсан.

Саккизинчидан. Салтанат ишларида, сипоҳу раиятга боғлиқ масалаларда бошқаларнинг сўз ва феълига қараб иш тутмасин. Вазирлар, амирлар бирон кимса ҳақида яхши-ёмон сўз айтар эканлар, эшитсан.

¹ Маҳмуд Фазнавий (998 – 1030) – Хурсон, ҳозирги Афғонистон ҳудуди ва Шимолий Ҳиндистонни 977 – 1186 йиллар идора қилган Фазнавийлар сулоласи вакили, машҳур фотих, илм-фан ва адабиёт ҳомийси.

² Фазна (Fazni) – Кобулнинг жанубида, Қандаҳорга олиб борадиган йўл устида жойлашган пойтахт шаҳар. (– А.А.)

³ Бу ўринда ҳам хаттот ёки форс таржимони эътиборсизлиги сабабли йўл қўйилган хатога дуч келамиз: «Маҳмуд» ўрнига «Масъуд» ўқилиши керак, чунки вазирларнинг хоинлиги Масъуд Фазнавий даврида бўлган. (– А.А.)



Лекин амал қилишда бутун ҳақиқат аён бўлмагунча шошмай, мулоҳаза билан иш тутсин.

Тўққизинчидан. Подшоҳ ҳайбати сипоҳу раият кўнглида шундай ўрнашган бўлиши керакки, унинг амр-фармонига ҳеч ким қаршилик қилишга журъат этолмасин; итоат ва тобеълик қилсин, исён кўтармасин.

Ўнинчидан. (Подшоҳ) нима қилса, ўз эркича қилсин, нима деса ўз сўзида қатъий турсин, чунки подшоҳларнинг ҳукм ҳурматидан бошқа баҳрамандликлари йўқдир. Хазина, лашкар, раият, салтанат – буларнинг бариси унинг ҳукми биландир.

Ўн биринчидан. Салтанат ишларида, ҳукм юргизища подшоҳ ўзини ягона билиб, ҳеч кимни ўзига салтанат шериги қилмасин.

Ўн иккинчидан. (Подшоҳ) мажлис аҳлидан огоҳ, ва ҳушёр бўлсинким, улар кўпинча айб ахтариб, гапни ташқарига ташибидилар, подшоҳнинг сўзидан, ишидан вазирларга, амирларга хабар бериб турадилар. Масалан, шунга ўхшаш бир воқеа менинг ўзим билан (ҳам) рўй берганди. Ўзимнинг хос мажлисимдаги бир қанча суҳбатдошларим вазирлар ва амирларимнинг жосуслари бўлиб чиқканди.

СИПОҲ САҚЛАБ ТУРИШ ТУЗУКИ

Амр қилдимки, қачонки асл сипоҳийлардан иш кўрган, жанг жадал билан суяги қотган ўн киши йигилса, булардан қайси бирининг шижоати, ботирлиги ортиқроқ бўлса, қолган тўққизтаси ўз розилиги ва маъкуллаши билан, уни ўзларига сардор қилиб, отини ўнбоши деб атасинлар.

Ўн нафар ўнбоши жам бўлса, ўз ичларидан энг иш кўрган, жанг майдонларида тобланиб, тажриба ортирган, баҳодирлиқда номи чиқсан бировини амир қилиб, уни ўзбоши деб номласинлар.

Агар ўн ўзбоши йигилса, амирзодалардан ақлли, шижоатли, баҳодир бир кишини амир этиб сайлаб, уни мингбоши десинлар ва амири ҳазора дея мурожаат қилсинлар.

Агар қарамларидағи бирон кимса ўлса ёки қочиб кетса, ўрнига янги кишини тайинлаш ўнбошиларнинг ихтиёрида бўлсин. Шунга ўхшаш ўзбошилар ўнбошиларни, мингбошилар ўзбошиларни тайин қилсин. Булардан ўлган, қочган, янги тайинланганлар бўлса, сабабларини айтиб, менинг арзимга етказсинлар.

Яна буюрдимки, уруш кунларида ва салтанат ишларини бошқарища мингбошининг ҳукми ўзбошига, ўзбошиники ўнбошига, ўнбошиники (эса) қўл остидагиларга жорий этилади. Агар бу тузукка қаршилик қилсалар жазога тортилсинлар. Агар уруш ишларида ким камчиликка йўл қўяр экан, уни четлатиб, ўрнига бошқани қўйисинлар.

СИПОҲГА УЛУФА¹ БЕРИШ ТУЗУКИ

Амр қилдимки, амирлар, мингбошилар, юзбошилар, ўнбошилар ва оддий сипоҳийларга ушбу тартибда маош берилсин.

Оддий сипоҳийга, ўз вазифасини ўринлатиб бажариши шарти билан, маоши мингган отининг баҳоси бўлсин. Баҳодирларнинг маоши икки от баҳосидан тўрт отгача тайин қилинсин. Ўнбошилар маоши қўл остидаги оддий сипоҳийларидан ўн баробар ортиқ бўлсин. Юзбошилар маоши ўнбошиларга қараганда икки баробар, мингбошиларники эса юзбошиларникидан уч баробар зиёда бўлсин.

Яна ҳукм қилдимки, сипоҳийлардан қайси бири уруш ишларида хатоликка йўл қўйса, маошидан ўндан бирга камайтирсинлар.

¹ Улуфа – ҳарбийларга бериладиган ҳақ, маош.





Яна буюрдимки, ўнбоши юзбошининг тасдиқи билан, юзбоши мингбошининг тасдиқи билан, мингбоши амир ул-умаро (амирлар амири)нинг тасдиқи билан улуфа олсинлар.

Амр қилдимки, амирлар амирининг маоши ўз қўл остидагилардан ўн баробар ортиқ бўлсин. Шунга ўхшаш, девонбеги ва вазирларнинг маошлари эса амирларнидан ўн баробар кўп бўлсин. Ясовуллар¹, қалақчиларнинг² маошлари ўз хизматларига яраша, мингдан ўн минг (миқдорида) бўлсин.

Аҳли мажлис бўлмиш саййидлар, олимлар, фозиллар, ҳакимлар, табиблар, мунахжимлар, қиссанхонлар, хабарчилар ва ровийларга ўз ҳолларига қараб, суюрғол, вазифа³ ва маош белгиласинлар. Пиёдалар, хизматчилар, чодирчиларга юздан мингтacha⁴ маош берсинлар.

Яна ҳукм қилдимки, амир ул-умаро ўз ҳақини девонбеги ва вазирларнинг тасдиқи билан олсин. Давлат томонидан белгиланган бутун маошларнинг тўлиқ мълумотларини девонбеги ва вазирлар аввал менга билдиурсин, сўнгра танҳоҳ⁵ берилсин.

Яна буюрдимки, сипоҳийларнинг ҳар бирига маош олиш ёрлиги топширилсин. Уларга берилган маблағ миқдори шу ёрлиқнинг орқасига ёзиб қўйилсин.

¹ Ясовул – хонларнинг кичик хизматчиси; қўриқчи, ясо бажарилишини назорат қилиувчи.

² Қалақчи – ҳосилга қараб хирож миқдорини белгилаб берувчи минсадор.

³ Вазифа – бу ерда, нафақа маъносида.

⁴ Матнда аниқ пул бирлиги кўрсатилмаган. Кичикроқ пул бирлиги назарда тутилган бўлса керак.

⁵ Танҳоҳ – сарой хизматчилари, лашкарбошилар ва бошқалар учун маҳсус хазинадан бериладиган маош пул, баъзида алоҳида хизмат кўрсатган бекларга танҳоҳ сифатида ер-сув берилган.



СИПОҲГА ТАНҲОҲ ВА УЛУФА ТАҚСИМЛАШ ТУЗУКИ

Амр қилдимки, пиёдалар, қалақчилар, ясовуллар, чоповулларнинг бир йиллик маошларини ҳисоблаб, белгиланган маблағни девонхонага келтириб, шу ерда уларга (амирлари орқали) улашсинглар. Оддий сипоҳийлар ва баҳодирларнинг олти ойлик маошини ҳам ҳисоблаб, танҳоҳ, хазинасидан олиб беришни буюрдим.

Ўнбоши, юзбошиларга маош шаҳар омонлиги¹ хазинасидан ва подшолик мулки даромадидан нақд пул ҳисобида ёзилсин. Мингбошиларга вилоят ичидаги экинзор ерлардан туюл² берсинглар. Амирлар ва амир ул-умароларга эса чегаралардаги вилоятлардан бири туюл қилиб белгилансин.

Вилоятлардан тушган даромадларни ушбу йўсинда тақсимлашни буюрдим: вилоятлар ва мамлакатлардан олинган жаъми даромадни тақсимлаб, маош бериш ёрлиқларига бирига кам, бирига ортиқ қилиб ёзсинлар. Сўнг ёрлиқлар девонхонага келтирилсин. Амирлар ва мингбошилар шу ёрлиқлардан бирини чиқариб олсин. Агар ёрлиқда маошидан ортиқ (кўрсатилган) бўлса, бошқани ўзига шерик қилсан. Бордию кам бўлса, уни қўйиб бошқа ёрлиқ тортиб олсин.

Яна буюрдимки, амирлар, мингбошилар раиятдан молу жиҳот³ йиққанларида, хирождан ортиқча соврун, кўнаға⁴ ва шилон⁵ талаб қилмасинлар.

¹ Шаҳар омонлиги хазинаси – фатҳ этилган шаҳар аҳолисидан тўплланган «моли омон» (ўлпон) сақданадиган хазина.

² Туюл – хирож ва солиқ йиғиб олиш ҳаққи билан инъом этилган ер-мулк, вилоят.

³ Молу жиҳот – қишлоқ ҳўжалик маҳсулотларидан натура тарзида олинадиган солиқ; даромаднинг бешдан бир ёки учдан бир қисми ҳажмида олинган.

⁴ Кўнаға – элчилар, хон чопарлари, ўткинчи амалдорлар ва сипоҳийга кўноқ бериш; уларнинг навкарлари, соқчилари ва хизматчиларини, шунингдек, от-уловини боқиши мажбурияти.

⁵ Шилон – халқдан тўпландиган солиқ тури.



Туюл қилиб берилган ҳар бир мамлакатта иккитадан вазир тайинласинлар. Бири вилоятдан йифилган молни ёзиб, раият аҳволини текшириб турсинки, жогирдор – ер эгаси¹ фуқарога жабр-зулм етказиб, уларнинг ҳолини хароб этмасин. У вилоятдан йифилган бутун мол-ашёларни кирим дафтарига ёзиши лозим. Иккинчи вазир эса, (даромаднинг) харж этилган қисмини чиқим дафтарига ёзсин ва (йифилган моллардан) сипоҳийларнинг маошига тақсим қилсин. Қайси амирга туюл берилар экан, уни уч йилгача ўз ҳолига қўйсинглар. Уч йил ўттандан сўнг уни текшириб кўрсинглар. Агар мамлакат обод, раият рози экан, шу ҳолича қолдирсинглар. Агар аҳвол бунга терс бўлса, ул вилоятни холисага² ўтказиб, уч йилгача ўша ер эгасига ҳақ берилмасин.

Яна буюрдимки, хирожни раиятдан калтаклаш ва савалаш йўли билан эмас, балки огоҳлантириш, қўрқитиш ва тушунтириш йўли билан ундирилар. Қайси ҳоким ҳукмининг таъсири калтаклаш таъсиридан камроқ экан, ундей ҳоким ҳукумат юргизишга яроқсизdir.

ЎФИЛЛАР ВА НАБИРАЛАРГА УЛУФА БЕРИШ ТУЗУКИ

Амр қидимки, тўнгич ўғлим Муҳаммад Жаҳонгир валиаҳдимдир; у вилоят ҳокими бўлиб, ўн икки минг отлиқ аскар ва уларнинг улуфасини олсин.

¹ ... ер эгаси – матнда «жогирдор» — подшоҳ, олдидағи алоҳида хизматлари учун солиқ йифиш ҳақи билан ер тортиқ қилинган мансабдор шахс. Бобурийлар даврида қўлланган атама. Ундан оддинги манбаларда учрамайди. Абу Толиб Ҳусайний таржима жараённада ўз даврида муомалада бўлган сўзни ишлатиб кетган кўринади. 13–14 асрларгача «иқтабъ» шаклида, сўнгра 16 асрларча кўпроқ «суюргол» шаклида, Бобурийлар даврида эса «жогир» деб аталган. Мана шу каби ҳолатлар таржимон асил манбага нисбатан анча эркин муносабатда бўлганини кўрсатади. (– А.А.)

² Холиса – давлат ихтиёрида бўлган, барча солиқлардан озод этилган ер-сув ва мол-мулкни тасарруф этувчи олий идора.

Иккинчи ўғлим – Умаршайх ўн минг отлиқ аскар ва уларнинг улуфасини олсин. У бир вилоятни олсин.

Учинчи ўғлим – Мироншоҳ, тўққиз минг отлиқ аскарга улуфа олиб, бир вилоятни бошқарсан.

Тўртинчи ўғлим – Шоҳруҳ етти минг отлиқ аскарга улуфа олиб, бир вилоятта эга бўлсин.

Набиралар эса ҳар қайсиси, истеъодига яраша, уч мингдан етти минг отлиқчача улуфа олиб, бир вилоятта эгалик қилсин.

Ва яна менга қавм-қариндошлиги бор кишиларга, ўз ҳолига қараб, қобилиятига яраша, биринчи даражали амир мартабасидан тортиб то еттинчи даражали амир мартабасигача бўлган амирлик ва ҳукмдорлик (мансаблари) берилсин. Уларнинг ҳар бири ўз мартабасига яраша иш тутиб, ҳаддидан ошмасин. Бунга хилоф равища иш тутганлар жавобгарликка тортилсин.

ЎФИЛЛАР, НАБИРАЛАР, ҚАВМ-ҚАРИНДОШЛАР, АМИРЛАР ВА ВАЗИРЛАРНИ ЖАЗОЛАШ ЙЎЛИ БИЛАН САЛТАНАТДА ИНТИЗОМ САҚЛАШ ҲАҚИДА ТУЗУК

Амр қидимки, агар ўфилларимдан қайси бирови салтанат мартабасига даъвогарлик қилиб бош кўтарар экан, уни ўлдиришга, қўлларини боғлашга ёки мучасидан бирон жойини камайтиришга ҳеч ким журъат қилмасин. Лекин ўз даъвосидан кечмагунча, уни асирикда сақласинлар, токи Худонинг мулкида уруш чиқмасин. Агарда набиралар ёки қавм-қариндошлардан бири менга қарши кўтарилса, уни дарвишлик ҳолатига солсинлар¹.

Салтанатим қўргонлари бўлмиш амирлар, агар иш устида нифоқға борсалар, уларни мартабасидан туширсинглар ва ерлари тортиб олинсин. Агар давлатга

¹ Яъни, мол-мулки тортиб олинсин, маъносида.



зиён етказгудек иш қылсалар, улар бошқа амирларга тобеъ этилсинар. Агар сипоҳийлик ишларида ялқолик қилган бўлсалар, уларга ёзиш-чизиш билан шугууланувчilar орасидан иш берилсин. Агар шундан кейин ҳам хатоликка йўл қўйиб, калтабинлик қылсалар, иккинчи бор хизматта олмасинлар.

Салтанат саройининг ишончли ва эътиборли кишилари бўлмиш вазирлар хусусида шундай буйруқ бердим: агар улар салтанат ишларида хиёнат этсалар ва салтанатни ағдаришга жазм қилган бўлсалар ҳам, уларни ўлдиришда шошилмасинлар. Авваламбор уларни айловчи ва хабар етказгувчиларнинг кимлигини текшириб кўрсинар. Қораловчилар даъволарининг ростёлғонлигини синчковлик билан синаб кўрсинар. Чунки кўп ҳолларда ҳасадчилар билан гийбатчилар ё кўролмай ёки тамагирлик билан ёлғон тўқиб, уни чиндай қилиб кўрсатадилар ва (чиркин) мақсадларига етишадилар. Талайгина пасткаш, разил одамлар борки, давлат душманларини яхшилаб, унинг жонфидойиларини ҳийлагарлик ва маккорлик билан хароб қиладилар, макруу сотқинлик билан салтанат қўргонига путур етказмоқ пайида бўладилар.

Чунончи, амир Ҳусайн менинг вазирларимдан бири билан тил бириктириб, унга бойлик ваъда қилган ҳолда давлатимнинг таянчларидан бўлмиш амир Ийгу Темур ва амир Жакуни менга қарши қайрашни буорди. Унинг шум ниятидан огоҳ бўлдим, шунинг учун улар хусусида айтилган ҳамма гапларни эшитмаганга олдим.

Яна бир воқеа юз берганди. Яқинларимдан баъзилари ёлғиз қолганимизда ва одамлар олдида улуғ, эътиборли амирларимдан саналган амир Аббосга ҳасад қилиб, душманлик кўргизиб, унинг ҳақида бўлмағур гапларни айтдилар. Ёлғон сўзлари шамоли билан ғазабим ўтини алангалатдилар. Натижада гапларини текшириб кўрмасдан ғазаб устида амир Аббосни ўлимга маҳкум этдим. Охир-оқибатда уларнинг амир Аббос

ҳақига хиёнат этганларини англашим ва қилган ишимдан ўкиниб, пушаймон бўлдим.


Мамлакат хазиначилари бўлмиш молия вазирлари молия ишларида хиёнат қылсалар ва (бойликнинг бир қисмини) ўзлаштириб олган бўлсалар, (текшириб кўрилсин). Агар ўзлаштириб олган маблағи ўзига тегишли ҳақ микдоридан ошмаса, мазкур маблағ унга инъом ўрнида қолдирилсин. Агар ўзлаштириб олган маблағи маошидан икки баробар ортиқ бўлса, ортиғи оладиган маоши ҳисобидан ушлаб қолинсин. Агар маошидан уч баробар кўп маблағ олган бўлса, ҳаммаси (салтанат хазинасига) тортиқ сифатида олинсин.

Яна ҳукм қилдимки, (вазирларни) ортиқча сийламасинлар, чунки алоҳида иззат-икром кўрсатиб, ўзларини обрўсизлантириб қўйишлари мумкин. Бу эса салтанатга зиён етишига сабаб бўлур.

Фаразгўй, бузуқи ва ҳасадгўй одамларнинг вазирлар ҳақидаги уйдирмаларини эшитмасинлар, чунки бу табақадаги кишиларнинг душмани кўп бўлади, негаки, олам аҳлиниң барчаси дунёталабдир. Агар вазирлар бундай одамларнинг кўнглига қарасалар, давлатга хиёнат қилган бўлурлар; қарамасалар, (ундай одамлар) вазирларга душманлик қилурлар.

Чигатойхоннинг¹ бир вазири бўлган экан. Фаразгўйлар уни «хазинадан бир неча минг олтин ўғирлади», деб (хонга мактуб) ёзган эдилар. Мактубни хонга кўрсатганларида, у мазкур вазирни ҳузурига чақириби, унга «ғазаб» қилиб дебди: «Сен назари паст одам экансан. Мендек подшоҳнинг вазири бўлатуриб, хазинамдан атиги шунча ўзлаштирибсан, холос!» Доно вазир (хоннинг) бу қадар катта эҳсонидан мамнун

¹ Чигатойхон – Чингизхоннинг иккинчи ўли (1227 – 1241), Чигатой улуси хони. Ушбу улусга ҳозирги Шарқий Туркистон, Қошғар, Или ва Еттисув воҳасидаги ерлар, шунингдек, Мовароуннаҳр кирган. Тармасиринхоннинг (1326 – 1334) 1327 йилдаги юришидан кейин ҳозирги Афғонистон ва шимоли-ғарбий Ҳиндистон ерлари ҳам бу улусга кирган. (–А.А.)



бўлибди ва бор давлатининг барчасини келтириб хонга пешкаш қилибди. (Бу билан) хон олдида ўз марта-баси ва обрў-эътиборини сақлаб қолибди.

(Яна ҳукм қилдимки), қайси бир сипоҳий ҳаддидан ошибб, қўл остидаги кишига зулм ўтказар экан, уни тутиб, мазлум қўлига топширсинглар, токи унинг жазосини зулм кўрганлар берсин.

Қишлоқ оқсоқоли ва шаҳар улуғлари кичикроқ дарражадаги одамга зулм қилсалар, ўша зулмга яраша, ҳар кимнинг кўтаришича жарима солсинглар. Агар даруғалар ва ҳокимлар ҳалқа жабр-зулм этиб, уларни хароб қилган бўлсалар, ишларига лойиқ жазо берилсин. Бирор кимсанинг гуноҳи исботлангандан кейин ундан жарима олсалар, сўнг яна дарра билан урмасинглар. Агар дарра уриш билан жазоласалар, ундан жарима олмасинглар.

Ўғрилар хусусида буюрдимки, улар қаерда бўлмасин, тутиб олинса, ясо¹ бўйича жазолансин. Кимки бирорнинг молини зўрлик билан тортиб олган бўлса, мазлумнинг молини золимдан қайтариб олиб, эгасига топширсинглар.

Агар кимда-ким тиш синдирса, кўзни кўр қилса, қулоқ ва бурун кесса, шароб ичса, зино ишлар қилса, девондаги шариат қозиси ёки ажрим чиқарувчи қозига олиб бориб топширсинглар. Шариатта оид ишларни ҳал этишда ислом қозиси ҳукм чиқарсин. Урф-одат ишларини эса ажрим қозиси тафтиш қилиб, сўнг менинг арзимга етказсин.

ВАЗИРНИ ТАНЛАШ ТУЗУКИ

Амр қилдимки, вазирлар ушбу тўрт сифатга эга кишилардан бўлишлари лозим: **биринчиси** – асилилк ва тоза наслик, **иккинчиси** – ақл, фаросатлилик,

¹ Ясо – турк-мўғул ҳалқлари орасида амалда бўлган қонун-қоидалар; Чингизхон даврида жорий этилган.

учинчиси – сипоҳу раият аҳволидан хабардорлик, уларга нисбатан хушмуомалик, **тўртинчиси** – сабричидамлилик ва тинчликсеварлик.

Кимки шу тўрт сифатга эга бўлса, ундан одамни вазирлик мартабасига лойиқ киши деб билсинглар. Уни вазир ёки маслаҳатчи этиб тайинласинглар. Мамлакат ишларини, сипоҳ ва раият ихтиёрини унга топширсинглар. Бундай вазирга тўрт имтиёз – ишонч, эътибор, ихтиёр ва қудрат берилсин.

Камолотта эришган вазир улким, давлат муоммалаларини тартибига келтириб, мулкий ва молиявий ишларни тўғрилик билан, асли-насли тозалигини кўрсатиб, ажойиб тарзда бажаради. Олгулик жойидан олиб, бергулик ерга беради. Рухсат этувчи ва тақиқловчи буйруқларида унинг асилиги билан тоза наслиги кўриниб туради. (Хеч кимга) душманлик ва жабр-зулм қилмайди. Хоҳ, сипоҳдан, хоҳ раиятдан бўлсин, ҳар кимнинг номини яхши сўзлар билан тилга олади. Бирордан ёмонлик ахтармайди, айтсалар эшитмайди. Агар бирордан ёмонлик кўрган бўлса, унга нисбатан шундай муомала қиладики, у (охири) ёмонлигидан қайтади. Ўзига ёмонлик қилган одамга нисбатан шундай яхшилик қиладики, у (охири) олдига бош эгиб келади.

Қайси вазир фийбат гапларни айтса, уйдирма гапларга қулоқ солса, жабр-зулм қилса, ўзига ёқмаган кишиларни йўқотиш пайига тушса, уни вазирликдан тушириш лозим. Наслию зоти паст, ҳасадчи, гина-кеқ сақловчи, қора кўнгилли кишиларга зиндор вазирлик лавозими берилмасин. Бузуки, қора кўнгилли, зоти паст одам вазирлик қилса, давлату салтанат тез орада қулади. Масалан, Маликшоҳ Салжуқий¹ ўз вазири

¹ Маликшоҳ Салжуқий (1055–1092) – Салжуқийлар сулоласидан (1038–1194) чиқсан ва Жалолиддин Маликшоҳ I номи билан машхур подшоҳ, 1072–1092 йиллари ҳукмронлик қилган.



Низомулмulkни¹ мартабасидан туширди. Вазир бошдан-оёк яхши сифатларга ўралган эди. Унинг ўрнига зоти паст, ёмон бир кишини вазир қилиб тайинлади. Бу шумқадам вазирнинг қабих ишлари, зулму ситами ва нафси бузуқлиги касофатидан салтанат биноси бузила бошлади. Шунга ўхшаш яна бир мисол. Аббосийлардан халифа Мустаъсим Биллоҳ² ҳасадчи, гина-кудуратчи Ибн Алқамийни ўзига вазир этиб тайинлади. У кўнглида халифага нисбатан гина-кудурат, душманлиги бор бўлгани учун, халифани мунофиқона гаплар билан алдаб, ўзи эса Ҳулогухон билан тилбириклириб, уни халифалик тепасига олиб келди. Халифа Мустаъсимни эса қўлга олиб, ўлимга маҳкум этди. Шуни эътиборга олиб, асли тоза, насли пок, улуғ зотлардан бўлган, яхши равишлик кишилардан топиб, вазир қилинглар. Чунки асли тоза киши хатоликка йўл қўймайди, бадасл эса (ҳукмдорига) вафо қilmайдi.

Қайси вазир софлик, тўғрилик билан вазирлик ишига киришиб, давлатнинг молия мулки ишларини диёнат, савоб билан, нафси бузуқлик қilmай, омонатга хиёнат этмай бажарап экан, ундей вазирни энг олий мартабаларга етказсинглар. Қайси вазир бузуқлик қилиб, ёмонлик йўли билан мамлакат ишларини юргизар экан, кўп ўтмай ундей салтанатдан хайру баракот кўтарилади.

Доно вазир шулдирки, ўз ўрнига қараб, гоҳ, қаттиқўллик, гоҳида эса мулоимлик билан иш юритади. Бундай вазир ортиқча қаттиқўллик ҳам қilmайдi, кўп мулоимлик билан юмшаб ҳам кетмайдi. Агар

¹ Низомулмulk, Абу Али ал-Ҳасан ибн Али ибн Исҳоқ ат-Тусий (1018 – 1092) – Салжукий сultonлардан Аллар Арслон (1063 – 1072) ва Маликшоҳ, I (1072 – 1092)ning бош вазири. Низомулмulk «Сиёсанома» номли катта тарихий асари билан ҳам машҳур.

² Мустаъсим Биллоҳ – Аббосийлар сулоласига мансуб Бағдод халифаларининг сўнгти вакили. 1242 – 1258 йиллари ҳукмронлик қилган.

кўп мулоимлик қилса, дунёталаб, тамагир одамлар уни ютиб юборадилар. Агар ортиқча қаттиқўллик ишлатса, ундан қочадилар ва унга бошқа мурожаат қilmайдилар. Демак, доно вазир шулдирки, салтанат корхонасининг ишларини энг тўғри чораю тадбирлар қўллаб, яхши англаган ҳолда амалга ошириб, давлатни тартиб-интизомга келтиради. Салтанат ишларини сабртоқат, чидам билан адо этади, муаммоларни ўз ўрнида қаттиқўллик, ўз ўрнида мулоимлик билан ҳал қилаади. Бу хилдаги вазирни давлат шериги деб билсинглар, чунки давлату салтанат уч нарса: мулк, хазина ва лашкар билан тикидир. Доно вазир буларнинг ҳар учаласини тадбиркорлик билан яхши аҳволда, саранжом тутади. Жами яхши хулқлар соҳиби бўлган вазир азият етганда ҳам ҳеч кимга кўнглида гина-адоват сақламайди. Агар гинаю кек сақлаб, душманлик қиларкан, бундай вазир мунофиқидир. Ундей вазирдан эҳтиёт бўлиш керак, чунки у давлат душманлари билан тилбириклириб, хазинани ва лашкарни хароб қилаади. Ақдли вазир улки, бир қўли билан раиятни, иккинчи қўли билан эса сипоҳни тутади. Олгулик жойдан олиб, бергулик жойга беради. Сергаклик ва эҳтиёткорликни қўлдан қўймайди. Тўғрилик ва ростлик билан муоммалада бўлиб, ҳар ишнинг оқибатини ўйлаб иш тутади. Давлат фойдасини кўзлагани учун, бирорга душманлик қилишни кўнглига келтирмайди. Тажрибали, ишбилармон ва билимдон вазир шундай бўладики, мамлакат ободонлигини, раият ва сипоҳнинг тинч-фаронлигини, хазина бойлигини доим кўзда тутади. Давлат, салтанатта фойда келтирадиган ишларни бажаришга тиришиб, ҳаракат қилаади. Салтанатта зарар етказадиган хатарли ишларни бартараф қилишда молу жонини аямайди. Сипоҳу раиятта тегишли муҳим ишларни яхшилик йўли билан, тўғри тадбир ишлатиб, амалга оширади. Яхши хулқли вазир шулки, унинг эзгу ишлари ёмон феъл-атворидан устунлик қилаади.



Эшитишмча, Низомулмулкнинг озгина ёмон қилмишларини кўплаб хайрли ишлари мағлуб этган эди. У ҳажга бормоқчи бўлиб турган вақтида авлиёлардан бири унга дебди: «Маликшоҳ давлатининг хизматида бўлиб, амалга ошираётган хайрли ишларинг ва Тангри таолонинг бандаларига етказиб турган ёрдаминг ҳаж қилиш билан баробардир».

Яна эшитганманки, Али ибн Лақатий халифа Ҳорун ар-Рашиднинг вазири эди. Ундан Тангри таолонинг бандаларига кўп нафу фойда етарди. Кунлардан бир куни у ўз ихтиёри билан вазирликни тарк этмоқчи бўлибди. Ўшанда дин пешволаридан бири унга шундай деб ёзибди: «Сен халифа даргоҳида мулозимлик қилиб, вазирлик ишини бажариб туравер. Бу ишни ташлашни ўйламагин ҳам, чунки (бу марта-бада туриб) халқа етказаётган ёрдаминг ва нафинг, сен қилган бутун ишларингу ҳаракатларингнинг энг олийсидир».

Яна шуни эшитдимки, ҳазрати пайғамбаримиздан, унга Тангрининг марҳаматлари ва саломлари бўлсин, сўрабдилар: «Агар сиз набий ва расул этиб юборилмаганингизда, қайси иш билан машғул бўлардингиз?» Улар шундай деб жавоб берган эканлар: «Султонлар хизматида бўлишни ихтиёр этиб, Тангри таолонинг бандаларига фойда ва яхшилик етказардим».

Шу сабабдан, халқа ёрдаму мадад бериш мақсадида, мен ҳам Туғлуқ Темурхоннинг ўғли Илёс Хожага вазирлик ҳамда сипоҳсолорлик қилишга рози бўлган эдим. Тангри таолонинг бандаларига ёрдам қилганимдан бўлса керакки, Оллоҳ таоло мени салтанат мартабасига етказди.

Тадбиркорлик ва қилич воситаси билан бирор мамлакатни забт этган ёки (ҳимоя этиб) сақлаб қола олган вазирни эъзозлаб, иззат-икром этсинлар. Унинг мартабасини ошириб, уни «қилич ва қалам соҳиби» деб атасинлар.

Ақлли, билимдон ва ҳушёр вазир шундай бўлади-ки, бир тўғри тадбир қўллаб ғаним қўшинини пароканда қилиб юбора олади. Муросаю мадора, ҳушмуомалик билан сипоҳни бирлаштириб, душман лашкарини ўзига ром қиласди. Бундай вазир валинеъматнинг соқчиси бўлиб, подшосининг бошига тушган муҳим ва мушкул ишларни тадбиркорлиги ҳамда узоқни кўра билиши билан осонлаштиради. Агар салтанат ишларида чигил-жумбоқ учраса, ақлу фаросат бармоғи билан уни ечиб юборади. Чунончи, Алибек Жониқурбоний мени банд эттагач, бурга тўла уйга қамаб қўйди. Вазирларимдан Азизуддин Термиздан юриш қилиб, менга ёрдам бериш учун етиб келди, (тадбир ишлатиб) Алибекни ухлатиб қўйди. Бу иши билан унинг кўзини мендан беркитиб, қувват бағишилади. Шижоат ва мардлигим тутиб, қўлимдаги қилич зарби билан кўп соқчилар орасидан қутулиб нажот топдим. Шунга ўхшаш Низомулмулк ҳам Султон Маликшоҳни Қайсар бандидан халос этган эди¹.


Шундай бўлгач, бундай вазирни давлат шериги деб билиб, азиз тутсинлар, зинҳор унинг сўзидан чиқмасинлар. У нима деган бўлса бари ақл қўзгусидир.

Агар подшоҳ золим бўлиб, вазири одил бўлса, подшоҳнинг жабр-зулмини (тўхтатиш) чора-тадбирини кўради. Лекин вазир золим бўлса, салтанат ишлари тез муддатда инқирозга учрайди.

АМИРЛИК ВА ҲУКМДОРЛИК МАРТАБАЛАРИ ТУЗУКИ

Энг яқин навкарларимдан уч юз ўн уч кишига амирлик мансаби беришни буюрдим, чунки улар асли тоза, ақл-фаросатли, баҳодир, довюрак, тадбиркор, сергак,

¹ Салжуқ султони Маликшоҳ даврида «Қайсар» ибораси фақат Византия императорига нисбатан ишлатилган. Бу султоннинг императорга асир бўлгани тарихий манбаларда тасдиқланмайди. (—А.А.)



эҳтиёткор, олди-кетини ўйлаб иш тутадиган кишилардир. Уларнинг ҳар бирига ўринбосар тайинладим. Агар амирлардан биронтаси вафот этса, у ҳолда, ўринбосари унинг ўрнига ўтиради ва уни «амирликка номзод» деб атайдилар. Менинг бу уч юз ўн уч амиримнинг бариси ақл-хуш эгалари, базму жанг шерлари, маҳоратли саркардалар, лашкар тўпини бузиб, уни мағлуб этувчи кишиларданурлар.

Тажрибамдан синаб билдимки, жангнинг сир-асрорини, ғаним аскарларини синдириш йўлини билган, уруш қизиганда ўзини йўқотмасдан, қўл-оёғи бўшашмасдан, лашкар фавжларини жангта бошлай оладиган, агар қўшин сафига рахна тушса, уни тезда тузата оладиган кишигина амирлик ва ҳукмронликка лойик ҳисобланади.

Шундай киши амир ул-умаро бўла оладики, мен йўғимда, тинчлигу савашда ўринбосарим бўлиб, шоншавкат ва маҳобат билан бутун сипоҳга буйруқ бериб, унга қаршилик қилганларни жазолай оладиган бўлсин.

Уч юз ўн уч кишидан тўрт нафарини бегларбеги этиб, бир кишини амир ул-умаро қилиб тайинлашни буюрдимки, унинг ҳукми юришларда, урушларда амirlар ва бутун сипоҳ томонидан сўзсиз ижро этилсин. У ўзим боримда йўлдошим, йўғимда эса ўринбосаримдир.

Файратли, ор-номусли бўлган яна ўн икки кишига ушбу тартибда амирлик даражасини бердим.

Биринчи амирни минг кишига буйруқ бериш ҳуқуқи билан амир этиб тайинладим. Иккинчи амирни икки минг кишига буйруқ бериш ҳуқуқи билан икки минг аскарга амир этиб қўйдим. Шунга ўхшаш, учинчи амирни – уч минг, тўртингчисини – тўрт минг, бешингчисини – беш минг ва шу тартибда ўн иккинчи амirlагча аскарга амир қилиб белгиладим. Амирлик тартиби-

га қараб, бирини иккинчисига ноиб этдим. Масалан, биринчи амирни иккинчи амирнинг ноibi, иккинчи амирни учинчи амирнинг ноibi, шу тартибда ўн биринчи амирни ўн иккинчи амирнинг ноibi қилиб белгиладим. Ўн иккинчи амир эса амир ул-умаронинг ноibi бўлди. Амир ул-умаро эса менинг ноибим ҳисобланади. Қайси бир амирга бирор кор-ҳол бўлса, ўрнига ноibi ўтирасин.

Яна буюрдимки, ўша уч юз ўн уч кишидан юзтаси – ўнбоши, юзтаси – юзбоши, юзтаси – мингбоши бўлсин. Жанг пайтида амир ул-умаро – амирларга, амирлар – мингбошиларга, мингбошилар – юзбошиларга, юзбошилар – ўнбошиларга бошлиқ, деб буйруқ бердим. Шунингдек, ўнбошининг ишини – юзбошига, юзбошининг ишини – мингбошига, мингбошининг ишини – амирга, амирнинг ишини – амир ул-умарога буюрмасинлар. Ўнбоши билан битадиган ишни юзбошига, юзбоши битирса бўладиган ишни мингбошига юкламасинлар. Амирлардан қайси бири ўзи қизиқиб иш сўрар экан, унга буюрса бўлур.

АСКАРНИ ЭНГ ҚУЙИ МАРТАБАДАН ОЛИЙ МАРТАБАГАЧА ТАРБИЯЛАБ КЎТАРИШ ТУЗУКИ

Амр қилдимки, баҳодирлардан кимки қилич чопишида ўзини кўрсатса, биринчи марта бўлса – ўнбоши, иккинчи марта ботирлик қилса – юзбоши, учинчи мартасида эса мингбоши қилиб тайинласинлар. Ўнбоши қўли остидагилардан бири ботирлик кўрсатса, биринчи галда уни ўнбоши қилсинлар. Қилич чопишида ўзини ҳимоя қила туриб қўзга ташланган аскарлар бундан истиснодир, чунки ҳўқиз ҳам сузишганда шохини никтайди. Шундай экан, сипоҳийнинг аслу насабига ҳам қарашибозим.

Агар мингбоши қилич зарби билан ғанимнинг бир фавж лашкарига шикаст етказса, уни биринчи амир



етиб тайинласинлар. Биринчи амир ёв лашкари сағини бузиб, уларни тарқатиб, баҳодирлик кўрсатса, уни иккинчи амирлик даражасига кўтарсинлар. Шунга ўхшаш, қайси амир ёв лашкари тўпини тўздириб, иш кўрсатар экан, уни ўз мартабасидан юқори кўтарсинлар. Сипоҳийлардан кимки астойдил қилич чопса, ойлигини оширсинлар. Қайси бир сипоҳий урушдан юз ўтириб қочса, уни илтифотимиздан маҳрум этсинлар. Агар мажбуран чекинган бўлса, узрини қабул қиласинлар. Агар уни ваҳима босган бўлса, изза қиласинлар. Қайси сипоҳий, душман қаршисида қилич чопиб, яралansa, уни тақдирлаб, инъом берсинлар. Бордию яралангандан кейин қочган бўлса, унга таҳсин ўқиб, яраланганини эътиборга олсинлар. Чунки у фанимга ҳужум қилмаган тақдирда ҳам, ёв ҳамласи вақтида жароҳатлангандир, яраси унинг не ҳолга тушганининг гувоҳидир.

Қайси бир сипоҳий ўзини кўрсатган бўлса, рагбатлантириб ҳақини адо этсинлар. Қайси бир сипоҳий хизматда юриб қарилек ёшига етаркан, уни ойлик-ҳақдан маҳрум этмасинлар ва мартабасидан туширмасинлар. Ҳеч бир сипоҳийнинг хизмати назардан четда қолмасин. Чунки улар давлат хизматида экан, боқий ҳаётларини фоний дунё нақди учун аямаганинг ўзи ҳам инъомга ва моддий таъминотта лойиқлигини билдиради. Уни инъомидан маҳрум қилиб, хизматларини кўрсатмасалар, ноинсофлик қилган бўлурлар.

Яна амр қилдимки, қайси бир амир ёки сипоҳийнинг менинг давлатим учун хизмати синггани аниқ бўлса — фаним лашкарини синдирган, бирор мамлакатни забт этган ёки (жон-жаҳд билан) қилич чопишган бўлса, хизматини тақдирлаб, ҳақини адо қиласинлар. Ёши кекса сипоҳийларни ҳурматлаб, азиз тутсинлар. Улардан фойдали маслаҳатлар олсинлар, чунки уларнинг айтадиган гаплари ўз тажрибаларида

кўриб, билганлари дир. Уларни салтанат корхонасининг устунлари деб билсинлар. Улардан кейин ўғилларини ўринларига ўтқазсинлар.

Яна амр қилдимки, фаним томонидан қўлимизга ҳар қандай сипоҳий асир бўлиб тушса, уни ўлдирмасинлар. Унга ихтиёр берилсин. Агар навкарликни қабул қилса, навкар бўлсин; йўқ деса, уни озод этсинлар. Бунга мисол, мен Қайсар билан урушда¹ қўлга тушган тўрт минг румлик аскарни озод қилдим.

Фаним сипоҳийларидан қайси бири ўз давлатининг тузини оқлаб, бизга қарши қилич чопган, сўнгра ихтиёрий равиша ёки мажбур бўлиб, паноҳимизга келса, бундай аскарга ишониб, уни азиз тутсинлар. Чунки у ўз соҳибига вафодорлик қилиб, еган туз ҳақини оқлаган. Шунга ўхшаш, мен ҳам Шер Баҳромга нисбатан шундай қилдим. Амир Ҳусайн билан бўлган урушда у мен билан юзма-юз тўқнашиб, қилич чопиши; кейинроқ, эса ўзи иложисизлиқдан менинг паноҳимга келганида, уни ҳурматладим.

Менгли Буға ҳам Балх урушида менга қарши лашкар тортиди. Жанг бошланишидан аввал ўзим томонга оғдириш мақсадида унга хат юбордим. У эса Туғлуқ Темурхоннинг ҳақига кўрнамаклик қилмади ва менга қарши лашкар тортиб, эрларча жанг қилди. Охир оқибат енгилиди. Кейинчалик ўз ихтиёри билан ҳузуримга тиз чўкиб, паноҳ излаб келганда, унинг мартабасини улуғладим, илтифоту марҳаматлар кўрсатдим. Унга қилган иноятларим ҳақи ўртамиздан ўтган ноҳушликлар бутунлай унутилди. Йиғинларда унинг қилган баҳодирларидан сўзлаб, оғарин айтар эдим. Ўзи аслида эр йигит бўлгани учун менинг давлатимда ҳам кўп баҳодирлик кўрсатиб, мени мамнун этди. Озарбайжон урушида Қора Юсуф билан тўқнашга-

¹ Амир Темурнинг Рум сultonи Боязиц I Ийлдирим билан 1402 йилнинг 20 июлида Анқара остонасида бўлган жанг назарда тутилади.



нимда¹, лашкарим оғир аҳволга тушиб қолди. Шунда у майдонда Қора Юсуфнинг ўлган аскар бошлиқларидан бирининг бошини найза учига санчиб, баланд кўтарди ва лашкаримга Қора Юсуфнинг боши деб, уни ўлдига чиқарди. Бундан лашкарим дадилланиб, жангга ташланди ва Қора Юсуф лашкарининг ўртасига хужум қилиб, Қора Юсуфи қочирди. Бу урущда Қора Юсуф устидан қозонилган ғалабани Ментли Буганомига ёздиридим ва унинг мартабасини оширдим.

АМИРЛАР, ВАЗИРЛАР, ЛАШКАР ҲАМДА РАИЯТНИ ТАҚДИРЛАБ, МАРТАБАЛАР ВА ИНЬОМ-СОВФАЛАР БЕРИШ ТУЗУКИ

Амр қилдимки, қайси бир амир бирон мамлакатни фатҳ, этса, ё ғаним лашкарини енгса, унга уч нарса билан имтиёз берсинглар: фахрли хитоб, түф ва ногора топшириб, уни «баҳодир» деб атасинлар; уни давлат ва салтанат шериги (деб) билиб, кенгаш мажлисига киргизсинлар; унга чегара вилояти топширилсин ва ўша ерлик амирлар унга бўйсунсинглар. Агар амирлардан қайси бирори тўрани (хон ўғлини) енгса ёки бирон амирзодага шикаст етказса, ё бирор ўлка хонини мағлуб этса, уни юқоридаги тартибда мукофотласинлар. Чунончи, Дашти Қипчоққа, Ўрусхонга қарши уруш учун юборган амирим Ийгу Темур уни енгиб қайттач, амирни мукофотлаб, унга туман (лашкар), түф, байроқ ва ногора бердим. Уни давлатимга шерик билиб, ўзимга маслаҳатчи ва вазир қилдим. Кенгашларимга киритдим ва чегарарадаги вилоятлардан бирини унга тақдим этиб, у ерлик амирларни унга бўйсундирдим.

Шунда ҳасадчилар унинг ҳақида (турли уйдирма) гаплар тарқатиб: «Ўрусхоннинг улусини талон-торож

¹ Бу жанг 1400 иили бўлган.

қилиб, мол-мулкини ўзиники қилиб олди», – дедилар. Бу гаплари билан ундан кўнглимизни бир оз совутдилар. Бироқ мен Баҳром Чубин¹ қиссасини эшитиб тажрибам ортганди. Воқеа бундай бўлган экан. Хоқон² уч юз минг жангари турк аскари билан Ҳурмуз ибн Нуширвон³ устига лашкар тортди. Ҳурмуз эса Нуширвоннинг вазири, маслаҳатчиси ва сипоҳсолори бўлмиш Баҳром Чубинни 320 минг аскар билан хоқонга қарши урушга йўллади. У хоқон лашкари билан тўқнашиб, уч кечаю уч кундуз жангу жадалда тин билмади. Охири хоқонни енгиб, бор ҳақиқатни Ҳурмузга арз қилди, қўлга киритган бутун ўлжа, мол-мулкни Ҳурмузнинг ҳузурига жўнатди. Шу аснода ҳасадчилар ва фийбатчилар Ҳурмуз мажлисида унга қарши тухмат қилиб: «Баҳром мол-мулкнинг катта қисмини ўзига олиб қолди, хоқоннинг асл қимматбаҳо тошлар билан безатилган қиличи ва тожи, жавоҳирлар қадалган этигини ўзлаштириб олди», – дедилар. Ҳурмуз ҳам хомтама бўлиб, Баҳромнинг (аввалги) хизматларини унуди. Фаразгўй ва фийбатчи кишиларнинг гапларига ишониб, Баҳром Чубинни гуноҳкор ва хоин деб билди. Унга аёллар ёпинчиги, бўғов ва занжир кишан юборди. Баҳром бўйнига бўғов, оёғига занжир кишан солиб, аёллар либосини кийди. Сўнг ҳузурига амирлар, сипоҳ, бошлиқларини чақиртириб, саройда йиғилганлар олдига шу алпозда чиқди. Саркардалар ва оддий сипоҳийлар бу ҳолни кўриб, Ҳурмузга таънаю дашномлар ёғдиришди. Ундан ихлослари қайтди. Сипоҳ Баҳром Чубин билан иттифоқ бўлиб, Ҳурмуз даргоҳига бостириб келди: уни салтанатдан тушириб, Ажам мам-

¹ Баҳром Чубин (ваф. 592 й.) – Сосонийлар замонида ўтган машхур саркарда, вазир ва Эрон подшоси. 590–591 ийлари ҳукмронлик қилган.

² Милоднинг 590 иили Эронга бостириб кирган ғарбий туркларнинг хоқони Шаба назарда тутилган.

³ Ҳурмуз ибн Нуширвон – Сосонийлар сулоласидан шаҳаншоҳ, Ҳурмуз IV (579–590), Хусрав Ануширвоннинг ўли. (–А.А.)





лакати салтанатининг таҳтига Хусрав Парвизни¹ ўтқаздилар.

Мен бу воқеадан сабоқ олганим сабабли, сипоҳимнинг таънаю дашномларига қолиб кетмаслик учун амир Ийгу Темурни ҳузуримга чорладим; сарой ходимлари ва ҳалқни тўплаб мажлис қурдим. Ўрусхон улусидан ўлжа қилиб олинган бутун мол-мулкни бир ерга тўплаб, амир Ийгу Темурга ва у билан бирга қилич чопган баҳодирлару сипоҳийларга инъом қилдим.

Яна амр қилдимки, жангда ўзини кўрсатиб, қаршисидаги ғаним лашкарини синдириган ҳар бир амирнинг мартабасини оширсинлар.

Чунончи, Тобон баҳодир Тўхтамишхон билан бўлган урушда (от солиб), ғаним байроқдорига этиб олди ва душман байроғини ерга тушириди, ўзи бир неча жойидан яраланди. Ҳасадчилар ва шу қаҳрамонликка даъвогарлар унинг бу хизматини мендан яширмоқчи бўлдилар. Лекин мен уни (инъомдан) холи қолдириш инсофдан эмас, деб билиб, Тобон баҳодирга амирлик мартабасини бердим. Сўнгра унга иззат-икром кўрсатиб, байроқ тақдим этдим.

Яна амр қилдимки, ўнбоши, юзбоши ва мингбошилардан қай бири душман сафини бузиб, ўз қаршисидағи аскар фавжини синдириса, ўнбоши бўлса, шаҳар ҳокимлигини берсинлар. Юзбоши бўлса, уни бирон мамлакат ҳукмдори этсинлар. Бунга мисол шулки, юзбоши Барлос баҳодир Тўхтамишхон билан бўлган урушда ёв лашкари билан юзма-юз тўқнашиб, душманни синдириди. Уни Ҳисори Шодмон мамлакатига ҳоким этиб тайинладим. Яна буюрдимки, мингбошилардан биронтаси қаршисида турган ғаним лашкарини синдириса, уни мамлакат ҳукмдори қилсинлар. Бунга мисол, Муҳаммад Озод Катур жангидан (бир оз бурун) Бурхон ўғлон лашкари-

ни мағлубиятга учратган сиёҳпўш¹ жамоасини енгиб, уларга ўнгланмас зарба берди. Муҳаммад Озодни Кундуз ва Кўлоб² мамлакатларига волий этиб тайинладим.

Яна ҳукм чиқардимки, амирлардан қайси бири ғаним қўлидаги бирор мамлакатни фатҳ этиб, душман тасарруфидан озод қилса, шу мамлакатни уч йилга унга инъом тариқасида берсинлар.

Ва амр қилдимки, қайси бир аскар қилич чопиб баҳодирлик кўрсатса, унга инъом тариқасида гурзи, қимматбаҳо тошлар қадалган ўтоғ, камар, турна беллик қилич ва бир от берсинлар ҳамда ўнбошилик мартабасига кўтарсинлар. Иккинчи, учинчи бор баҳодирлик кўрсатса, юзбоши ва мингбоши мартабасига етказсинлар.

КАТТА НОФОРА ВА БАЙРОҚ БЕРИШ ТУЗУКИ

Амр қилдимки, ўн икки катта амирларнинг ҳар бирiga битта байроқ ва бир ногора берилсин. Амир улумарога байроқ ва ногора, туман туғи³ ва чортуғ⁴ тақдим этсинлар. Мингбошига эса бир түғ ва карнай берсинлар. Юзбоши ва ўнбошига биттадан катта ногора берсинлар. Аймоқларнинг⁵ амирларига бўлса, бигтадан бурғу тақдим этсинлар. Тўрт begларбегининг ҳар бирига биттадан байроқ, ногора, чортуғ ва бурғу берсинлар.

¹ Сиёҳпўш – юзига қора мато тортилган одам; баъзи манбаларда Катур (Кофиристон) ҳалқи исломни қабул қилмаганларни учун шундай аталган.

² Кўлоб – қадимги Хутталон; «Темур тузуклари» биринчи китобининг 11 ва 13 кенгашларида Хутталон шаклида берилган. Асарнинг 1868 йилги Техрон наширида Кўлоб эмас, Хутталон шаклида ёзилган. «Кўлоб» атамаси XVII асрдан кейинги нусхаларда пайдо бўлган.

³ Туман туғи – ўрта асрларда учига қўтос, от ёли ёки думи, ярим ой ёки керилган беш панжа тасвири ўрнатилган лашкарнинг байроқсимон нишон-белгиси; ушбу асарда түғ атрофида тўпланган ҳарбий бўлинма маъносида ҳам келтирилган.

⁴ Чортуғ – ҳарбий бўлинма амирининг даражасини билдирувчи учи ўтқир найза; байроқнинг бир тури.

⁵ Аймоқ (ўмоқ) – бир неча қариндош-уруглар иттифоқи; қабила.

¹ Хусрав Парвиз (581–628) – Сосонийлар сулоласига мансуб подшоҳ.





(Үн икки) амирдан қайси бири душман фавжини синдерса ёкиғаним қўли остидаги бирор мамлакатни фатҳ этса, уни тақдирлаб, агар биринчи (даражали) амир бўлса, иккинчи (даражали), иккинчи бўлса, учинчи (даражали), учинчи бўлса, тўртингчи (даражали) амир мартабасини берсинлар. Шу тартибда үн биринчи (даражали) амиргача давом эттирсинглар. Агар үн биринчи (даражали) амир бўлса, уни үн иккинчи (даражали) амир қилиб, байроқ, туғ ва ноғора берсинлар. Шу йўсинда биринчи (даражали) амирга битта туғ, иккисига – иккита, учинчисига – учта, тўртингисига – тўртта туғ ва ноғора бериб, уларни тумантуғ ва чортуғ олиш мартабасига етказиб рафбатлантирсинглар.

СИПОҲНИНГ ЯРОҚ-ЖАБДУҚЛАРИ ВА АНЖОМ-ЖИХОЗЛАРИ ТУЗУКИ

Буюрдимки, юриш вақтида оддий аскарлардан ҳар үн саккиз киши ўзи билан бирга бир чодир олсин, ҳар бир аскар икки от, бир камон, бир садоқ (ўқдон), бир қилич, арра, бигиз, бир қоп, жуволдиз, теша, болта, ўнта игна ва (орқага осиладиган) чарм халта олсин.

Баҳодирлардан ҳар беш киши бир чодир олсин. Ҳар бири битта жавшан¹, дубулға, бир қилич, садоқ, ёй ва тузукка мувофиқ от олсин.

Ўнбошилардан ҳар бири ўзи билан бирга бир чодир, совут², қилич, садоқ, ўқ-ёй ва бешта от олсин.

Юзбошилардан ҳар бири бир чодир, ўнта от, қурол-аслаҳадан: қилич, садоқ, ўқ-ёй, гурзи, чўқмор, коскан³, зириҳ, багтар⁴ олсин.

¹ Жавшан – оддий темир совут.

² Матнда «зираҳ» – совутнинг симдан тўқилган, ўқ ва тиф ўтмайдиган бир тури.

³ Коскан – бош кийими остидан ўраладиган сим рўмол . У жангчини ўқ, қилич ва гурзи зарбидан сақлаган.

⁴ Багтар – темир симдан тўқилиб, усти баҳмал ёки бошқа мато билан ўралган ҳарбий камзул.

Мингбошилардан ҳар бири ўзи билан бирга битта чодир, бир соябон, қурол-аслаҳадан жавшан, дубулға, найза, қилич, садоқ ва ўқ-ёйдан кўтартганича олсин.

Биринчи амир бир чодир, бир ўтов, бир жуфт соябон, қурол-аслаҳадан шу миқдорда олсинларки, қўл остидагиларга ҳам бергудек бўлсин. Шунга ўхшаш иккинчи, учинчи, тўртингчи амирдан тортиб то амир ул-умарогача ҳар қайсилари, ўз мартабаларига яраша, чодирдан, ўтвдан, отлардан бошлаб, то бошқа ҳарбий анжомларгача саранжом-саришта қилиб қўйисинглар. Биринчи амир бир юз үн от, иккинчи амир бир юз йигирма, учинчи амир бир юз ўттиз, тўртингчи амир бир юз қирқ от, амир ул-умарога етгунча тартиб шундай бўлсин. У эса ўзи билан бирга уч юздан кам от олмасин.

Пиёдалар бўлса ҳар бири ўзи билан бирга бир қилич, бир камон ва кўтартганича ўқ-ёйдан олсинлар. Бироқ жанг пайтида тузукларда кўрсатилганидан кам бўлмасин.

УРУШ ВА ТИНЧЛИҚДА¹, «ЁТИШУ ХУЗУР»ДА² ВА МАЖЛИС-ЙИФИНЛАРДА ҲОЗИР БЎЛИШ ТУЗУКИ

Амр қилдимки, сипоҳийлар, амирлар, мингбошилар, юзбошилар ва ўнбошилар девонхонага, базм-мажлисларига кулоҳсиз, этиксиз, кавушсиз, бўрк ёқалик чакмонсиз, ханжарсиз³, қиличсиз ҳозир бўлмасинлар. Үн икки минг қилич осган аскар урушу тинчлик вақтида бутун яроқ-аслаҳалари билан кўшида, девонхонанинг ўнгу сўл тарафидан, орқасидан ва олдидан куршаб турсинглар. Шу тартибда ҳар кеча улардан минг киши соқчилик қилиш учун ҳозир бўлишсин. Ҳар юз

¹ Матнда «Базму разм».

² Матнда «Поташ» – яъни лашкар дам олаётган пайт. (–А.А.)

³ Матнда «Бўқда».



қиличлик устига бир юзбоши қўйилсин ва унга шартлашилган маҳфий сўзни¹ айтсинлар.

Яна амр қилдимки, уруш пайтида ўн икки амирдан ҳар бири, мингбошилар, юзбошилар, ўнбошилар ўн икки минг қуролланган отлиқ сипоҳий билан бир кечакундуз давомида ҳар қайсилари хонни қўриқлаш учун ҳозир бўлсинлар. Бу ўн икки минг отлиқ лашкарни тўрут фавжга бўлиб, бир фавжини баронфорга, бошқасини жавонфорга, биттасини Ўрдунинг олдига, бошқасини эса Ўрдунинг орқа тарафига тайинласинлар. Ушбу фавжлар навбатма-навбат Ўрдудан ярим фарсанг узоқлашиб соқчилик қилсинлар. Ушбу тўрут сипоҳий фавж ўzlари учун ҳировул белгиласинлар, ҳировулдан эса қоровулар тайинлансан. Улар бўлса эҳтиёткорлик ва ҳушёрликни қўлдан бермай, Ўрдуга хабар етказиб турсинлар.

Яна ҳукм қилдим, атрофимда жойлашган лашкар ва Ўрдуга, ҳар бирига биттадан кутвол тайинласинлар ва Ўрдуни қўриқлаш, соқчилик қилиш ишлари шулар устига юклансин. Бозор аҳлидан² солиқ олиш ҳам шулар зиммасида бўлсин. Агар Ўрду аҳлидан бирон кимсанинг нарсаси ўғирланса, улар жавобгарликка тортилсинлар.

(Лашкар орасидан) тўрут фавж чопқунчилар тайинлашни буюрдим. Булар тўрут фарсанг масофада лашкар ёнида юриб, уларни қўриқлаб борсин. Бордию лашкардан бирон киши ўлдирилганини ёки яраланганини кўрсалар, унинг ишини ўз зиммаларига олишлари лозим. Агар бирон кимсанинг нарсаси ўғирланса, улар жавобгардирлар.

¹ Матнда «Йўқиӣ» — яъни ўран (пароль) дейилмоқчи.

² Бозор аҳли — ҳарбий юришлар вақтида ўтруқда савдо-сотиқ билан машғул бўлган кишилар. Улар аскарлардан ўлжа тушган молларни арzon баҳода сотиб олиш ва ўз галида аскарларнинг эҳтиёжига зарур бўлган нарсаларни сотиш учун доимо лашкарга ҳамроҳ бўлганлар. Аскарларнинг ўzlари ҳам фурсат келганда олди-сотди билан шугулланганлар. (—А.А.)

Яна буюрдимки, лашкарнинг учдан бир қисми чегараларни қўриқлаш ишига белгилансин; икки қисми эса доим салтанат хизматига ҳозир турсин.

ВАЗИРЛАРНИНГ ХИЗМАТ ҚИЛИШ ТУЗУКИ

Амр қилдимки, тўрут вазир ҳар куни девонхонада муқаррар ҳозир бўлсинлар.

Биринчиси — мамлакат ва раият вазири. Бу вазир мамлакатнинг муҳим ва кундалик ишларини, раият аҳволини, вилоятлардан йиғилган ҳосил, солиқ-ўлпонлар, уларни тақсимлаш, кирим-чиқимларни, (мамлакат) ободонлигини, (аҳолининг) фаровонлиги ишларини ва мулкни қай тарзда тартибга келтираётганлигини менга билдириб турсин.

Иккинчиси — сипоҳ вазиридирики, сипоҳийларнинг улуфаси ва танҳоҳи борасида менга маълумот берсин; сипоҳ тарқоқ ҳолатта тушиб қолмаслиги учун уларнинг аҳволидан хабардор бўлсин, вазиятни менга англатиб турсин.

Учинчиси — эгасиз қолган, ўлиб кетган ва қочгандарга тегишли молларни, келиб-кетаётган (савдогарлар ва сайёҳлар)нинг мол-мулкидан олинадиган закот ва божларни, мамлакат чорваларини, уларнинг ўтлов-яйловларини бошқариб, буларнинг барисидан йиғилган даромадни омонат тарзида сақловчи вазирдир. У фойиб бўлганлар ва ўлганларнинг мол-мулки бўлса, мерросхўрларига топширсин.

Тўртинчиси — салтанат ишларини юритувчи вазир. У бутун салтанат идораларининг кирим-чиқимлари, хазинадан сарф қилинган тамом ҳаражатлар, (ҳатто) отхона ва (саройдаги) бошқа жонзотларга қилинган ҳаражатларгача огоҳ бўлиши лозим.

Яна амр қилдимки, чегара ерлар ва менга тобеъ мамлакатларга оид, (ишларга масъул) уч вазирдан ибо-

рат давлат ҳайъати тузилсин. Улар мазкур ерлардаги молиявий муомалалар ва келадиган даромадларни бошқарсиналар.

Бу етти вазир девонбегига бўйсуниши лозим ҳамда у билан иттифоқда муҳим молиявий ишларни амалга оширмоқлари ва менинг арзимга етказмоқлари зарур.

Яна ҳукм қилдимки, бир кишини арзбеги қилиб тайинласинлар. У сипох, раият ва арз-дод қилиб (хузуримга) келувчиларнинг аҳволини, мамлакатнинг ободхароблигини, муҳим ишлардан қайси бири битган-битмаганигини менинг арзимга етказиб турсин.

Амр қилдимки, садри аъзам саййидлар ва бошқа арбобларга суюргол тариқасида берилган ерлар ҳамда вакфларнинг аҳволини, улар вазифаларини қай дараҷада адо этаётганини, уларга ажратилган жамғармаларнинг тақсимланишини менга арз қилиб турсин.

Ислом қозиси шариат ишларининг бориши ва ажрим қозиси дунёвий ишлар ҳақида менга билдириб турсинлар.

Яна амр қилдимки, салтанат ишлари, мамлакатни идора этиш, ундаги ўзгаришлар, алмаштиришлар, сипоҳийлар ва амирларнинг тайинланиши, турли кенгаш-тадбирларни хос мажлисда менга арз этсинлар. Бу мажлисларда маҳфий ва сирли ишларни пинҳон тутишга қодир маҳсус котиб ҳозир бўлиб, ростлик қалами билан маҳфий-яширин кенгашларни ва гапларни ёзиб борсин.

Ва яна мажлис котибларини¹ тайинлашни буюрдимки, девон мажлисида навбатма-навбат ҳозир бўлиб, мажлисда кўрилган, ҳал қилинган муҳим масалалар ва айрим ишлар тафсилотларини ёзиб олиб, сақласинлар. Менга арз қилинган гаплар, чиқарган ҳукмларим, мажлисларда кўрилган мамлакат аҳамиятига молик ишлардан тортиб, жузъий ишларгача барчаси-

ни қаламга олиб, (бошимдан кечирган) воқеалар дафтарига киргизсинлар.

Салтанатнинг ҳар бир идорасида бўладиган киримчиқимларни, кундалик харажатларни ёзиб бориш учун бир котиб тайинлансин.

УЛУСЛАР, ҚЎШИНЛАР¹ ВА ТУМАНЛАРНИНГ² АМИРЛАРИНИ ТАЙИНАШ ТУЗУКИ

Буюрдимки, юриш вақтида ҳар бир улус ва туман амири ҳар чодирдан³ бир отлиқ, ҳар икки олачуқдан бир отлиқ, ҳар бир уйдан бир отлиқ аскар ажратиб, ўзлари билан бирга олиб кетсинлар. Улар қайси мамлакатта келиб тушсалар, оладиган улуфалари ўша ернинг сугориладиган майдони ва ўтлого ҳисобидан белгилансин. Улусларнинг амирларига яргу⁴ ва байроқлар берсинлар. Амирлар улуслар ва туманларнинг ҳолқудратига яраша отлиқ аскар ҳозирлаб, юришга олиб келсинлар.

Қарамоғимдаги қирқ аймокдан ўн иккитасига – барлос, тархон, аргин, жалойир, тулкичи, дўлдай, мўғул, сулдуз, тўқай, қипчоқ, арлот, тоторга тамға берилсингим, булар менинг хос навкарларим бўлиб ҳисоблансанлар.

Барлос уруғидан (қўйидаги) тўрт кишини амир улумаро қилдим: Амир Худойдод, унга Бадахшон мам-

¹ Кўшин(қўшун) – лашкар бўлинмасининг аталиши; аммо бир кўшинга бириктирилган аскарлар сони тайин бўлмаган. Турли манбаларда бир кўшин 50 – 100 кишидан 600 – 1000 кишигача еттани қайд этилган.

² Туман (тумон) – ўн мингдан иборат рақамни англатиб, лашкар ҳисобига ҳам, маблағ ҳисобига ҳам нисбатан қўлланган. Кўпинча мазкур рақамдан иборат лашкар бирикмаси ва бу бирикмани юбориши лозим бўлган қабила ёки уруғлар уюшмаси маъносида келади.

³ Матнда «хиргоҳдан».

⁴ Яргу – ясо ва йўсун (қонун) асосида чиқарилган ҳукм; бу ерда бирон ҳақ-ҳуқуқ, берувчи расмий ҳужжат маъносида.



лакатини инъом этдим; амир Жаку, амир Ийгу Темур ва амир Сулаймоншоҳга ҳам биттадан чегара мамлакатини тортиқ қилдим. Барлос уруғидан яна юз кишини мингбоши қилдим. Амир Жалолиддин барлосни ўнинчи амир, амир Абу Саъидни тўққизинчи амир дарражасига кўтардим.

Тархон улусидан амир Боязидан еттинчи амир дарражасига тайинладим. Улардан йигирма кишини юзбоши қилдим.

Аргин улусидан Тош Хўжани саккизинчи амир қилдим. Булардан йигирма кишини мингбоши, юзбоши ва ўнбоши қилиб тайинладим.

Жалойир улусидан Түф Темур ва Шер Баҳромни саккизинчи ва тўққизинчи амир этиб тайинладим. Булардан йигирма кишини юзбоши ва ўнбошиликка белгиладим.

Тулкичи улусидан Улжайту Апардийга амирлик мартабасини бердим.

Дўлдай улусидан Тобон баҳодир ва Сон баҳодирга амирлик мартабасини бердим.

Мўғул улусидан Темур Хожа Ўғлонни амирлик мартабасига етказдим.

Судуз улусидан Элчи баҳодирга амирлик мартабасини бердим.

Тўқай улусидан Али Дарвишни амир қилдим.

Қипчоқ улусидан Сари Буғага амирликни бердим.

Арлот улусидан амир Муаййидниким, синглим унинг никоҳида эди, амир ул-умаро этиб тайинладим. Салайчи баҳодирни ҳам амирликка кўтардим.

Тотор улусидан Кўёнақхонга амирлик (мартабасини) бердим.

Тамғага етмаган йигирма саккиз аймоқ бошлиқдариға улус амирлигини бердим. Улар юриш ва жангужадал пайтида тузукка биноан ўз улусидан отлиқ ас-кар тўплаб, ҳозир бўлсинлар.

НАВКАРНИНГ БЕГИГА ВА БЕКНИНГ НАВКАРИГА МУОМАЛА ҚИЛИШ ТУЗУКИ

Ҳақиқий навкар билсинким, у агар (қўл остида) ўз навкари бўлган тақдирда ундан нимани талаб қилса, унинг беги ҳам ундан айнан шу нарсани кутади. Шундай бўлгач, ўзини бек хизматидан озод этилган деб ҳисобламасин. Яна шуни ҳам билиши керакки, агар беги унга аввалига иноят-марҳаматлар кўрсатсаю, охирни иноятсизлигу илтифотсизлик қилса, у ҳолда айб ва нуқсонни бегидан эмас, ўзидан ахтарсин. Тўғри навкар ўз бегига ихлос қўйиб, холис хизмат қилиши керак. Қайси навкар бегига ихлос қўймай, кўнглида гинакудурат сақласа, ихлоссизлик ва адовати туфайли баҳтсизликка дучор бўлади. Лекин ўз бегига ихлос қўйган навкарнинг бойлиги давлати ва ноз-неъматлари кундан-кун ортиб боради.

Бегига эътиқоди кучли навкар улким, унинг оғирқаттиқ эътироғли сўзларидан ранжиб, кўнглида кек сақдамайди. Бегидан танбеҳ эшитса, ўзини айбор деб билади. Бундай навкар таъмину тарбияга лойиқдир.

Қайси навкарнинг ҳиммати емак-ичмак, яхши кийинмаккагина боғланар экан, албатта, иш вақтида сусткашлик қиласди.

Қайси навкар ўз хизмати, ҳақ-бурчини унугиб, иш вақтида (мехнатдан) юз ўтирадар экан, ундей навкардан юз ўғирмоқ лозим. Қайси навкар иш вақтида баҳона излаб, жангужадал пайтида ижозат сўраб, қочишни мўлжалласа, бугунги ишни эртага қолдирса, Пўлод ва Темур Ўғлон бошимга иш тушганда ўзларини шу қабилда тутиб, мени ташлаб кетганлари каби, бунга ўхшаш навкарлар номларини ҳам тилга олишга муносиб эмасдирлар. Бундай одамларни парвардигори олам (хукмига) топшириш зарур.

Яна ҳақиқий подшоҳларга лозимдирки, қайси навкарни ўзлари улуғлаб (мартабасини) кўтарган бўлса-



лар, тезда уни хорлаб тубан туширмасинлар. Ўзлари кўтарган кишиларни пастта урмасинлар. Кимники билган ва таниган бўлсалар, уни унутмасинлар. Агар аҳён-аҳёнда унинг иззат-нафсига тегиб хўрлаган бўлсалар, эвазига илгариғидан икки баробар ортиқ иззатини оширсинлар ва ўша навкарни ўз ихлосию эътиқодига ҳавола қилсинлар. Агар у кўнглида гина-адоват сақласа, тез орада ўзи баҳтсизликка учрайди. Бегининг кўнглида яхшилиги билан жой олган ҳар бир навкар куни келиб яхшилик кўриши аниқдир.

Қайси бир навкар ўз ихтиёри биланми ёки ихтиёрсизми бегидан ажраб кетсаю, кейинроқ яна қайтиб келса, уни ҳурматласинлар, чунки у ажралиб кетганидан пушаймонлиги учун ҳам қайтиб келган.

Яна амр қилдимки, фаним томонидан навкар бизга қарши қилич кўтарар экан, ўз юртининг туз ҳақини ҳалоллаган саналади. Агар шундай кишилардан биронтаси жанг пайтида қўлга тушса ёки фаним томонидан умиди узилиб, бизга келиб хизмат қилишни истаса, уни азиз тутсинлар, мартабасини ошириб, содик одам деб ҳисобласинлар. Чунончи, Менгли Буга, Ҳайдар Андхудий ва амир Абу Саъид – булар олти минг отлиқ аскар билан Балх дарёси¹ бўйида менга қарши жанг қилдилар. Кейинроқ, Туғлуқ Темурхондан ноумид бўлиб, менинг паноҳимга келганларида уларга иззат-икром кўрсатиб, Ҳисори Шодмон, Андижон ва Туркистон вилоятларини уларга инъом қилдим.

Ва амр қилдимки, ҳар бир навкар фаним наздида ҳурмат-эътиборга эга бўлиб қадрлансаю, бироқ жангу жадал пайтида ўз бегига хиёнат қилса, унинг душманига дўстлик кўрсатса, туз ҳақини, бек ҳурматини, навкарлик (бурчини) ва (ундан) кўрган ноз-нечматларини унутса, ўз бегининг душманига ён босиб, уни ўз бегидан устун қўйса, бундай кимсани хизматга йўлат-

масинлар. Ҳаётнинг ўзи бундайларнинг қилмишига яраша жазосини беради.

Қайси бир навкар юриш вақтида ўз бегидан юз ўтириб, ундан ажралиб, (сизнинг) олдингизга хизмат истаб келса, ундай навкарга ишониб бўлмайди. Агар у маълум муддатдан кейин кўп хизмат қилиб фидокорлигини кўрсатса, у чоғда уни олиб қолса бўлади. Агар (бирон навкар) тинчлик вақтида сизга хизмат қилишини ихтиёр этса, уни қадрласинлар.

Агар вазирлардан ёки навкарлардан биронтаси (уруш кунларида) тадбиркорлик ишлатиб, душман билан алоқа боғлаб, унга ошнолик қилгандай ўз бегининг ишини битирса, ундай одамни энг ақлли дўстлардан ва хизматкорлардан деб ҳисоблаш зарур. Лекин бирор навкар ёв билан келишиб, ўз эгасига мунофиқлик қилса, бундай навкарни душман қаторида санаш лозим.


Агар навкарлардан бири қилич чопишиб, фанимни синдирап экан, ғаразгўй одамларнинг унинг ҳақида айтган гапларига қулоқ солмасинлар. Унинг қилган хизматларини яшимасинлар, бир хизматини ўнга йўйисинлар, мартабасини оширсинлар, токи бошқа навкарлар буни кўриб жонбозлик қилишга рафбатлансинлар.

Сипоҳий фавжлардан ёки амирлардан қайси бири ёв билан келишиб, дўсту ошно бўлиб яшаш йўлидан бурилиб, фанимлар сафига бирлашар экан, уларни юртдан чиқариб, ҳеч ердан ўрин бермасинлар. Бунга мисол, Кеш¹ лашкарининг саркардалари мендан юз ўтириб, амир Ҳожи Барлос лашкарига қўшилдилар. Шундан кейин мен уларга ишонмай қўйдим.

Агар навкарни бирон мамлакатга ҳоким қилган бўлсалару, у бевафолигидан душман билан келишиб, юртни унга таслим қилса, ўлим жазосига маҳкум эт-

¹ Балх дарёси – Амударёning ўрта оқимдаги номи. (–А.А.)

¹ Кеш – Шахрисабз шахри ва вилоятининг ўрта асрлардаги номи.



синлар. Мамлакатни қўл остида сақлаб қололган навкарни эса юқори мартабага кўтариб, ҳурматласинлар.

Қайси бир амир уруш кунлари, ахвол танг бўлган пайтда, жанг майдонида ихлос қадамини маҳкам қўйиб, дўст-ошнолик ҳақини сақлаган бўлса, уни ўз оға-инисидек кўрсинглар. Чунончи, Кеш амирлари ва лашкари мендан бутунлай юз ўтирганларида ва амир Жаку Барлосдан бошқа ҳеч кимса олдимда қолмаган бир пайтда, мен амир Жакуни ўз азиз оғамдай кўриб, давлатимнинг ишончли одами деб билдим. Уни амир улумаро этиб тайинлаб, Балх ва Ҳисор мамлакатларини унга инъом қилдим.

ДЎСТУ ДУШМАНГА МУОМАЛА ҚИЛИШ ТУЗУКИ

Турон мамлакатини фатҳ, эттан куним ва пойтахт Самарқандда салтанат тахтига ўтирганимдан сўнг, дўсту душман билан (муомалада) бир текис йўл туттдим. Менга ёмонлик қилган, макр-хийла ишлатиб, жанг майдонида менга қарши қилич яланғочлаган Бадаҳшон амирлари, турку тожик қўшинларининг баъзи амирлари қилган қингир ишларидан қўрқувда эдилар. Чорасиз қолиб, илтижо билан менинг паноҳимга келганинда уларга шундай яхшиликлар қилдимки, менинг иноятим ва хайр-эҳсонимни кўриб, ўзлари шарманда бўлдилар. Кимни ранжиттан бўлсан, эҳсону инъомлар билан кўнглидаги хафагарчиликни чиқардим ва мартабаларига қараб имтиёзлар бердим.

Лекин Сулдуз ва Жета амирларидан нафратландим, чунки улар Қобулшоҳ¹ чингизийни амирлик, кейинроқ хонлик (такси)га ўтказиб, унга дўстона ихлос билан хизмат қилиш хусусида аҳду паймон қилганди-

¹ Қобулшоҳ – асли чингизий шаҳзодалардан, дарвиштабиат одам бўлган. 1364 й. бошида амир Ҳусайн ва Амир Темур уни хон кўтарган эдилар.

лар. Бироқ кейинроқ, менинг салтанат тахтига ўлтирганимни эшитишгач, менга хушомад қилмоқчи бўлиб, онтларини буздилар ва уни ўлдиридилар.

Менга ҳасад қилиб, ўлдиришга қасд қилган кишиларга шунчалик совфа-инъомлар бериб, муруввату эҳсон кўрсатдимки, бу яхшиликларни кўриб, хижолат терига гарқ, бўлдилар.

Ҳамиша менинг розилигимни олиб иш тутган дўстларим олдимга паноҳ излаб келгандарида, уларни ўзимнинг баҳту давлатимга шерик билиб, ҳеч қачон мол-мулк ва тирикчилик ашёларини улардан аямадим.

Яна ўз тажрибамдан билдимки, содик ва ҳақиқий дўст улким, ўз дўстидан ранжимайди, дўстининг душманини ўз ёви деб билади. Агар керак бўлса, дўсти учун жонини ҳам аямайди. Шундайки, амирларимдан қай бирлари менга жон-дили билан ҳамроҳлик қилган бўлсалар, мен ҳам улардан ҳеч нарсани аямадим.

Яна ўз тажрибамда кўрдимки, ақлли душман, жоҳилу нодон дўстдан яхшироқ экан. Чунончи, амир Қазағанинг набираси амир Ҳусайн нодон дўстлардан эди. Унинг дўстлик юзасидан қилган ишларини ҳеч бир душман қилмайди.

Амир Худойод менга шундай деди: «Душманинги лаълу жавоҳирдек сақлагил, қачонки бирон тошлоқ ерга келиб қолсанг, уни олиб тошга шундай ургинки, талқони чиқиб, ундан нишон ҳам қолмасин». У яна шундай деди: «Агар душманинг бош уриб паноҳингга келса, раҳм қилиб, яхшилик ва мурувват кўрсатгил». Чунончи, мен Тўхтамишхонга қилганим каби. У паноҳимга сифиниб келганда, унга яхшилик ва мурувват кўрсатдим. Агар душман сендан мурувват ва хайр-эҳсон кўрсаю, яна қайтадан душманлик йўлини тутса, уни парвардигорнинг (ҳукмига) топшириш.

Чин дўст улдирики, дўстидан ҳеч қачон ранжимайди, агар ранжиса ҳам, узрини қабул қиласди.



САЛТАНАТ САРОЙИДА ЎТИРИШ ВА ЎРИН ОЛИШ ТУЗУКИ

Амр этдимки, ўғилларим, набираларим, қавм-қариндошларим ўз даража ва мартабаларига яраша худди ой қўргонлагандек, салтанат тахтини ўраб ўтирислар.

Сайийдлар, қозилар, уламо, фузало, шайхлар, улуғлар ва аслзодалар ўнг томондан ўрин олсинлар.

Амир ул-умаро, бекларбеги, амирлар, нўёнлар, улус, туманлар, қўшинларнинг сардорлари ва амирлари, мингбошилар, юзбошилар, ўнбошилар ўз мартабаларига яраша, чап қўл томонда ўтирислар.

Девонбеги ва вазирларнинг ўрнини тахт қаршисидан кўрсатдим. Турли мамлакатлар, эл-улусларнинг юрт-оғалари ва беклари эса, вазирлар орқасида қатор бўлиб ўтиришларини буюрдим.

Баҳодир деган фахрли номга эга мард йигитлар, қилич чопиб танилган ўғлонлар салтанат тахтининг орқасида, ўнг қўл томонда ўтирислар. Қоровулбекларни эса салтанат тахтининг орқасида, чап қўл томонда ўтиришларини буюрдим.

Ҳировул амири менинг рўпарамдан ўрин олсин. Ички¹, хусусий ясовулим эса катта чодир эшиги олдиди, тахтим поясининг тўғрисида тик турсин. Арзодод қилиб келганлар ўнг ва чап томонда тик турсинлар.

Оддий сипоҳийлар, хизматчи ва сарой кишилари² ҳар қайсилари ўз мартабаларига яраша саф тортиб, ўз жойларини билиб тик турсинлар.

Ўрин олиш қоидаларининг бажарилишини назорат қилувчи тўрут амирга, мажлисга ҳозир бўлганларни ўз тартиби билан тахтимнинг ўнг ва сўл, одди ва орқасига жойлаштиришларини буюрдим.

¹ Ички – подшоҳ, ва хонларнинг хос хизматчилари, беклар.

² Матнда «шилон».

Яна ҳукм қилдимки, қачон мажлис қоидага мувойфиқ тартибга келтирилгач, минг товоқ ош, минг дона нон келтириб, умум йигилганларга шоҳона зиёфат берсинлар. Минг товоқ ошни мумтоз ва хос кишилар базмига олиб келиб, шундан беш юз товоғини улус амirlарига, саркардаларга, оқсоқолларга, ҳар қайсисининг номига атаб тарқатсинлар.

МАМЛАКАТЛАРНИ ЗАБТ ЭТИШ ТУЗУКИ

Бирон мамлакатда жабр-зулм ва фисқу фасод кучайиб кетаркан, асл подшоҳлар адолат ўрнатишиб, фисқ-фасодни, зулмни йўқотиш ниятида ана шундай мамлакатта ҳужум бошлиши лозим. Тангри таоло шу ниятнинг шарофати билан мамлакатни золимнинг қўлидан тортиб олиб, одил (подшоҳ)га топширади.

Чунончи, мен Мовароуннаҳр вилоятида адолат ўрнатишиб ниятида уни золим мўғуллар тоифасининг қўлидан тортиб олдим.

Қайси бир мамлакатда шариат заифлашган бўлса, Оллоҳ, улуғ қилган нарсаларни хор тутсалар ва Худонинг хос бандаларини ранжитсалар, чинакам жаҳонгир султон ҳазрати Муҳаммад саллаллоҳу алайҳи ва-саллам дини ва шариатига ривож бериш учун ўша мамлакатта кирсин. Худонинг расули ўнга мағаду иноят кўрсаттай. Бунга мисол, мен Ҳиндистон пойтахтини Ферузшоҳнинг¹ набираси Султон Маҳмуддан, Маллухон ва Сарангдан² тортиб олдим, дину шариатга ривож бердим ва ўша диёрнинг бутхоналарини буздирдим.

Қайси мамлакатнинг аҳолиси ўз ҳокими ёки вољисидан озор чеккан ва ўша диёр аҳлиниң кўнгли

¹ Ферузшоҳ – Шимолий Ҳиндистонда ҳукмронлик қилган Туғлоқийлар сулоласи (1320 – 1413)дан чиқсан ҳукмдор. 1351 – 1388 йиллари ҳукмронлик қилган.

² Саранг – Маллухоннинг иниси. Ўша пайтларда Мўлтон вилоятининг ҳокими лавозимида турган.



ўз волийсидан қолган бўлса, мамлакатларни забт этгувчи чинакам подшоҳ, у ерларни ўз тасарруфига олсин. Одил подшоҳ, у ерга қадам қўйиши билан фатҳу зафар ҳам унга ёр бўлиб, (у билан) бирга киради. Бунга мисол, мен Хурсон вилоятини Курт султонларидан¹ ажратиб олдим². Хурсон пойтахти – Ҳиротта қараб юзланишим билан Султон Фиёсиддин бутун мамлакатни, хазина-дафиналари билан пешкаш қилиб менга топшириди³.

Қайси мамлакатда диндан қайтишлиқ, худосизлик кучайса ва у диёрнинг аҳолиси, сипоҳу раият турли маслакка кириб иттифоқлари бузилса, у мамлакатнинг ҳалокати яқиндир. Чинакам жаҳонгир подшоҳ, ундай юртни ўз тасарруфига олиши лозим. Мисол учун мен Ироқи ажам ва Форс вилоятларини малъун динсизлар вужудидан тозаладим, золим ҳукмдорларни ағдариб, худо бандаларини уларнинг жабр-зулмидан кутқаздим.

Қайси бир вилоят ҳалқининг эътиқоди ҳазрати Сайид ал-мурсалин⁴, унга Оллоҳнинг марҳаматлари бўлсин, хонадони ақидаларидан фарқданиб ўзгарган бўлса, подшоҳлар ўша вилоятни тасарруфларига олишлари ва у ер аҳолисини бузуқ эътиқодларидан қайта-ришлари лозим. Бунга мисол, мен Шом вилоятига кириб, бузуқ эътиқодли кишиларни жазоладим.

Жаҳонгирлик қилишга киришганимда тўрт нарсанни хотиримда маҳкам сақладим.

Биринчиси – қайси мамлакатни забт этмоқчи бўлсан, тўғри кенгаш ва тадбир билан иш тутдим.

¹ Курт султонлари – Фур билан Ҳиротни идора қилган сулола, унга Малик Шамсиiddин Муҳаммад (1245 – 1278) асос солган.

² Амир Темур Ҳиротдаги Куртлар сулоласини 1381 йили тугатган.

³ Яни, Хурсон ҳалқи Амир Темурни ҳалоскор сифатида кутиб олган.

⁴ Сайид ал-мурсалин – барча пайғамбарларнинг етакчиси (Муҳаммад пайғамбарнинг фахрли номларидан).

Иккинчиси – хатога йўл қўймаслик учун ҳар бир ишни кўп ўйлаб, сергаклик ва эҳтиёткорлик билан қилдим. Шунинг учун менга Оллоҳнинг мададу инояти етиб, нима тадбир қўллаган бўлсан, тўғри ва рост чиқди. Ҳар ер эл-улусининг табиати ва ҳалқининг мизожларини хотиримга келтириб, уларнинг табиатига мувофиқ йўл тутиб, шунга қараб уларга ҳоким тайинладим.

Учинчиси – уч юз ўн уч асил зотли, шижоатли ва ақл-фаросатли эр йигитларни атрофимга бирлаштирдим. Бирлик-иттифоқлари шундай эдик, ҳаммалари гўё бир тандек эдилар. Барчаларининг мақсадлари, раъйлари, сўзлари ва ишлари битта эди. Бир ишни қилайлик деб қарор қилсалар, тутатмагунларича ундан қўл узмас эдилар.

Тўртингчиси – бугунги ишни эртага қолдирмадим. Юмшоқлик лозим бўлса, мулоимлик қилдим; қаттиқ-қўллик ишлатиш вақти етса, қатъий чоралар кўрдим. Шошмаслик керак ерда шошилмадим, шошилинч ишларни кечиктирамадим. Қайси ишни чораю тадбир билан битиришнинг иложи бўлса, унда қилич ишлатмадим.

Кундузлари тажрибали ва доно кишилар билан турли мамлакатларни забт этиш шатранжи устида бош қотирдим. Кечалари бўлса тўшагимда ёнбошлаб олиб, мамлакат ишларини қандай юргизиш кераклиги ҳақида ўйладим ва уларни бажариш воситаларини ўзимча тасаввур қилиб кўрдим. Ўзга мамлакатларни забт этиш йўлларини ўз кўнглимда чамалаб, қай тарзда ҳужум қилиб, қандай чекиниш мумкинлигини белгилар эдим. Сипоҳийларим билан қандай муомала қилишим тўғрисида фикр юргизиб, қайси бирини қандай тарбият қилишим керак, қайси ишни қай бирига топширсам, хато қилмаган бўламан деб, ҳар ишнинг олди-кетини ўйлар эдим.

Сипоҳ, бошлиқларидан қайси бири менга дўстлик қилса, уни ҳаддан ортиқ хайру эҳсонлар билан сий-



ладим. Яхшилик қылсам, ёмонлик билан жавоб берган кымсаларни нопок деб билдим. Икки олам сарвари ва (Оллоҳ) нинг расули дебдиларким: «Зинодан туғилган киши ўзига яхшилик қылган одамга ёмонлик қилмактунча дунёни тарк этмайди».

Пирим менга ёздиким: «Худонинг ва пайғамбари-нинг хукмига амал қылгин, расулуллоҳнинг зурриётига ёрдам бер, Тангрининг неъматларини еб, яна унга ва унинг пайғамбарларига душманлик қылган подшоҳларни Оллоҳнинг мулкидан чиқар. Парвардигорнинг мулкида адолатли иш туттилким, шундай демишлар: «Мамлакат куфр билан туриши мумкин, лекин зулм бор ерда туролмайди...»

Қабих, хатти-ҳаракат, ёмон ишлардан Оллоҳ, мулкини тозалагин. Ёмон таом баданга қандай зиён қылса, ёмон хатти-ҳаракат ҳам оламга шундай таъсир кўрсатади. Зулмнинг ном-нишонини йўқот. Золимнинг дунёда узоқ ҳаёт кечиришини яхшиликдан деб била кўрма. Золим ва фосиқларнинг узоқ яшашига сабаб шуки, ўзларидағи бор ёмонликларини юзага чиқариб, тутатмагунларича Тангри уларга муҳлат беради, кейин Оллоҳнинг қаҳру фазабига учрайдилар. Гоҳида Оллоҳнинг қудрати билан золимлар, фисқу фужур қилувчилар бирдан банду зиндонга, талон-торожга, очликка, қаҳатга, вабога, тўсатдан ўлишга гирифторм бўладилар. Гоҳида бегуноҳ бўлган яхши, тўғри ва тақводор кишилар ҳам ёмонларнинг қилмишларидан оғату балога учрайдилар. Шундайким, тўқайга ўт тушса, ҳўлу куруққа қарамай барчасини куйдиради. Кофирлар, золимлар, фосиқу фужурлар қанча кўп зулм-хиёнат, фисқ-фасод қылсалар, ноз-неъматлари шунча кўпаяр экан, деб ўйламагин. Қисқаси, уларнинг неъматлари кўпайишининг сабабини билиб олиш керак. Бунинг сабаби ушбутир: «Эҳтимол, ҳақиқий неъматлар бе-рувчи (Оллоҳ)нинг иноятини кўриб, улар (балки) зулмдан, фисқ-фасоддан қайтиб, имон-инсофга келиб,


унинг неъматларига шукр этарлар», деб шундай қилингандир. Бироқ Оллоҳга шукр айтишни унутарканлар, Тангрининг даргоҳига қайтмас эканлар, Худо ва унинг расули неъматлари ҳақини билмас эканлар, охир-оқибат Парвардигорнинг қаҳру фазабига гирифторм бўладилар».

Пиримнинг бу мактуби менга етиб келгач, Худо мулкини золимлар, бидъатчи мунофиқлар, фосиқу фужурлар қўлидан тортиб олиш, уларни йўқотиш учун белга ҳиммат камарини боғладим.

САЛТАНАТНИ ИДОРА ҚИЛИШ ТУЗУКИ

Қайси мамлакатни забт этган бўлсан, ўша ернинг обрў-эътиборли кишиларини азиз тутдим; саййидлари, уламолари, фузало ва машойихларига таъзим бажо келтирдим, ортиқ ҳурматладим. Уларга суюргол, вазифалар бериб, маошларини белгиладим, ўша вилоятнинг улуғларини оға-иниларимдек, ёшлари ва болалари бўлса ўз фарзандларимдек кўрдим. Мазкур мамлакатларнинг сипоҳи учун даргоҳимга йўл бердим. Раиятини ўзимга қаратиб олдим. Ҳаммани қўрқув ва умид орасида сақладим. Ҳар мамлакатнинг яхши кишиларига мен ҳам яхшилик қилдим, нафси ёмонлар, бузуклар ва ахлоқсиз одамларни мамлакатимдан қувиб чиқардим. Пасткаш ва разил одамларга ўзларига лойик ишлар топширдим ҳамда ҳаддиларидан ошишларига йўл қўймадим. Ҳар элнинг улуғларини ва шараф-эътиборли кишиларини ҳурматлаб, мартабаларини оширдим. Ҳар мамлакатда адолат эшигини очдим, зулму ситам йўлини тўсдим.

(Ўз эрки билан) менга бўйсунган вилоят ҳокимларига ўша юрт ҳукуматини бердим ва уларни инъому эҳсон билан қадрлаб, ўзимга тобеъ қилиб олдим. Бўйсунмаганларини эса қилмишига яраша жазоладим.



Одил, оқил ва уддабурон кишиларни уларга ҳоким этиб тайинладим.

Амр этдимки, ўғри ва қароқчиларни «Ясо» асосида жазоласинлар, фасодчи, бузуқи, нафси ёмон кишиларни мамлакатдан ҳайдасинлар. Эзма-бекорчи одамларни вилоят ва шаҳарларда қолдирмасинлар.

Ҳар бир шаҳар ва қишлоққа кутвол тайинласинларки, сипоҳу раиятта соқчилик қылсинг, кимнинг бирон нарсаси ўтиранса, бунинг масъулияти унинг зиммасида бўлсин.

Ва яна буюрдимки, йўл устига кузатувчилар, зобитлар тайинласинларки, йўлларни қўриқлаб, йўловчилар, савдогарлар, мусофиirlарни кузатиб, мол-мулки ва бошқа нарсаларини манзилдан-манзилга етказиб қўйсинглар. Йўл устида бирортасининг нарсаси йўқолса, ўзи ўлдирилса ёки бошқа кор-ҳол юз берса, булар учун жавобгарлик уларнинг зиммасида бўлсин.

Яна буюрдимки, фаразгўй, нафси бузук кимсаларнинг тухмати билан катта ва кичик шаҳарлар аҳолисидан ҳеч кимни жазоламасинлар. Фақат гуноҳи тўрт кишининг гувоҳлик бериши билан исботланса, гуноҳига яраша жазоласинлар. Амр этдимки, ҳеч бир шаҳар ва қишлоқда одамлардан жон солифи¹, уй солифи² олмасинлар. Сипоҳийлардан бирон киши раиятнинг хонадонига зўрлик билан келиб тушмасин, раиятнинг отловини тортиб олмасин.

Ҳар бир мамлакатнинг раияти билан бўлган муоммалада, уларга нисбатан холислик билан иш тутсинглар. Яна буюрдимки, ҳар мамлакатнинг гадоларига вазифа юклаб иш берсинглар, токи шу йўл билан гадолик йўқотилсан.

¹ Матнда «сари шумор».

² Матнда «хона шумор».



МУЛКУ МАМЛАКАТ, СИПОҲУ РАИЯТ АҲВОЛИДАН ХАБАРДОР ВА ОГОҲ, БЎЛИБ ТУРИШ ТУЗУКИ

Амр қилдимки, ҳар ерда, вилояту шаҳар ва лашкар ўрдусида кундалик воқеаларни ёзувчиларни¹ тайин қилсинларки, ҳокимлар, раият, сипоҳ, ўз лашкари ва ёт лашкарнинг хатти-ҳаракати ҳақида мени хабардор қилсин. Атрофдан кирган-чиққан мол-мулқ, четдан кирган, четта чиққан ёт кишилар, ҳар турли мамлакатлардан келган карвонлар, қўшни подшоҳлар, уларнинг гапсўzlари, ишлари ҳақидағи хабарлар ва узоқ ўлкалардан бўлиб, менинг даргоҳимга юзланган уламо, фузало ҳақидағи сўzlарни тўғрилик билан менга ёзиб турсинглар. Агар бунга хилоф иш туттудек бўлсалар, (бўлиб ўтган) воқеаларни ёзмасалар, ёзувчининг хабар ёзган бармоқлари кесилсин. Агар хабар ёзувчи бирор сипоҳийнинг хизматини яширса ёхуд хабарни бошқа либостга кийинтириб (ёлғон) ёзган бўлса, у ҳолда унинг қўлини кессинлар. Агар ёлғон хабарни тухмат ёки фараз билан ёзган бўлса, уни қатл этсинглар ва яна амр этдимки, ушбу хабарларни кунма-кун, ҳафтама-ҳафта, ойма-ой менинг арзимга етказиб турсинглар.

Амр қилдимки, мингта тезюар түя минган, мингта от минган елиб-югурувчи кишини чопқунчи, минг нафар тезюар пиёдани чопар этиб тайинласинларки, турли мамлакатлар, сарҳадларнинг хабарларини, қўшни ҳукмдорларнинг мақсадлари ва ниятларини билиб, ҳузуримга келиб, хабар қылсинглар, токи бирон воқеа, кор-ҳол юз бермасидан бурун унинг чораси ва иложи қидирилсан.

Чунончи, Тўхтамишхоннинг Ўрусхондан енгилгани ҳақида менга хабар етказгандарида², унинг паноҳ, из-

¹ Матнда «хабарнавис».

² Гап 1376 иили Тўхтамишхон Ўрусхондан қочиб, Самарқандга келиши билан боғлиқ воқеалар устида бармоқда. (—А.А.)



лаб ҳузуримга келишини билдим. (Шунинг учун) Ўрус-хонга қарши жанг қилишга тайёрлана бошладим ва Тўхтамишонга ёрдам бердим.

(Шунга ўхшаш) яна бир мисол. Ҳиндистонни забт этиш учун йўлга чиққанимда¹, бу ўлканинг ҳар бир вилоятида алоҳида ҳоким ёки волий салтанат таҳтида ўтиргани ҳақида менга хабар келтирдилар. Чунончи, Мўлтон ўлкасида Маллухоннинг иниси Саранг, Деҳлида Султон Маҳмудхон салтанат байронини ёйганди. Лоҳур² ноҳиясида Маллухон лашкар тўплаганди, Қанауж³ вилоятида эса Муборакхон салтанатга даъвогарлик қилиб бош кўтарган эди. Қисқаси, Ҳиндистоннинг ҳар бир вилоятида бирон-бир кимса салтанат тожу таҳтига даъвогарлик қиласди. Бу хабар қулогимга етгач, бу мамлакатни забт этишим осон туюлди. Чунончи, Ҳиндистонни забт этган вақтимда Рум Қайсари менинг баъзи мамлакатларимга чопқун қилгани, гуржилар бўлса ўз юртлари чегарасидан ташқари чиқиб, менинг лашкарларим қамал қилиб турган баъзи қалъалар ичидаги одамларга ёрдам бераётгани ҳақида хабар келтирдилар. Ўз-ўзим билан кенгашиб, агар Ҳиндистонда кўпроқ туриб қолсам, Эрон мамлакатида ҳам тартибсизлик бошланиши мумкин, дедим. Шунинг учун Ҳиндистон пойтахтидаги ишларимни тезда тартибга келтириб, юриш бошладим. Йўлда бир неча кун Мовароннахрда тўхтадим. У ердан Рум ва Гуржистон томон йўл олдим. Ўша мамлакатларнинг барисини забт этдим.

¹ Бу воқеа 1398 йил априли 1399 йил априли оралиғида юз берган. (—А.А.)

² Лоҳур – Панжобнинг марказий шаҳри. (—А.А.)

³ Қанауж – Ҳиндистоннинг қадимий шаҳри. Аградан шарқроқда, жанубий Панчала дарёсининг irmогида жойлашган. Гужарот вилояти пойтахти. (—А.А.)

ТУРЛИ МАМЛАКАТЛАР АҲОЛИСИГА МУНОСАБАТ, УЛАРНИНГ АҲВОЛИДАН ХАБАРДОР БЎЛИШ, АВЛИЁЛАР ВА ДИН ПЕШ- ВОЛАРИНИНГ МОЗОРЛАРИНИ ТУЗАТИШ, ВАҚФ ҲАМДА НАЗР ИШЛАРИНИ ТАРТИБГА КЕЛТИРИШ ТУЗУКИ

Амр этдимки, фатҳ, этилган ҳар бир мамлакатдаги сипоҳийлар (ўз ихтиёлари билан) паноҳимга келсалар, уларни навкар қилиб, (аскарларим сафидан) жой берсинглар. У диёрнинг раиятини ёмон ҳодисалардан, қатл ва асиру банд этилишдан, таланишдан муҳофаза қилсинглар. Уларнинг мол-мулкини, буюмларини талон-торождан сақласинглар. Ўша мамлакатдан тушган ўлжа моллар эгаларига қайтариб берилишини текширсинглар.

Сайиидлар, уламо, машойих, фузало, акобир ва улуғларни азиз тутсинглар. Беклар, оқсоқоллар, дехқонлар¹ ва экин майдонларига ишлов берувчилар кўнглини хушнуд этиб, ўзларига қаратсинглар. Раиятни умид ва кўрқинч орасида тутсинглар. Гуноҳлари ва қилмишларига яраша жазоласинглар. Менга бўйсунган мамлакатларнинг сайиидлари, олимлари, шайхлари, фозил кишилари, дарвишлари, зоҳидларини суюргол, вазифа ва ойлик билан сийласинглар. Фақиру мискин, ногиронларга нафақа тайин қилсинглар. Мударрислар ва шайхларга кундалик маошлар белгиласинглар.

Авалиёлар, дин пешволарининг мозорлари ва мақбараларига вақфдан маблағ ажратсинглар. У ерларни палос, таом ва чироқ билан таъминласинглар. Биринчи навбатда амир ал-мўминин, мард кишилар шоҳи Али ибн Абу Толибнинг, унга Оллоҳнинг карами ва эҳсони бўлсин, муқаддас қабрларини яхши сақлаш учун Нажаф билан Ҳиллани вақф этиб берсинглар. Имом

¹ Дехқон – бу ерда ер эгаси маъносида.

Хусайннинг, Оллоҳ ундан рози бўлсин, нурга чўмган муқаддас мозори, авлиёлар улуғи шайх Абдулқодир Жилонийнинг¹ муқаддас қабри, имоми аъзам Абу Ҳанифанинг, унга Оллоҳнинг раҳмати бўлсин, мақбарасини, Бағдодда нурга чўмган бошқа машойихлар, дин пешволари, улуғларнинг мозорларини яхши сақлаш учун баҳоли қудрат Карбало, Бағдод ҳамда уларнинг атрофидаги қишлоқлар ва бошқа жойлардан вақф сифатида ер-сув ажратсинглар. Имом Мусо Козим², имом Муҳаммад Нақий³, Салмон Форсийларнинг⁴ нурли равзали учун эса Жазоир⁵ экин майдонларидан ва Мадоин⁶ даромадидан вақф белгиласинглар. Имом Али ибн Мусонинг⁷ табаррук равзали учун Кутаҳбаст ва Тус шахри атрофидаги ерлардан вақф ажратсинглар ва палос, чироқ ҳамда кундалик емиш-ичмишлар белгиласинглар. Шунингдек, Эрон ва Турондаги шайхларнинг мозорлари ва қабрлари учун ҳар бирига алоҳида, номма-ном назру вақфлар ажратсинглар.

Яна буюрдимки, ҳар бир мамлакат фатҳ этилгач, у ернинг гадоларини тўплаб, кундалик емиш-ичмишлар билан таъминлаб, уларга бирон иш берсинглар. Ҳамда барчаси тамғалансинглар, токи бошқа гадолик қиласинглар. Агар тамғадан кейин ҳам гадолик қилгудек бўлсалар, уларни узоқ мамлакатларга сотиб юборсинглар ёки ҳайдасинглар. Шундагина гадо зоти мамлакатимдан йўқолади.

¹ Абдулқодир Жилоний – йирик мутасаввиф олим; қодирия тариқатининг асосчиси (1166 й. вафот этган).

² Имом Мусо Козим – шиаларнинг еттингчи имоми (799 й. вафот этган).

³ Имом Муҳаммад Нақий – шиаларнинг ўнинчи имоми.

⁴ Салмон Форсий – Муҳаммад пайғамбарнинг форс саҳобаси (655 й. вафот этган).

⁵ Жазоир (бирлиги – Жазира) – Ироқнинг шимоли. (–А.А.)

⁶ Мадоин – Бағдод таркибиға кирган етти қишлоқдан бирининг номи. (–А.А.)

⁷ Имом Али ибн Мусо – шиаларнинг саккизинчи имоми (821 й. вафот этган).

РАИЯТДАН МОЛ-ХИРОЖ ОЛИШ, МАМЛАКАТНИ ТАРТИБГА КЕЛТИРИШ ВА ЮКСАЛТИРИШ, УНИНГ ОБОДОНЧИЛИГИ, ХАВФСИЗЛИГИНИ АМАЛГА ОШИРИШ ТУЗУКИ

Амр этдимки, раиятдан мол-хирож йигища уларни оғир аҳволга солишдан ёки мамлакатни қашшоқликка тушириб қўйищдан сақлансинглар. Негаки, раиятни хонавайрон қилиш (давлат) хазинанинг камбағалашувига олиб келади. Хазинанинг камайиб қолиши эса сипоҳнинг тарқалиб кетишига сабаб бўлади. Сипоҳнинг тарқоқлиги, ўз навбатида, салтанатнинг кучсизланишига олиб боради.

Яна буйруқ, бердимки, ҳар бир мамлакат фатҳ этилса ёки жанг даҳшатларисиз эмину омонлик тиласа, унинг ҳосил ва даромадларини ҳисобга олсинглар.

Агар ерлик фуқаро азалдан бериб келган хирож миқдорига рози бўлса, уларнинг розилиги билан иш кўрсинглар, акс ҳолда (хирожни) тузукка мувофиқ йиғсинглар. Яна амр қилдимки, хирожни экиндан олинган ҳосилга ва ернинг унумдорлигига қараб йиғсинглар. Чунончи, узлуксиз равишида кориз¹, булоқ, дарё суви билан сугориладиган экин ерларини ҳисобга олсинглар ва ундей ерлардан олинган ҳосилнинг (учдан) икки ҳиссасини раиятта, (учдан) бир ҳиссасини салтанат хазинаси учун олсинглар.

Агар раият рўйхатга олинган ерлардан бериладиган солиқни нақд ақча билан тўлашга рози бўлса, нақд ақча миқдорини саркорнинг ҳиссаси ҳисобланган ғалланинг мазкур даврдаги нархига мувофиқ белгиласинглар. Нарх-навога мувофиқ олинган нақд ақчани сипоҳга етказинглар. Бордию раият ҳосилни учга айришга рози бўлмаса, у чоқда ҳисобга олинган экин

¹ Кориз – ер ости сувларини йигиши ва уларни ер юзасига чиқариш учун куриладиган ер ости иншооти.



ерларни биринчи, иккинчи ва учинчи жариб¹ экин ер қилиб ажратсинглар. Биринчи жарибдан (олинган ҳосилнинг) уч харвори², иккинчи жарибдан – икки харвор, учинчи жарибдан бир харворини йигиб олсинлар. Бунинг ярмини буғдой, ярмини арпа ҳисоблаб, ҳосилнинг ярмини олсинлар. Агар раият бу йўсинда солиқ тўлашга рози бўлмаса, у ҳолда бир харвор буғдойига беш мисқол³ кумуш, бир харвор арпасига икки ярим мисқол кумуш миқдорида нархласинлар. Яна қалъа фойдасига бериладиган тортиқни ҳам бунга қўшиб қўйсинлар. Шулардан бошқа, қўшимча тарзда, улардан ҳеч қандай олиқ-солиқ талаб қиласинлар.

Булардан ташқари кузги, баҳорги ва ёзги дехқончиликдан олинган ҳосил раиятнинг ўзига бўлсин. Ламикор ерларни эса жарибларга бўлсинлар, ҳисобга олинган бу ерлардан (солиқ олишда) учдан бир ва тўртдан бир қоидасига амал қиласинлар.

Ҳар шаҳар ва ҳар ердан олинадиган жон солифи, касб-ҳунардан ҳамда ўтлоқ, ва сувлокдан олинадиган солиқни тўплашда қадимдан келган тартиб-қоидага амал қиласинлар. Бордию бунга раият рози бўлмаса, бори-бўлганича иш тутсинлар.

Амр қилдимки, ҳосил пишиб етилмасдан бурун раиятдан молу жиҳот олинмасин. Ҳосил етилишига қараб, солиқни учга бўлиб олсинлар. Агар раият солиқ тўпловчи юбормасдан, солиқни ўзи келтириб берса, у ҳолда у ерга солиқ тўпловчи юбормасинлар. Агарда солиқчини юборишга мажбур бўлсалар, солиқларни буйруқ бериш ва яхши сўз билан олсинлар; калтак ишлатиб, ишни уриш-сўкишгача олиб бормасинлар. Уларни боғлаб, занжир билан кишланламасинлар.

¹ Жарип – ер сатҳи ўлчови. Бир жарип 3600 кв. газга, яъни тахминан бир таноб (958 кв. м)га ерга тенг бўлган.

² Харвор – бир эшак кўтариши мумкин бўлган юк.

³ Мисқол – оғирлик ўлчови, 4,235 гр га тенг бўлган.

Яна амр этдимки, кимки бирон саҳрони обод қиласа ёки кориз қурса, ё бирон боғ кўкартирса, ёхуд бирон хароб бўлиб ётган ерни обод қиласа, биринчи йили ундан ҳеч нарса олмасинлар, иккинчи йили раият ўз розилиги билан берганини олсинлар, учинчи йили (эса олиқ-солиқ) қонун-қоидасига мувофиқ хирож йигисинлар.

Яна буюрдимки, агар (ҳар ер ва элнинг) амалдорлари билан калонтарлари оддий фуқарога жабр-зулм қиласа ва шу орқали бечораларга зарар етказган бўлса, (бундай вақтларда) етказилган зарарни калонтарлардан ундириб, жабр кўрганларга берсинлар, токи улар яна ўз ҳолларига келсинлар.

Хароб бўлиб ётган ерлар эгасиз бўлса, холиса тарафидан обод қилинсин. Агар этаси бўлсаю, (лекин) обод қилишга қурби етмаса, унга турли асбоблар ва керакли нарсалар берсинлар, токи ўз ерини обод қилиб олсин.

Яна амр қилдимки, хароб бўлиб ётган ерларда коризлар қурсинлар, бузилган кўприкларни тузатсинлар, ариқлар ва дарёлар устига (янги) кўприклар солсинлар, йўл устида ҳар манзилгоҳга работлар бунёд этисинлар. Йўлларга кузатувчи ва соқчилар қўйсинлар, ҳар бир работта бир нечта одамни жойлаштирсинларки, йўлларни кузатиш ва сақлаш ишлари шуларга тегишли бўлсин. Йўловчилар молларини фафлат босиб, ўғирлатиб қўймасликларининг вазифаси ҳам ўшаларнинг зиммасида бўлсин.

Яна амр этдимки, катта-кичик ҳар бир шаҳар, ҳар бир қишлоқда масжид, мадраса ва хонақоҳлар бино қиласинлар, фақиру мискинларга лангархона¹ солсинлар, касаллар учун шифохоналар қурсинлар ва уларда ишлаш учун табиблар тайинласинлар. Ҳар бир

¹ Лангархона – йўловчилар қўниб ўтадиган ер; мискин ва етимесирга таом бериладиган жой, фарихона.





шаҳарда сарой¹ ва қозихона² бино қилсинлар. Ва раияту зироатни қўриқловчи қўрчилар³ ҳам тайинласинлар.

Яна ҳар ўлкага уч вазир тайинлашларини буюрдим. Булардан бири раият учун (бўлиб), ундан йигиладиган олиқ-солиқларнинг ундирилишини кузатиб, ҳисоботини олиб борсин. Олиқ-солиқ миқдори, солиқ тўловчиларнинг номларини ёзиб борсин ва раиятдан йифилган маблагни сақласин. Иккинчи вазир сипоҳ ишларини бошқарсин. Сипоҳга берилган ва берилиши лозим бўлган маблаг ҳисобини олиб борсин. Учинчи вазир эса дараксиз йўқолган кишилар, келиб-кетиб юрувчилар (саёҳатчилар ва савдогарлар), ҳар хил йўл билан йифилиб қолган ҳосил, ақлдан озганларнинг молмулки, вориссиз мол-мулкни, қозилар ва шайхулисломларнинг ҳукми билан олинган жарималарни тартибга келтирсин.

Яна амр этдимки, ўлганларнинг молларини ўз ворисларига етказсингар. Агар вориси йўқ, бўлса, уни хайрли ишларга сарф қилсингар ёки Маккайи муаззамага юборсингар.

ЖАНГУ ЖАДАЛ, УРУШ МАЙДОНИГА КИРИШ ВА ЧИҚИШ, ҚЎШИННИ САФЛАШ, ФАНИМ ЛАШКАРИНИ СИНДИРИШ ТУЗУКИ

Амр этдимки, агар фаним (лашкари) сони ўн икки минг отлиқдан кам бўлса, бу урушда амир ул-умаро (лашкаримга) сардорлик қилсинг. Аймоқ ва туманлардан ўн икки минг отлиқ унга ҳамроҳ бўлсинг. Мингбошилар, юзбошилар ва ўнбошиларни ҳам ўзига ҳам-

¹ Матнда «Дор ул-иморат»

² Матнда «Дор ул-аголат»

³ Қўрчи – қурол кўтариб юрувчи; подшоҳ, хон, сulton ва амирларнинг шахсий қўриқчиси. Бу ерда раият ва экинзорларни қўриқловчи ҳарбий бўлинма бошлиги.

роҳ қилсинг. Фаним лашкарига бир манзил¹ йўл қолгунча юриш қилиб, душман билан рўбарў келгач, менга хабар юборсинг.

Яна амр қилдимки, ўшал ўн икки минг отлиқ аскарни тўққиз қисмга бўлсингар, ушбу тартибда: қўлда бир фавж, баронфорда уч фавж, жавонфорда уч фавж, ҳировуда – бир фавж ва қоровуда – бир фавж турсин. Баронфорнинг ўзи ҳировул, чоповул ва шиқовулдан иборат бўлсинг. Шунга ўхшаш, жавонфор ҳам ҳировул, чоповул ва шиқовулдан иборат бўлсинг.

Ва буюрдимки, амир ул-умаро уруш майдонини танлашда (куйидаги) тўрт нарсани назарда тутсинг.

Биринчиси – у ернинг сувга узоқ-яқинлиги.

Иккинчиси – аскар сақлайдиган ернинг хавфсизлиги.

Учинчиси – фаним лашкари турган ердан тепроққа жойлашиши ва офтобга рўбарў бўлмаслиги, токи қуёш шульаси сипоҳийлар кўзини қамаштирасин.

Тўртинчиси – уруш майдони олди очик, кенг жой бўлиши лозим.

Яна амр этдимки, урушдан бир кун олдин лашкарни сафга тизсингар ва тузукка мувофиқ уни фавжларга ажратиб, душман томонга қараб юрсингар. Лашкар отларининг боши кўзланган йўналишга қаратилсинг ва юрар йўлдан чап ёки ўнг ёққа бурилмасин. Яна буюрдимки, сипоҳийлар кўзи фаним лашкарига тушиши ҳамоно, баланд овоз билан «Оллоҳу акбар!» деб такбир айтсингар ва сурон солиб, душман черики устига бостириб борсингар.

Лашкар назоратчиси² сардорнинг жанг вақтида хато қилганини кўрса, дарҳол унинг ўрнига бошқа сардорни ўтиргизсинг. Амирларга ва сипоҳийларга эса мен унга ишонч билдириб берган зафарнишон ёрлиқни кўрсатсинг.

¹ Манзил – карвоннинг бир кунлик йўли, тахм. 30 км. (–А.А.)

² Матнда «оризи лашкар».



ҮН ИККИ МИНГ ОТЛИҚ
ЛАШКАРНИ САФГА ТИЗИШ ТАРТИБИ



ҚОРОВУЛ ФАВЖИ



ХИРОВУЛ ФАВЖИ



ЖАВОНГОРНИНГ
ХИРОВУЛ ФАВЖИ



БАРОНГОРНИНГ
ХИРОВУЛ ФАВЖИ



ЖАВОНГОРНИНГ
БИРИНЧИ ФАВЖИ



ЖАВОНГОРНИНГ
ИККИНЧИ ФАВЖИ



БАРОНГОРНИНГ
ИККИНЧИ ФАВЖИ



БАРОНГОРНИНГ
БИРИНЧИ ФАВЖИ



ҚҮЛ

Амр этдимки, сардор лашкар назоратчиси билан бирга душман сипоҳининг оз-кўплигини мулоҳаза этинлар, саркардаларини фаним лашкарбошилари билан солиштирисинлар. Шунга қараб, ўз сипоҳларининг каму кўстларини тўғрилаб, жангта ҳозирласинлар. Яна ўз сипоҳининг қурол-аслаҳаларини душманники билан таққосласинлар.

(Шунингдек), фанимнинг уруш олиб бориш йўлларини шошмасдан, бир зайдами ёки шиддат биланми, жангта киришини қузатсинлар. Яна фанимнинг жанг қилиш тартибини чамалаб кўрсинарки, улар бор асқари билан бир йўла от қўйиб, шиддаткорона ҳужум қиладими¹ ёки фавж-фавж бўлиб, кетма-кет ҳамла этадими? Яна кўрсинарки, фаним ҳамла вақтида, жанг қилиб орқага қайтиб, кейин яна ҳамлага киришадими ёки биринчи ҳамласи билан чегараланиб, охиригача савашадими? Фаним агар орқасига қайтмай саваш қурса, сипоҳ, унинг ҳамласидан етган зарбага сабртоқат қилиб, охиригача туриб бериши керак. (Унда) шижоат бир соатлик сабр демақдир.

Амр қилдимки, душман уруш очмагунича ўзларича жангта кирмасинлар. Яна амр этдим: душман жанг майдонига киргач, лашкар бошлиғи ясолда² турган тўқиз сипоҳий фавжга жангта тушиб, уруш бошлашлари ҳақида буйруқ берсин, чунки сипоҳ лашкарбошисининг вазифаси, жанг вақтида қўрқувдан қўл-оёғи бўшашиб, саросимага тушмасдан, буйруқ беришдан иборатдир. У ҳар бир сипоҳ, фавжини уруш аслаҳаларидан бири деб билсин ва ўқ-ёй, ойболта, қилич, гурзи, пичоқ ва ханжар каби ҳар бир фавжни ўз ўрни келганда ишлатсин. Ишбилармон лашкарбоши ўзини ва тўқиз сипоҳий фавжини бир тандек кўриб, уларни қўл-оёғи, боши, кўкраги ва бошқа

¹ Матнда «турктоз» атамаси қўлланган.

² Ясол – қўшин сафи. Ясол тузиш – қўшинни юриш, кўрик ёки жанг олдидан сафга тизиш.



аъзоларини ишлатиб курашувчи бир паҳлавондек ҳисобласин. Шундагина, ғаним сипоҳий фавжлари устига кетма-кет урилган тўққизта қилич зарбасидан кейин, тўққизинчи зарбада, албатта, енгилишига умид қиласа бўлади.

Ҳақиқий лашкарбоши аввал ғаним устига ҳиро-вул фавжини юборади, сўнгра ёрдам учун кетидан баронгор ҳировулини жўнатади. Баронгор ҳировули кетидан эса жавонгор ҳировулини жангта ташлайди. Шу тарзда душман аскари устига кетма-кет уч зарба тушган бўлади. Бордию, шу вақт ҳировуллар ғанимга қарши кучсизлик қилсалар, у ҳолда барон-горнинг биринчи фавжи от қўйисин, кетидан жавон-горнинг иккинчи фавжини жангта ташласин. Шунда ҳам зафар қозонилмаса, баронгорнинг иккинчи фав-жини жангта киритсин, кетидан жавонгорнинг би-ринчи фавжини юборсин. (Улар жангта киргач), мен-га хабар жўнатиб, кейинги буйруқларимни кутсин. Шундан сўнг Оллоҳнинг мададу иноятига таяниб, лашкарбошининг ўзи ҳам жангта кирсин. Мени ҳам уруш майдонида ҳозир деб билсилар. Оллоҳнинг ёрдами билан ғанимга саккиз зарба етгандан кейин, тўққизинчи зарбада душман енгилиб, фатҳу нусрат насиб бўлади.

Тўғри сардор улким, у шошма-шошарлик қилмай, (аввал) лашкарини ишга солади. Бордию лашкарбо-шининг ўзи қилич чопишга мажбур бўлса, иложи бо-рича, ўзини ўлимдан сақласин, чунки лашкарбоши-нинг ўлими ўрдуга иснод келтириб, ғаним лашкари-нинг ғалабасига сабаб бўлади.


Шундай қилиб, сардор ақлу тадбиркорлик би-лан иш юритиб, шошма-шошарлик қилмасин, чун-ки шошқалоқлик шайтоннинг ишидир. Чораси бўлмаган ишга киришмасин, чунки ундан қутулиб бўлмайди.

ҚИРҚ МИНГ ОТЛИҚДАН ИБОРАТ ЎН ТЎРТТА ЗАФАРЛИ СИПОҲ ФАВЖЛАРИНИ САҒФА ТИЗИШ ТУЗУКИ

Амр этдимки, агар ғаним лашкари ўн икки минг отлиқдан ортиқ бўлсаю, лекин қирқ мингта етмаса, (лашкаримга) баҳтиёр ўғилларимдан бири сардор бўлсин. Икки бегларбеги қўшунот, туманот ва улусот амирлари ҳамда қирқ минг отлиқдан кам бўлмаган сипоҳ билан унинг хизматида ҳозир турсинлар. За-фарли сипоҳ фавжлари, тадбиркорлик, мардлик ва мардоналикни қўлдан бермасликлари учун, мени доим майдонда ҳозир деб билсилар.

Амр этдимки, менинг зафару баҳт келтирувчи чо-диримни (лашкар) бошига олиб чиқишига, ўн иккита сипоҳий фавж тайинласинлар, уларнинг ҳар бирига улусот амирларидан бири фавж амири этиб белгилан-син. У мен тузган саф тизиши, (ғаним) сипоҳи фавжла-ри сафини бузиш, жанг майдонига кириш ва чиқиш йўллари ҳақидағи ўн икки тузукни доим назарда ту-тиши лозим.

Сардор улким, ғаним сипоҳи саркардаларининг со-нини ҳисоблаб, уларга teng келадиган лашкар бош-лиқларини тайинлади. У ғаним сипоҳининг жангда кўпроқ ўқчиларними, қилич чопувчиларними ёки най-задорларни майдонга туширишини назарда тутсин. Ғаним сипоҳининг рафторини кўрсингим, сипоҳ, фавжларини узлуксиз, оҳиста-оҳиста жанг майдонига юборадиларми ёки ҳаммасини бирданига ҳужумга таш-лайдиларми (буни яхши билсин). Жанг майдонига ки-риш ва чиқиш йўлларини ҳам мулоҳаза қилиб кўрсин. Душман қай тарзда жанг қилишини англаб олсин. Го-ҳида ғаним ўзини камсошли ёки қочаёттандек қилиб кўрсатади. Шундай пайтда, уларнинг макр-ҳийлала-рига учмасин ва ўзини қочаёттандек қилиб кўрсати-шига алданиб қолмасин.



ҚИРҚ МИНГ ОТЛИҚДАН ИБОРАТ
ҮН ТҮРТТА ЗАФАРЛИ СИПОҲ ФАВЖЛАРИНИ
САҒҒА ТИЗИШ ТАРТИБИ



КАТТА ҲИРОВУЛ



шиқовул
ҳировули



чоповул
ҳировули



шиқовулнинг
иккинчи фавжи



шиқовулнинг
биринчи фавжи



чоповулнинг
иккинчи фавжи



чоповулнинг
биринчи фавжи



жавонгор
ҳировули



баронфор
ҳировули



жавонгорнинг
иккинчи фавжи



жавонгорнинг
биринчи фавжи



баронфорнинг
иккинчи фавжи



баронфорнинг
биринчи фавжи



қўл

Жанг кўрган, тажрибали сардор улким, у урушнинг барча жумбоқларидан хабардор, қайси сипоҳ фавжини жангта ташлаб, қайси чигални қандай чоратадбир билан тузатиш ва қай усула жанг қилиш кераклигини билиши лозим. Тажрибали сардор ғанимнинг нияти ва режаларини, унинг қай усулни қўллаб жангта кирмоқчилигини сеза билиши ва душманнинг ўша тадбирни қўллашига тўсқинлик қила олиши керак.

Чин сардор улким, қирқ минг отлиқ сипоҳдан ушбу тартибда ўн тўртта сипоҳий фавж тузади. Аввал ўзига қарашли сафларни тузиб, уни қўл деб номласин. Сўнгра баронфорнинг уч фавжини тузиб, улардан бирини баронфор ҳировули деб атасин. Яна жавонгорнинг уч сипоҳий фавжини тузиб, улардан бирига жавонгор ҳировули деб от қўйисин. Шу тарзда баронфор фавжларининг олдига яна уч сипоҳий фавж қўйиб, уларни чоповул деб номласин. Шу уч фавждан бирини эса чоповул ҳировули деб атасин. Шу тартибда яна уч сипоҳий фавж тузиб, уларни жавонгор фавжларининг олдига қўйиб, уни шиқовул деб номласин. Бу уч фавждан бирини эса шиқовулнинг ҳировули этиб тайинласин. Шундан сўнг қўл қаршисида синалган, тажрибали ўқчилар, қиличбозлар, наизадорлар ва баҳодирлардан иборат катта ҳировул тузсинлар. Чунки ҳировулнинг айнан шу фавжлари қаттиқ сурон солиб ёвни синдиради.

Ҳақиқий сардор улким, ғаним лашкарининг рафторини кузатиб боради ва амирлардан қай бири буйруқсиз юриш бошлаб, бошқалардан илгарилаб кетса, унга танбеҳини беради. Чин сардор душманнинг қай тарзда жангта кириши ва чиқишини назаридан қочирмасин, токи ғанимнинг ўзи уруш бошламагунча жангга киришга ошиқмасин. Ёв жангта кирганидан сўнг, сардор уларнинг жанг қилиш усулини кўриб ўргансин, жанг майдонига қай тартибда кирадилар ва чи-



қадилар, унга нисбатан қандай ҳужум этадилар, ҳамла қылгач, ортларига қайтадиларми ёки вақти билан қочиб, (кейин яна) фурсат пойлаб қайтадан жангта кирадиларми, (буларни кузатиб турсин). Яна сардорга лозимдирки, (қаттиқ зарба емай туриб) енгилгандек қоча бошлаган ёв кетидан қувмасин, чунки уларнинг ортларида кучли ёрдамчи кўшинлар турган бўлади. Сардор шуни ҳам билсинки, ғаним лашкари бор кучи билан бир катта тўпдек бўлиб ҳужум қиласими ёки ўнгу сўл қанотини ёзиб, уруш олиб борадими?! Сардор аввал уларга қарши катта ҳировул фавжларини рўбарў қилиши ва жангта ташлаши керак. Унинг ортидан катта ҳировулга мадад тариқасида кетма-кет чоповул ҳировули ва шиковул ҳировулини жангта киргизиши керак. Уларнинг орқасидан эса чоповулнинг биринчи фавжи ва шиковулнинг иккинчи фавжини жангта ташласин. Уларнинг кетидан эса чоповулнинг иккинчи фавжи ва шиковулнинг биринчи фавжини жангта ташласин. Агар ғанимга етказилган ушбу етти зарбадан кейин ҳам ғалабага эришилмаса, у вақтда баронфор ва жавонфорнинг ҳировулларини жангта киритсин, (бу билан) ғанимга тўққиз зарба берилади. Агар тўққиз зарбадан кейин ҳам фатҳу зафар мұяссар бўлмаса, баронфорнинг биринчи фавжи ва жавонфорнинг иккинчи фавжини урушга солсин. Агар шу ўн бир зарбадан кейин ҳам ғалабанинг дараги келмаса, баронфорнинг иккинчи фавжи ва жавонфорнинг биринчи фавжини жангта ташласин. Шу ўн уч зарбадан кейин ёв енгилиб, ғалаба қўлга киритилади, деб умид қилсин. Мабодо бу ўн уч зарба билан ҳам фатҳу зафар ҳосил бўлмаса, у ҳолда, қўл сипоҳий фавжларини урушга шайлаб, ўзи ҳам улар билан жангта кирсин ва душман кўзига ўзини тоғдек кўрсатиб аста-секин, уюшган ҳолда ҳаракат қилсин. Уруш баҳодирларига буюрсинким, қиличларини яланғочлаб ҳужумга отилсинлар. Ўқчилар эса визиллатиб ёйлардан қалин ўқ

ёғдирсинлар. Шунда ҳам фатҳу зафарга эришилмаса, сардорнинг ўзи жанг майдонига тушсин ва менинг (мадад кучларим) ва буйруқларимни кутсин.


ҚИРҚ МИНГ ОТЛИҚДАН ОРТИҚ СИПОҲ ФАВЖЛАРИНИ САҒГА ТИЗИШ ТУЗУКИ

Шундай тузук битдимки, агар ёғий лашкари қирқ минг отлиқдан ортиқ бўлса, бегларбегилар, амирлар, мингбошилар, юзбошилар, ўнбошилар, баҳодирлар ва бошқа сипоҳийлар менинг зафарли байроғим остида бўлсин ва амру фармонимни кутсин.

Амр этдимки, қайси бир сипоҳий фавж амирига ёрлиқ юборсам, ёрлиқдаги ҳукмимга биноан иш тутсин ва унга хилоф иш қилмасин. Бегларбегилардан ёки амирлардан биронтаси ҳукмимга хилоф иш тутиб, ундан четта чиқса, қиличдан ўтказилиб, ўрнига «мунтазир ал-аморат» ҳисобланган (амирлик мартабасини кутиб турган) ўринбосари қўйилсин.

Ва (яна) амр қилдимки, улусот, қўшунот, туманотта тегишли қирқ аймоқдан тамға олган ўн иккитаси қирқ фавжга тақсим қилинсин. Тамға олмаган йигирма саккиз аймоқ амирлари эса (ўз лашкарлари билан бирга) қўл сипоҳий фавжининг орқасида саф тортсинлар. Ўғилларим, набираларим ўз фавжлари билан қўл қисмининг олдида ўнг қанотдан саф тизсинлар. Қариндошларим ва жиянларим эса ўз фавжлари билан қўл фавжининг олдириғида чап қанотдан жой эгалласинлар. Булар шай бўлиб турсинлар ва қаерга мадад етказиш лозим бўлса, ёрдам қўрсатсинлар.

Баронфорга олти сипоҳий фавж тайинласин. Яна бир сипоҳий фавжни эса баронфор ҳировули сифатида белгиласинлар. Шунга ўхшаш, жавонфорда олтига фавждан саф тузсинлар. Яна бир фавжни жавонфор ҳировули қилиб тайинласинлар.



ТАМФА ОЛГАН ЎН ИККИ АЙМОҚДАН
ТУЗИЛГАН ҚИРҚ ФАВЖНИ САФГА ТИЗИШ



ЧАП ҚАНОТ
ҚОРОВУЛБЕГИСИ



ҲИРОВУЛНИНГ
ҲИРОВУЛИ



ҮНГ ҚАНОТ
ҚОРОВУЛБЕГИСИ



ШИҚОВУЛ ҲИРОВУЛИ



ШИҚОВУЛ



ЖАВОНГОР ҲИРОВУЛИ



ЖАВОНГОР




ҚАРИНДОШЛАР
ФАВЖИ



ҚҮЛ



АМИРЗОДАЛАР
(ЎҒИЛЛАР)
ФАВЖИ



ТАМФА ОЛМАГАН ЙИГИРМА САККИЗ АЙМОҚ

Амр этдимки, баронгор фавжларининг олдидан олтита сипоҳий фавж жойлаштирилар ва уларни чоповул деб номласинлар; бошқа бир фавжни тузиб, уни чоповулнинг ҳировули қилиб белгиласинлар. Шунингдек, жавонгор фавжларининг олдига қўйиш учун ҳам олтита сипоҳий фавж тайинласинлар ва уларни шиқовул деб атасинлар. Яна бир фавж тузиб, уни шиқовул ҳировули қилиб қўйисинлар. Чоповул ҳамда шиқовул фавжларининг олдига тажрибали амирлар ва синалган баҳодирлар бошчилигида олтита фавждан саф тузиб, катта ҳировул деб номласинлар. Бу олти фавждан бўлак яна бир фавж тузиб, ҳировулнинг олдига қўйисинлар ва уни ҳировулнинг ҳировули десинлар. (Лашкарнинг олд қисмида) ҳировул ҳировулининг ўнг ва сўл қанотига икки қоровулбегини қавм-қариндошларимдан иборат сипоҳий фавжлари билан бирга қўйисинларким, улар ғаним лашкарини кузатиб турсинлар.

Амр қилдимки, ўша қирқ фавж амирлари, менинг ёрлиғим етиб бормагунча, жангта кирмасинлар ва навбат етмагунча жойларидан жилмасинлар, лекин жангта шай бўлиб турсинлар. Жангта кириш ҳақидаги буйруқ олингач, ёвнинг вазиятига қараб, сўнг жангта кирсинларким, ғаним қайси йўлдан жангта кирса, унинг йўлини тўссиналар ва душман тўстган ҳар йўлни чораю тадбир ишлатиб очсинлар.

Амр этдимки, ҳировулнинг ҳировули жангта киргандан кейин, олти фавжлик катта ҳировулнинг амири ўз фавжларини бирин-кетин жангта туширсинки, ғаним устига кетма-кет олти зарба берилгач, уларнинг сафлари бузилиб, кучлари синдирилади.

Шу пайт ўнг қўл чоповул амири ўзининг олти фавжини бирин-кетин ёрдамга юбориб, орқасидан ўзи ҳам ҳужумга ўтсин. Шунингдек, шиқовул амири ўзининг олти сипоҳий фавжини олдинда турган фавжларга ёрдамга юборсин. Уларнинг орқасидан ўзи ҳам (жанг



майдонига) етиб борсингим, Оллоҳнинг мададу инояти билан, ғаним устига ўн саккиз зарба урилгач, уларнинг кучлари синиб, орқага чекинадилар.

Душман бу зарбаларни егандан кейин ҳам бўшаш маса, баронфор ва жавонфор амирлари ўз ҳировулларини жангта киргизсинлар. Шу тариқа иккала ҳиро-вул фавжи ўнг ва чап қанотдан уруш очгач, ёв албатта бардош беролмай, кучи синади. Агар шундан кейин ҳам ғаним енгилмаса, баронфор ва жавонфор амирлари ўз сипоҳий фавжларини бирин-кетин унинг устига юборсинлар. Агар баронфор ва жавонфор амирлари зафарли аскарлари ҳам ғаним фавжларини енга олмаётганлигини қўрсалар, ўзлари душманни енгиш учун жангта кирсинглар.

Шунда ҳам баронфор ва жавонфор амирлари (ғаними енгишга) ожизлик қилсалар, баронфор тарҳида бўлган амирзодалар ва жавонфор тарҳида бўлган қариндошларим ғаним устига шиддат билан бостириб борсинлар. Буларнинг кўзлари ёв сардорида ва байробида бўлсин, шижоату мардлик билан ғаним сафларини бузсинлар, сардорни қўлга туширишга интилсинлар ва душман байробини ерпарчин этишга ҳаракат қилсинлар.

Агар шу зарбалардан кейин ҳам ғаним чекинмай, ўрнида тураверса, у ҳолда қўлнинг сараланган фавжлари ва баҳодирлари, қўл фавжлари ортида саф тортиб турган улусларнинг лашкарлари, барчаси бирданнига шиддат билан душман устига ташлансинлар.

Агар шунда ҳам фатҳу зафар қозонилмаса, сultonнинг ўзи шерюрак ва баланд ҳиммат билан ҳаракат қилсин. Чунончи, Қайсар билан бўлган жангда шундай қилдим: амирзода Мироншоҳ, ўнг қанотнинг сардори эди. Унга Қайсарнинг чап қаноти рўбарўси ва ёнидан жангта киришни буюрдим. Чап қанотнинг амирлари – амирзода Муҳаммад Сulton ва амир Сулаймон (шоҳ)га эса ёрлик юбориб, Қайсарнинг ўнг

қанотига ҳужум қилишни тайинладим. Ўнг қанотимдаги амирзода Абу Бакрга тепалик устида турган Йилдиirim Қайсарнинг қўл фавжига турктоз қилишни буюрдим. Ўзим эса қўл фавжлари ва улус, аймоқ лашкарлари билан Қайсар томонга юрдим. Қайсарнинг сипоҳий фавжлари биринчи ҳамламдаёқ енгилди. Султон Маҳмудхон¹ (қочаёттан) Қайсарнинг кетидан қувиб, уни қўлга туширди ва менинг даргоҳимга олиб келди.

Тўхтамишхонни ҳам шу тузукларни қўллаб енгтан эдим. Унинг байробини эса ертубан қилишни буюргандим.

Агар ёв бостириб келиб, чоповул, шиқовул, баронфор ва жавонфор фавжларини маҳв этиб, лашкарнинг қўл қисмига етар экан, у чоғда султон шижоат оёғини сабр узангисига маҳкам тираб, душманни даф қилиб йўқотиш учун олдинга ташлансин.

Чунончи, мен Шоҳ Мансур билан бўлган жангда шундай қилдим. У турган ерга етиб олдим ва у билан юзма-юз тўқнашдим, токи уни ҳалокат тупроғига қормагунимча урушдим².

ТАМОМ



¹ Султон Маҳмудхон – Чигатой улусининг Амир Темур давридаги иккинчи хукмдори (1386 – 1402). Биринчи хукмдор Суюргатмишхон (1370 – 1388) эди.


² Бу ерда Амир Темур билан Шоҳ Мансур ўртасида 1393 йил Шероз останасида бўлган жанг назарда тутилмоқда.






ЗАРВААКЛАР






Султон Махмудхон асир олинган Султон Боязид Йилдиримни
 Амир Темур ҳуурига келтирмокда. Шарафуддин Али Яздий
 «Зафарнома» қўлбозмасидан миниатюра.
 Шероз. 1553 йил.



Ховарнек қасри қурилиши. Камолиддин Беҳзод расми.
 Хирот. 1494–1495 йиллар.



Шарафуддин Али Яздий. «Зафарнома» асари кўлёзмасининг
16 ва 2a саҳифалари. 1629 йилда Самарқандда кўчирилган,
Абу Райхон Беруний номидаги Шарқшунослик институти
фондида сакланади. Инв. раками 4472.



Бронза шамдон. Туркистан. XV аср.





Хожа Аҳмад Яссавий мақбараси учун ясалган қозон.
Самарқанд. XIV аср охири.



Шоҳруҳ Мирзо рафиқаси Гавхаршодбегимнинг муҳри.
Хирот. 1457 йилдан аввал.




Муҳр. Марказий Осиё. XV аср.



Абдулла Хотиифий «Темурнома» асари қўллэзмаси зарвараги.
1568 йилда Али Ризо котиб томонидан кўчирилган. Абу Райхон Беруний
номидаги Шарқшунослик институти фондида сакланади. Инв. рақами 2102.

Абдулла Хотифий «Темурнома» асарининг хотима сахифаси.
1568 йилда Али Ризо котиб томонидан кўчирилган.
Абу Райхон Беруний номидаги Шарқшунослик институти
фондида сакланади. Инв. рақами 2102.





Абдулла Хотифий «Темурнома» асари кўлёзмаси 1-вараги
«а» саҳифасидаги безак. «Шамс нақши». 1568 йилда Али Ризо котиб
томонидан кўчирилган. Абу Райхон Беруний номидаги
Шарқшунослик институти фондида сакланади.
Инв. рақами 2102.

INSTITUTES
POLITICAL AND MILITARY,
WRITTEN ORIGINALLY
IN THE MOGUL LANGUAGE,
BY THE GREAT
TIMOUR, IMPROPERLY CALLED TAMERLANE;

First translated into PERSIAN by ABU TAULIB ALHUSSEY
and thence into ENGLISH, with Marginal Notes,

BY MAJOR DAVY,
PERSIAN SECRETARY TO THE COMMANDER IN CHIEF
THE BENGAL FORCES
From the Year M DCC LXX to M DCC LXXXIII.
AND NOW PERSIAN SECR. TO THE GOVERNOR GENERAL OF BENGAL.

The Original PERSIAN transcribed from a MS. in the Possession of
Dr. WILLIAM HUNTER, PHYSICIAN EXTRAORDINARY to the QUEEN,
F.R. & A.S. and of the ROYAL ACADEMY of SCIENCES at
PARIS; and the WHOLE WORK published with a Preface, Indexes,
Geographical Notes, &c. &c.

BY JOSEPH WHITE, B.D.
FELLOW OF WADHAM COLLEGE, 2ND LAUDIAN PROFESSOR OF ARABIC IN THE
UNIVERSITY OF OXFORD.

OXFORD:
AT THE CLARENDON-PRESS. MDCC LXXXIII. (1783)

SOLD BY J. MURRAY, NO. 32 FLEETSTREET, LONDON; AND BY D. PRINCE
AND J. COOKE, OXFORD.

«Темур тузуклари»нинг Оксфордда амалга оширилган
инглиз тилидаги нашри титул вараги.
Буюк Британия, Лондон. 1783.

BOOK THE FIRST.

DESIGNS AND ENTERPRISES.

***T**HUS I formed measures and designs for the reduction of kingdoms, and for the obtainment of empire, and for defeating armies, and for circumventing enemies, and for making friends of foes, and for going out, and for coming in, amongst friends and enemies.

most important Schemes and Enterprises, which consequently lead to a knowledge of the genius, abilities, and extraordinary actions of the man; it has been deemed a proper introduction to that part of the Work, which may with propriety be styled his INSTITUTES. Another reason for prefixing this part of the Work to the other, is, that from the simplicity of the Narrative, it will (in the beginning) be better adapted to the use of those who are inclined to study the Persian Language.

A 2

FOR

«Темур тузуклари»нинг Оксфордда амалга оширилган инглиз тилидаги нашридан саҳифа. Буюк Британия, Лондон, 1783.



TIMOUR.

From an Original in the Bodleian Library

«Темур тузуклари»нинг Оксфордда амалга оширилган инглиз тилидаги нашрида берилган Амир Темур сурати. Буюк Британия, Лондон, 1783.



Мири (беш тийинлик танга). Амир
Темур ва Маҳмуд. Самарқанд шаҳри.
Оғирлиги 1,51 гр. Кумуш. 1391.



Мири (беш тийинлик танга).
Амир Темур ва Маҳмуд.
Самарқанд шаҳри. Оғирлиги
1,51 гр. Кумуш. 1395.



Танга. Амир Темур ва Маҳмуд.
Исфаҳон шаҳри.
Оғирлиги 6,03 гр. Кумуш.
Санаси ўчиб кетган.



Фулус (танганинг бир тури).
Амир Темур.
Самарқанд шаҳри.
Оғирлиги 4,13 гр. Мис. 1383.



Танга. Амир Темур ва
Муҳаммад Султон.
Султония шаҳри.
Оғирлиги 6,21 гр. Кумуш.
Санаси ўчиб кетган.



Фулус (танганинг бир тури).
Амир Темур.
Самарқанд шаҳри.
Оғирлиги 3,51 гр. Мис. 1383.



Мири. (Беш тийинлик танга).
Амир Темур ва Маҳмуд. Хоразм.
Оғирлиги 1,50.
Кумуш, 1394.



Танга. Амир Темур ва
Маҳмуд. Мордин шаҳри. Оғирлиги 5,95.
Санаси ўчиб кетган.



Танга. Амир Темур ва
Маҳмуд. Кошон шаҳри. Оғирлиги 6,00 гр.
Санаси ўчиб кетган.



Фулус (танганинг бир тури).
Амир Темур.
Оғирлиги 2,45 гр. Мис.



Танга. Амир Темур ва
Муҳаммад Султон.
Язд шаҳри. Оғирлиги 6,17 гр.
Кумуш, 1402.



Танга. Амир Темур ва
Маҳмуд. Бомиён.
Оғирлиги 5,95. Кумуш.
1397–1398.





МУНДАРИЖА


Ислом Каримов. Миллий давлатчилигимиз
тарихининг мумтоз намунаси 5

ТЕМУР ТУЗУКЛАРИ

Биринчи китоб

Кенгашлар ва тадбирлар	13
Туғлуқ Темурхон билан учрашганимдан сўнг қўнглимга келган биринчи кенгашим	18
Давлат қуриш олдидан қилган иккинчи кенгашим	20
Ўз салтанатимни тузиш йўлида қилган учинчи кенгашим	24
Салтанатимнинг дастлабки даврларида қилган тўртинчи кенгашим	26
Хуруж кунлари қилган бешинчи кенгашим	28
Хуруж вақтида қилган олтинчи кенгашим	29
Хуруж кунлари қилган еттинчи кенгашим	32
Жета лашкарини синдириш мақсадида қилган саккизинчи кенгашим	34
Салтанатни тиклаш йўлидаги тўққизинчи кенгашим	34
Салтанатимни мустаҳкамлаш учун қилган ўнинчи кенгашим	36
Салтанатимга ривож бериш учун қилган ўн биринчи кенгашим	37
Лашкаримни иттифоққа келтириш учун қилган ўн иккинчи кенгашим	39
Жета ва Илёс Хожа лашкарига шикаст етказиш ҳақида қилган ўн учинчи кенгашим	40

Мени қўлга туширмоқчи бўлган амир Ҳусайннинг макру ҳийласидан қутулиш учун қилган кенгашим	49
Туронзаминни мўғуллар тоифаси қолдикларидан тозалаш учун қилган кенгашим	51
Менга ҳар турли ёмонликлар қилиб чўчиб юрган ва қилмишлари учун «Мени ўлдиради» деб ваҳимада юрганларни ўзимга эл қилиб олиш бобидаги кенгашим	53
Хуросон пойтахти(Ҳирот)ни олиш бобида қилган кенгашим	53
Сейистон, Қандаҳор ва Афғонистон мамлакатларини забт этиш ҳақида кенгашим	54
Ўрусхонни бартараф қилиш ва Даشتி Қипчоқни босиб олишда қилган кенгашим	55
Гilon, Журжон, Мозандарон, Озарбайжон, Ширвон, Форс ва Ироқ мамлакатларини забт этиш бобида қилган кенгашим	56
Форс пойтахти (Шероз)ни ва Ироқнинг қолган қисмини забт этиш бобидаги кенгашим	57
Тўхтамишхонга шикаст етказиш бобида қилган кенгашим	58
Доруссалом (Бағдод)ни ва араб Ироқини забт етиш тўғрисидаги кенгашим	59
Тўхтамишхонни йўқотиш учун қилган кенгашим	60
Ҳиндистонни забт этиш учун қилган кенгашим	61
Ҳиндистон пойтахти (Дехли)га лашкар тортиш борасида қилган кенгашим	63
Ҳиндистонга олиб борадиган йўлни аффонлардан тозалаш учун қилган кенгашим	64
Дехли ҳокими Султон Маҳмуд ва Маллухонларни ентиш бобидаги кенгашим	65
Гуржистон мамлакатини эгаллаш учун қилган кенгашим	66
Миср ва Шом (мамлакатлари)ни фатҳ этиш бобида қилган кенгашим	68
Рум мамлакатини забт этиб, Қайсар лашкарини синдириш бобида қилган кенгашим	70



Иккинчи китоб

«Мамлакатларни фатҳ этувчи...»	73
Дину шариат тузуки	79
Мамлакат ишлари тузуки	88
Менинг даргоҳимга илтижо қилиб, паноҳ истаб келган турку тожик, арабу ажам тоифаларидан бўлгандар ҳақидаги тузук	94
Салтанатни ўз тасарруфимда сақлаш учун амал қилган тузуким	95
Сипоҳ сақлаб туриш тузуки	98
Сипоҳга улуфа бериш тузуки	99
Сипоҳга танҳоҳ, ва улуфа тақсимлаш тузуки	101
Ўғиллар ва набираларга улуфа бериш тузуки	102
Ўғиллар, набиралар, қавм-қариндошлар, амирлар ва вазирларни жазолаш йўли билан салтанатда интизом сақлаш ҳақида тузук	103
Вазирни танлаш тузуки	106
Амирлик ва ҳукмдорлик мартабалари тузуки	111
Аскарни энг қўйи мартабадан олий мартабагача тарбиялаб кўтариш тузуки	113
Амирлар, вазирлар, лашкар ҳамда раиятни тақдирлаб, мартабалар ва инъом-совғалар бериш тузуки	116
Катта ногора ва байроқ бериш тузуки	119
Сипоҳнинг яроқ-жабдуқлари ва анжом-жиҳозлари тузуки	120
Уруш ва тинчлиқда, «ётишу ҳузур»да ва мажлис-йигинларда ҳозир бўлиш тузуки	121
Вазирларнинг хизмат қилиш тузуки	123
Улуслар, қўшиналр ва туманларнинг амирларини тайинлаш тузуки	125
Навкарнинг бегига ва бекнинг навкарига муомала қилиш тузуки	127
Дўйту душманга муомала қилиш тузуки	130
Салтанат саройида ўлтириш ва ўрин олиш тузуки	132
Мамлакатларни забт этиш тузуки	133
Салтанатни идора қилиш тузуки	137
Мулку мамлакат, сипоҳу раият аҳволидан хабардор ва огоҳ, бўлиб туриш тузуки	139

Турли мамлакатлар аҳолисига муносабат, уларнинг аҳволидан хабардор бўлиш, авлиёлар ва дин пешволарининг мозорларини тузатиш, вакф ҳамда назр ишларини тартибга келтириш тузуки	141
Раиятдан мол-хирож олиш, мамлакатни тартибга келтириш ва юксалтириш, унинг ободончилиги, хавфсизлигини амалга ошириш тузуки	143
Жангу жадал, уруш майдонига кириш ва чиқиш, қўшинни сафлаш, ғаним лашкарини синдириш тузуки	146
Қирқ минг отлиқдан иборат ўн тўртга зафарли сипоҳ, фавжларини сафга тизиш тузуки	151
Қирқ минг отлиқдан ортиқ, сипоҳ, фавжларини сафга тизиш тузуки	155

ТЕМУР ТУЗУКЛАРИ

Таҳрир ҳайъати:

Баҳром Абдуҳалимов, Бобур Алимов, Муҳаммаг Али,
Ашраф Аҳмедов, Омонулла Бўриев, Ҳайридин Султонов,
Убайдулла Уватов, Дилором Юсупова, Пиримқул Қодиров

Халқаро Амир Темур жамғармаси ҳамда
ЎзРФА Абу Райхон Беруний номидаги
Шарқшунослик институти Йлмий кенгашлари
томонидан нашрга тавсия этилган

Масъул муҳаррир — Ашраф Аҳмедов
Тақризчи — тарих фанлари номзоди Омонулла Бўриев

Ишчи гурӯҳ:
Зоир Исажонов, Шомуҳиддин Мансуров,
Турғун Назаров,
Ибодулла Шоймарданов

Муҳаррирлар:

Абдулла Аъзамов, Тўлқин Ҳайит
Дизайнер: Жаҳонбек Адилов

Техник муҳаррир: Ульяна Ким
Компьютерда тайёрловчи: Гулмира Қулназарова

Нашриёт лицензияси AI № 158, 14.08.09.
Босишга рухсат этилди 4.04.2011. Бичими 60 × 90^{1/16}.
Балтика гарнитурасида терилди. Офсет қофози.
Офсет босма усулида босилди. Шартли б.т. 11,5.
Нашр б.т. 9,20. 5000 нусхада чоп этилди.
Буюртма № 08-73. Баҳоси шартнома асосида.

Ўзбекистон Матбуот ва аҳборот агентлигининг
«Ўзбекистон» нашриёт-матбаа ижодий уйи.
100129, Тошкент ш., Навоий кўчаси, 30.

Телефон: (371) 244-87-55, 244-87-20.
Факс: (371) 244-37-81, 244-38-10.
e-mail: iptduzbekistan@mail.ru www.iprd-uzbekistan.uz

T39 **Темур тузуклари**/Таҳрир ҳайъати: Б. Абдуҳалимов
ва бошқ., Форсча матндан А. Соғуний ва Ҳ. Кароматов
тарж. – Тошкент: Ўзбекистон, 2011. – 184 б.

ISBN 978-9943-01-356-8

УДК: 94(575)
ББК 63.3(5Ў)4